

Id ash d Luke O'ohana ab Amjed g Jiosh Alidag

Matsh haschu ahgk am ha o'ohani

1 ¹⁻⁴Ni-nawoj map ab si tatchua g Jiosh:

Ab apsh kaiham ihda s-kehg ha'ichu ahga ab amjed g Jiosh alidag mach ab s-wohochud. Kunt am wo ha'ichu m-o'ohani ab amjed mapt hekaj wo s-ap s-mahchk. Hegam mash am neid o am t-ahgid ab amjed. Kut mu'i am s-ap o'oha hegai mo haschu am t-ahgid. Nt ahni am si i hoa wehs ihda k hekaj am wo m-o'ohanid k am ba'ich ha'ichu wo m-ahgi ab amjed.

**Matsh hema wo i wuhshani k am
wo i ha ap'ech g Jiosh hemajkamga**

⁵Amjed atsh ab i shohshonwua ihda mash eda g Herodbad am d kownal Judea chekshani ch ed am ha dahm g Tutuligo hemajkam. Sh am hema d ha-pahlig ch hab chehgig Zacaria. Sh g wehmaj kihkam hab chehgig Elisabed. Idam ash ab d amjedkamaj hegai mash d ha-shohshonbad g papal ch hab chehgig Aaron. Kush g Zacaria ab hema d amjedkam mash hab chehgig Abia. ⁶Kush idam Zacaria ch Elisabed am si oid g s-ap'ekam

ch s-ap am hab junihim wehs hegai mo g Jiosh ab ha chehani g Tutuligo. ⁷Kutsh wabsh okst ihda Elisabed k pi ha mahmadt. Tsh g Zacaria hab wa'ap kelit.

⁸Kutsh hema tash am i e ai matsh g Abiabad amjedkam am hab wo juh g e-chikpan ge'e cheopi ch ed. ⁹Kumtsh am i kei g Zacaria matsh am wo ha mehmhei g s-ap uhw kuhbhondakud. Tsh am i wah cheopi ch ed. ¹⁰Kush am jeg ed gegok g hemajkam ch e ho'ige'idahun.

¹¹Tsh am cheopi ch ed hema i e chehgi g anghil Zacaria tahgio k ash ab kehk s-apkojed abai mash ab kuhbhoni g s-ap uhw kuhbhondakud. ¹²Tsh am i nei g Zacaria k si e todsid k si s-ehbeni ihda.

¹³Kush wabshaba hab kaj g anghil, "Pi g am sha'i e todsid, Zacaria. Jiosh at kah g m-ho'ige'idahuna. T g m-wehm kihkam wo wa hema madt. T d wo cheojk. Kupt hab wo chehch John. ¹⁴⁻¹⁵Jiosh at ab a wo si has elidad. Kut pi koi wo mahsi. T g Jiosh ab wo mah g Hekia S-ap'ekam Gewkdag. Kupt heg hekaj wo si

s-hehgigk. T g mu'i hemajkam hab wa'ap wo si s-hehgigk mat hekid wo mahsi. Kut ihda em-aliga pi hekid wo ih'ed hegai mo s-nawmdag.

¹⁶ch mu'i ab wo i ha nohnogi g Tutuligo hemajkam ab Jiosh wui.

¹⁷T koi in hu wo i wuhsh g Jiosh si Kehsha jewed dahm. T g em-aliga ia wehpeg wo ahgachugad mat in wo i wuhsh. T g Hekia S-ap'ekam Gewkdag ab wo mah g gewkdag heg wehhejed hab masma mo wa ab mahkch g Elijabad. Kut hab wo ha juh g hemajkam mat ab wo si pihk e elidad ha hekaj g e-a'aliga k hegam hab wo ha juh mo d pi ap'ekam mat ab wo kaihamad g ha-amichudadag hegam mo d s-ap'ekam. Neh, bat masma am wo i ha ap'ech g hemajkam heg wehhejed jiwhiadag g Jiosh si Kehsha." Neh, bash kajj hegai anghil.

¹⁸Kush g Zacaria hab kajj, "Nt has hig masma wo si s-ap s-mahchk machs wo hema bei g ali natt pi kekelt?"

¹⁹Sh hab kajj g anghil ab wui, "Dani Jiosh chikpandam, Gabriel. Kut ab ni-cheha mant ia wo m-ahgi ihda si s-hehgig ha'ichu ahgaj.

²⁰Kupt eda pi ab hu ni-wohoch. T heg hekaj hab wo m-juh mapt pi wo sha'i e nako maps wo ha neokad ia'i amjed am hugkam mat hab wo e juh ihda mani m-ahgid." Neh, bash kajj hegai anghil.

²¹Sh eda heg oidam am chum nenida g hemajkam g Zacaria ch si has i elid k hab kajj, "A t has e juh k pi oi ab hu i wuhsh?"

²²Tsh am hu hebai ab hahawa i wuhshani k chum neo am ha wui

k wabsh pi sha'i e nako. Sh am ha hekaj wabsh i amich g hemajkam matki ab ha'ichu e chehgi wui no pi ab wabsh i ha magwuid g e-nowikaj ch pi ab hu has sha'i kajj.

²³Tsh am wabsh i chum huhug g tash mat he'es tash am hab wo juh g e-chikpan. Tsh gam uhpam hih e-kih wui.

²⁴⁻²⁵Kush amai i mia amjed matsh wo'iwua g ali. Kush am wabsh s-ap e tahtk ch am e ehstokch g Elisabed e-kih ed hetasp mashad hab kajjhim, "Chum ani hekid si ni-elid mani pi ha mahmadt. Kutki wabshaba id hab ni-juni g Jiosh k hekaj gam hu hab i juh g si ni-edadag am hemajkam ha-nena ed."

Matsh wo mahsi g Jiosh alidag ia jewed dahm

²⁶⁻²⁷Neh, tsh am him k am d i chuhdp mashad am i dahm matsh am wo'iwua g Elisabed mad. Tsh g Jiosh am chea hegai anghil mash d Gabriel matsh am wo u'apa g ha'ichu ahgaj hema wui g chehia.

Sh hab chehgig ihda chehia Mary ch am kih heg eda kihhim mash d Nazareth ch am eda g Galilee chekshani. Sh am hema ep d kihkam ch hab chehgig Joseph ch atsh wo hohnt hegai Mary. Idam ash ab hema d amjedkam mash kownalibad ch hab chehgig David.

²⁸Kutsh koi e ai matsh wo e hohont. Tsh am jiwia hegai anghil Mary wui k hab kajj, "Si g s-hehgigk Mary. Jiosh at ab i s-m-ho'ige'id k am wo i m-wehmt."

²⁹Tsh am wabsh i pi amich mas haschu hab ahg k si e kudu heg hekaj.

³⁰Sh hab ep kajj g anghil, “Pi g am sha'i e todsid, Mary. Ab at i m-mah g Jiosh g ho'ige'idadag. ³¹Kut am wabsh wo e nahto g ali m-eda k wo mahsi k d wo cheojk. Kupt hab wo chehch Jesus. ³²Kut d wo si s-has ha'ichuk no pi d alidaj g Jiosh. T g Jiosh am wo i kei mat d wo kownalk am kehkud ed g e-shohshonbad David. ³³Kut chum hekid d wo ha-kownaligk g Jiosh hemajkamga. Pi at hekid wo huhug g kownaltaligaj.” Neh, bash kajj g anghil.

³⁴Sh hab kajj g Mary ab wui, “Nt has hig masma wo ge madt mani d wabsh kia chehia ch pi koi ha kun?”

³⁵Sh g anghil ab wui hab kajj, “Jiosh at ab wo cheha g Hekia S-ap'ekam Gewkdag. T heg hab wo juh g Jiosh gewkdagkaj. Mt heg hekaj wo s-mahchk mat d wo si hekia s-ap'ekam alik ch d wo Jiosh alidagk.

³⁶“Neh, s-mahch ap mat heki hu okst g m-hajuni Elisabed k pi ha mahmadt. Kut eda g Jiosh ab s-ho'ige'el. Kut g cheoj ali wo bei. K d chuhdp mashad hemu mat am wo'iwua g ali. ³⁷Kupt id amjed wo s-mahchk mat wo e nako g Jiosh mat am hab wo juh hegai mo haschu hab e ahgahim.” Neh, bash kajj g anghil.

³⁸Kush hab hahawa kajj g Mary, “Neh, dani piongaj g Jiosh. K am wa s-ap'e mat am hab wo juh g e-tatchui ab ni-ab” Tsh gam hahawa hih g anghil ab amjed.

Matsh am i chehgam g e-hajuni g Mary

³⁹⁻⁴⁰Tsh ab ha hekaj i e nako g Mary mat am wo chehgam g

Elisabed. Sh hegam Elisabed ch Zacaria am kih mash am hema kihhim ka'akwulk ch ed am Judea chekshani ch ed. Tsh am jiwia Mary ha-kih am k ab ha-ihm.

⁴¹Tsh am i kah g Elisabed k ab taht matsh g madaj am si al i banimme eda. Tsh g Hekia S-ap'ekam Gewdag ab si i mah g gewdag. ⁴²Kush hekaj si s-hehgam hab kajj ab wui g Mary, “Neh, ab atki si i s-m-ho'ige'el g Jiosh ba'iwechkim mo chum hedai uwi. Kutki wo mahsi m-amjed hegai mash ab mahks g si ge'e s-ap'ekam. ⁴³Kuptki d wo je'ejk hegai mat d wo ge t-kownalig. Kuni si s-ap ni-tahtk mapt ia'i ni-chehgam. ⁴⁴Neh. am at si i banimme g ni-mad mant am i m-kah mapt ab ni-ihm. K heg hekaj am ni-chehgid g Jiosh mo ab si s-m-ho'ige'id. ⁴⁵Woho at hab wo e juh hegai mo ab m-chehgid g Jiosh. K d si ge'e ho'ige'idalg mapt ab i s-wohoch.” Neh, bash kajj g Elisabed.

Matsh g Mary ab i hehgchul g Jiosh

⁴⁶Kush g Mary hab kajj:

“Ab ani si hehgchulid g Jiosh

⁴⁷ch si s-ap ni-tahtk mo d ni-do'ibiakam.

⁴⁸⁻⁴⁹ Dani wabsh sho'igkam.

Kut eda ab si has i ni-elid k si ge'e ha'ichu ab hab ni-juni g si ge'e e-gewkdagkaj.

T Hab i'ajed chum hekid hab wo chei g hemajkam imhab a'ahidag oidam mat ab si i s-ni-ho'ige'el g Jiosh.

Do si hekia s-ap'ekam g Jiosh

⁵⁰ch eda ia'i a'ahidag himdam oidch si pihk e elid ab wehs

ha wui hegam mo ab si has i elid.

- ⁵¹ T am wo chehgi g si ge'e e-gewkdag k wo has gewito hegam mo si e hahaschud
- ⁵²⁻⁵³ k wo ha wohppo'i g kokownal g ha-gewdag k g s-kakais s-ha-kaisdag gam hu hab wo i juh k wabshaba g sho'igkam ab has wo i ha elid k heg ab wo i ha mah mo haschu i s-kehgaj ha wehhejed.
- ⁵⁴⁻⁵⁵ Neh, bash wa am ha ahgid g t-shohshonbad ged hu i Abraham amjed matsh id am hab wo e juh.

Ab o i t-wehmt g Jiosh ahchim mach ab d ha-amjedkam k ab wehs t-wui si pihk e elid i'ajed chum hekid."

⁵⁶ Neh, bash hahawa g Mary ch amjed am ha wehm dakahim waik mashad ab ch gam hahawa hih uhpam.

⁵⁷ Tsh am hahawa i e ai. Tsh madt g Elisabed. Kush d cheoj ali. ⁵⁸ Sh g hajunij ch hugidaj an kihkam si s-hehgig wehmaj am i kaiok matsh g Jiosh ab si i s-ho'ige'el.

⁵⁹ Kush am d i gigi'ik tash g ali. Kumtsh wo pahl hikuch mo d ha-himdag. Tsh am e chehm g hemajkam k hab wo chum chehch Zacaria am oidk g ohgaj. ⁶⁰ Kush wabshaba hab kajj g je'ej, "Pi atsh g e-ohg oidk wo chehgigk ch wabshaba hab wo chehgigk John."

⁶¹ Sh hab kajj hegam, "Pi o hedai hab sha'i chehgig g m-hajuni," ⁶² ch amjed ab wabsh i chum kakke g ohgaj mat am wo ha ahgi mas has wo chehch.

⁶³ Sh heg hema ha tahni g o'ohanakud. Mtsh hema mah. Kutsh id an o'oha, "Bo chehgig John". Tsh wehsijj si e totods. ⁶⁴ Kutsh am wa'i hekaj s-ap neok k ab si ihm g Jiosh ch ab si ho'ige'id. ⁶⁵ Tsh wehsijj ab si has el g Jiosh hegam mo an ha wehgaj kih. Tsh gan hu a'ai s-e mai am Judea chekshani ch ed mat has i e juh. ⁶⁶ Ab ash si s-ho'ige'id g Jiosh ihda ali. Kush wehsijj hegam mash am kah am si i oidahim ch hab kajj, "Kus has mahs wo ha'ichuk ihda ali?"

**Matsh ba'ich ah g Zacaria
matsh haschu has wo e juh**

⁶⁷ Kutsh g Hekia S-ap'ekam Gewkdag g si ge'e gewkdag ab i mah g Zacaria. Tsh heg am si s-hewelim neok k gam hu ba'ich ah mat haschu has wo e juh hab kajjch:

⁶⁸ "Ab ant wo si i hehgchul g s-ap'ekam t-kownalig Jiosh.

E o nahtokch mat wo t-do'ibia ahchim mach d hemajkamgaj

⁶⁹ ch atsh hekaj am hema wo i maskogi mat d wo t-do'ibiakamk.

Heg at ab d wo kownal Davidbad amjedkamk ch wo u'ukch g si ge'e gewkdag.

⁷⁰⁻⁷¹ Kekelibad Jiosh ha'ichu i tashogiddam o heki hu am ahgachug matsh g Jiosh wo t-do'ibia ab ha amjed g t-obga ch hegam mo s-t-keh'id.

⁷² Ab at wo i s-t-ho'ige'el g Jiosh mash wa hab masma ha ahgid g t-shohshon.

⁷³⁻⁷⁴ Bash si kaij ab Abrahambad wui mat wo t-do'ibia ab ha amjed g t-obga.
 Tt hab pi hedai wo ehbidad ch ab si s-ap wo ihmud g Jiosh.
⁷⁵ ch wo s-ap'ek am nenaj ed ch am hab wo junihid g s-ap'ekam chum hekid.
⁷⁶⁻⁷⁸ Ihda ni-sulijga at d wo Jiosh ha'ichu i tashogiddamk ch wo ha ahgi g Jiosh hemajkamga mat g Jiosh ab wo s-ha ho'ige'id k gam hu hab wo i juh g pi ap ha-chu'ijig k wo ha do'ibia ab amjed g s-ko'ok ha-namkidadag.
 Kut heg hekaj wo e nahtokchid mat g do'ibiakam am wo i e maskogi.
 Id at am wo i wuhsh Jiosh t amjed k ab wo t-mah g amichudadag.
⁷⁹ hab masma mo g tash ab i chechshshaj ch ab t-mamka g tonlig.
 Ab ach wa hihim t-namkidadag wui mat g Jiosh gam hu hab wo i t-juh heg hekaj pi ap t-chu'ijig.
 Kut wabshaba g t-do'ibiakam ab wo i t-chehgi matt has masma am wo i t-ap'ech Jiosh wui.”
 Neh bash kaij g Zacaria.
⁸⁰ Kutsh si s-gegokim i ge'eda g ali am e tashogid mo am Jiosh tatchui oidch him. Kush am hebai d i himdam, tsh gm hu i e gawulkai tohono jewed ch ed k am ha'ichugkahim ch ab ai mat am i e maskogi Tutuligo ha wui.

Matsh mahsi g Jiosh alidag

An g neid g Matthew 1:18-25

2 Sh am hema d si ge'e lai wehs ha dahm g jejewed ch hab

chehgi Augustus. Sha am hu hebai, tsh id am hab juh g chehanig matsh wehs wo e o'ohan k wo e kuint g hemajkam hehe'ejel e-kihhim ab. ²Id ash d si wehpeg kuintadag. Kush am hema d kownal Syria jewed ch ed hab chehgi Quirinius.

³Tsh am himto g hemajkam ab hehe'ejel e-kihhim wui matsh wo e o'ohan k wo e kuint.

⁴Tsh hegai Joseph mash wa am kih Nazareth t am ch atsh wo hohnt g Mary gam hu hih Bethlehem wui am Judea chekshani ch ed nash pi ab d kownalibad David amjedkam. Sh g Davidbad am d kihkam Bethlehem t am. ⁵Tsh g Mary am oi g Joseph. Sh eda e aihim matsh wo bei g e-mad. ⁶⁻⁷Tsh am dada Bethlehem t am. Sh eda pi am hu ha jeg am koksikud kih ch ed. Tsh heg hekaj am dadhaiwua ha'ichu doakam kih ch ed. Kutsh si e ai. Tsh madt g Mary. Kush heg d wehpegkam ch d cheoj. Kutsh am si i hobino s-moik ikus ch ed k am heg eda woi mo g ha'ichu doakam am e gegosid.

Mash g kahwal ha nuhkuddam ch anghil ab hehghulid hegai ali.

⁸Sh am ha'i dadha g kahwal ha nuhkuddam gam hu jeg ed ch an ha nuhkud g e-shoshoiga. ⁹Tsh ab haha wabsh ha wui e chehgi g anghil ab dahm kahchim t amjed. Kutsh an si i ton ha wehgaj matsh am e chehgi g Jiosh gewkdag. Kutsh wabsh whoho'i e totods.

¹⁰Sh hab hahawa kaij g anghil, “Pi g am wo sha'i e totodsid. Ia ant jiwia mant ha'ichu wo em-ahgi. K id wehs hemajkam d ha wuikam. T wo

si s-ap e tahtkkad ab amjed. ¹¹Idani at am mahsi Davidbad kihhim ed hegai mo d Jiosh si Kehsha mat d wo em-do'ibiakamk ch d wo ge'echu em-kownaligk. ¹²Kumt id ab wo s-mahchk mat am wo wo'ok heg eda mo am e gegosid g ha'ichu doakam ch g s-moik ikuskaj wo e hobinodch.”

¹³Tsh haha wabsh sha'i mu'i anghil ab ha wui i e chehgi wehmaj hegai hema k si ne'e ch ab hehgchulid g Jiosh ch hab kajj.

¹⁴“Ab ach wehsijj hehgchulid g Jiosh an dahm kahchim ch ed. T hegam mo hohho'idachud g Jiosh an jewed dahm wo e do'ibia k wo si s-ap e tahtkkad ab a'ai e wui.”

¹⁵Neh, bash kajj g anghil ch gam hu hahawa i himto dahm kahchim wui.

Sh hab kajj a kahwal ha nuhkuddam ab a'ai e wui, “Oi g wo hihim. Tt wo hihi am Bethlehem wui k am wo nei hegai matsh am hab e juh mo ab i t-ahgid g anghil am wehhejed g Jiosh.”

¹⁶Tsh wa woho am si s-hohtam hihim k am i ha gahghim k ha cheh. Kush woho am wo'o g ali heg eda mo am e gegosid g ha'ichu doakam. ¹⁷Tsh hegam kahwal ha nuhkuddam am hahawa i ahgahi mash has kajj g anghil ab amjed. ¹⁸Tsh wehsijj hegam mash ha kah ab si has i el mo haschu ha ahgid. ¹⁹Kush am si oidahim g Mary ch am wabsh hejel i s-mahch. ²⁰Tsh g kahwal ha nuhkuddam gam hu uhpam hihi ab si hehgchulidch g Jiosh natsh pi wehs nei hegai mo haschu am ha ahgid g anghil.

Matsh am e chehch g Jesus

²¹Kush am d i gigi'ik tash g ali. Kumtsh an pahl hikuch mo d ha-himdag k hab chehch Jesus matsh wa g anghil ia u'apa g ahga mat eda koi wo'iwua.

Matsh am i dagito g Jesus Jiosh wui

²²⁻²⁴Tsh am i e ai g tash matsh g Mary am wo e chehgi mo kegchudas mat hab masma g Mosesbad an o'oha g Jiosh chehanig. Bo chu'ig matsh heg hekaj gohk wo ha kokda g hohhi o g pap-loloma k ab wo iagchul Jiosh wui. K hab ep chu'ig matp d wo cheojk g wehpeg mahsidkam ch ab wo i e dagito Jiosh wui. Tsh heg hekaj am bei g ali k am hihi ge'e cheopi wui ab Jerusalem t ab.

²⁵Sh am hema kih g keli ch hab chehgi Simeon ch ash d si s-ap'ekam ch ab si has elid g Jiosh ch ash ab si nenida mat wo ha do'ibia g Tutuligo. Sh g Hekia S-ap'ekam Gewkdag ab si wehmaj ²⁶ch ash am i tashogi matsh pi wo muh k ab wo ai mat wo nei g Jiosh si Kehsha. ²⁷Neh, tsh am i e ai g tash. Tsh am hahawa i tashogi mat am wo i wah ge'e cheopi ch ed. Kutsh g Joseph ch Mary am u'apa g Jesus matsh am hab wo juni mo has i masma d ha-chehanig. ²⁸Tsh g Simeon an koh g ali k ab si e ho'ige'idahun Jiosh wui hab kajjch.

²⁹“Pegih ia o i s-ap'e, ni-Jioshga. Pt ab haha wo i ni-hiwigi mant wo si s-ap ni-taht k ni-pihhu map hab masma heki hu am ni-ahgid.

³⁰ Neh, ni-wuhpuikaj ani hahawa neid ihda mapt hekaj wo t-do'ibia.

³¹ Kut wehs hemajkam wo s-mai ab amjed

³² nat pi d wo ha-tonligk g nahnko mahs hemajkam ch ab wo si uhgk i ha bei g m-hemajkamga.”

Neh, bash kaj hegai Simeon.

³³Sh g Joseph ch Mary si has e tahtk heg hekaj mo has i kaj ab amjed g ali. ³⁴Sh hab hahawa kaj g Simeon ab ha wui, “Jiosh at wo wa s-em-ho'ige'el,” ch ash hab ep kaj ab je'ej wui, “Neh, ihda ali at g Jiosh am si i kei. Kut mu'i wo t-do'ibia. T wabshaba mu'ijj g t-wehm Tutuligo pi ab hu wo wohochud k im hu hab wo i e juh. Jiosh at ab wo e chehgi t-wui id hekaj ali. T mu'ijj wo s-keh'id ³⁵k hekaj wo mahsko wua g e-chegitoidag. Kut g m-ihbdag wo si s-ko'okkad hab wa'i masma matp hems g is-pahyo ab wo si m-chu'akad m-ihbdag ed.” Neh, bash kaj g Simeon.

³⁶Sh hema g oks am d Jiosh ha'ichu i tashogiddam ch hab chehgig Anna. Sh g ohgajbad hab chehgig Phanuel ch ab d amjedkamaj g Asherbad. Kush g keligaj ihda Anna muh mash eda d haha wabsh i e wehm kihkam wewa'ak a'ahid ab. ³⁷Sh am haha d hejel wi'ikam gigi'ikko gamai gi'ik (84) a'ahid ab. Tash oidam ch chuhug oidam ash am ha'ichug ge'e cheopi t am ch ab si has elid g Jiosh ab wui e ho'ige'idahunch ch hab al he'es ha'ichu ko'a.

³⁸Sh am ha'ichug g ali ch je'ej g Joseph wehm. Kutsh am jiwia hegai

Anna k ash ab ho'ige'elid g Jiosh ch am hahawa wehsijj ha ahgid ab amjed g ali hegam mash hab wa'ap nenida matsh g Jiosh wo ha do'ibia.

Matsh gam hu uhpam hihi Nazareth wui

³⁹Neh, kutsh wehs am hab juh hegai mo an o'ohanas chehanig ch ed k gam hu hahawa uhpam hihi Galilee chekshani wui k am dada e-kih am Nazareth kihhim t am.

⁴⁰Kutsh ab si s-gegokim i ge'elhi g ali k wabsh sha'i ha'ichu s-amichud. Sh g Jiosh pihk elidadag am si e tashogid wehhejed.

Mash eda d wiapo'oge'el g Jesus ch am hih ge'e cheopi wui

⁴¹Wehs ahid ab ash am e wushshad Jerusalem t am matsh wa ha do'ibia g Jiosh g ha-shohshon ab ha amjed g Egypt t am hemajkam. Kush g Jesus jehj chum hekid am hihhim. ⁴²Kush am d i gamai gohk a'ahidag g Jesus. Tsh am i e ai hegai ha-do'ibiadag wuhshda. Tsh am ep hihi bekch g Jesus k am ha'ichugkahim mo he'es i tash am hab e wua.

⁴³Tsh am i kuhgit. Tsh gam hu i e nohnogi uhpam. Tsh eda am wa'i wih g Jesus Jerusalem t am. Sh g jehjij pi mahch mo pi am hu ha wehmaj ⁴⁴nash pi hab elid mash an wa hebai ha wehmaj g hihimdam mash am mu'i e wehm hihim. Kush hekaj hemako tash wa'i chhipia k an chum gahghi ha oidk g e-hajuni ch e-nan'aiipijju. ⁴⁵Sh eda pi am hu ha'ichug. Kutsh oi wa gam hu uhpam hihi Jerusalem wui mat an wo i gahghi.

⁴⁶Kush am d i waik tash. Tsh ged hu hahawa cheh ge'e cheopi ch ed. Kush am dak ch ab ha kaiham g s-chu a'amichuddam ch ab si ha'ichu ha kakke mash am a'aga g Jiosh o'ohana. ⁴⁷Sh idam ab epai ha'ichu kakke. Kush si s-e mamachim neok ch si s-ap ab uhpam i nodgid g ha'ichu ha-kakkei. Sh wehsijj hegam mash kah ab wabsh i haha'adka si has i e tahtk.

⁴⁸Neh, tsh g Joseph ch Mary hab wa'ap si has i e taht am chehgiok. Sh g je'ej hab kajj, "Ni-sulijga, shahchu apt ahgk hab t-juh? Shelkam att nonda g m-ohg wehm pi m-edgidk."

⁴⁹Kush hab kajj ab ha wui, "Chum am wa s-mahch mant hemho wa am wo ha'ichugk ni-ohg Jiosh kih ed." ⁵⁰Sh eda pi sha'i amichud mo haschu ahgch hab kajj.

⁵¹Kutsh gam hu hahawa uhpam hih ha wehm Nazareth wui k ab ha wechokahim. Sh g je'ej pi hekid sha'i pi chegito ihda matsh has e juh. ⁵²Neh, kutsh ab si s-gegokam i ge'ehogatahi g Jesus k ba'ich i edagi g amichudadag k ash am si oid g Jiosh chehanig. Kush ab si s-ho'ige'id g Jiosh. Sh g hemajkam ab si has elid.

Mash g John wehpeg ha mihshmad ch ha pahl wapkon

An g neid g Matthew 3:1-12;

Mark 1:1-8; John 1:19-28

3 ¹⁻²Tsh am hebai i cheka. Kush am daha ihda John mo d Zacariabad alidag am tohono jewed ch ed.

Sh wenog am hema d si uhgchu lai wehs ha dahm g jejewed ch hab

chehig Tiberius. Kush am hema ep d kownal Judea chekshani t am ch hab chehig Pilate. Kush g Herodbad a'alidag hab wa'ap d kokownal. Hema ash hab wa'ap chehig Herod ch ash am d kownal Galilee chekshani ch ed k ch hema hab chehig Philip ch am d kownal Iturea ch ed ch Traconitis ch ed. Sh g Lisaniyas am d kownal Abelene ch ed. Kush ia'i idani hegam am d si u'ugchu ha-papalig g Tutuligo mash hema hab chehig Annas ch hema hab chehig Caiaphas. Tsh g Jiosh ab mah g John g ha'ichu e-ahga mash eda hegai Tiberius am wa'i daha gamai hetasp a'ahid ab.

³Sh g John an wehsko ahgachug g Jiosh ha'ichu ahga anai Jordan akimel wo'oshani ed hab ha ahgch, "Gam g hu wo s-ohhod g pi ap e-chegitoi k wo e pahl wapko. Tsh g Jiosh gam hu hab wo i juh g pi ap em-chu'ijig."

⁴Batsh wa e juh hab masma matki an heki hu o'oha hegai kelibad Jiosh ha'ichu i tashogiddam mash hab chehig Isaiyah. K hab chu'ig g o'ohanaj:

Hema atsh gam hu jeg ed wo ha mihshmad g hemajkam hab kajjch, "Neh, in atsh wo i wuhsh jewed dahm hegai mo d ge kownal wehs ha'ichu dahm.

Kumt heg wehhejed wo i e nako hab sha masma mamt am wo i ap'ech g pad wohg mat am oidk wo i hih g ge'e kownal. ⁵Nat hig pi am wo i e ap'ech g wohg mo hebai pi apkodag mat hekid wo jiwia g ge'e kownal?

Pegih, mt am hab wa'ap wo i ap'ech g e-doakag am e do'ibiak.

⁶T hab wehs wo nei g hemajkam mat has masma wo chum ha do'ibia g Jiosh.” *Isaiah 40:3-5*
Neh, batki masma an o'oha g Isaiaabad.

Kush g John woho hab masma hab e wua. ⁷⁻⁸Tsh mu'i am wui e chehm g hemajkam matsh ab ab wo e pahl wapko. Ha'i idam o pi am hu gawul junimk g pi ap e-chegitoi. Kush hab ha ahg g John, “Hah, ahpim mam pi ap chegitoidag, bamki e elid mamt wo e do'ibia ab amjed g s-ko'ok e-namkidadag heg wabsh hekaj mam ab d Abrahambad amjedkam. Nt wabshaba wo em-ahgi mamt pi woho wo e do'ibia, heg hi wa mamt am wo e chehgi am hab junihidch g s-ap'ekam mamt gam hu s-ohhod g pi ap e-chegitoi. Wehs hegam mat gam hu wo s-ohhod g pi ap e-chegitoi at d wo Jiosh hemajkamgak ch hab masma wo e kuint mo d Abrahambad amjedkam, chum wa g nahnko mahs hemajkam. ⁹Kumt ahpim gam hu wo s-e ohhod hab masma mat g pi kehg bahidkam u'us mamtp pi gam hu wo s-ohhod g pi ap e-chegitoi k pi am hu hab wo junihid g s-ap'ekam.”

¹⁰Kush ha'i g hemajkam ab kakke, “Pegih, tt has hig wo chum t-juh?”

¹¹Kush hab kajj ab ha wui, “Mt am wo i ap'ech g e-chegitoi Jiosh wui k amjed pi wo da'i g e-eniga. Neh, tp hems hema pi wo ha kotonik. Kumt ab wo hema mah. Tp hems hema pi wo ha'ichu chekk.

Mt ab wo mah g ha'ichu hugi.” Neh, bash kajj g John.

¹²Kush ha'i hegam matsh am wui dada k wo e pahl wapko d lial ha kowlantdam am kownal wehhejed ch ash ab kakke, “T-mashchamd, tt ahchim has wo chum masmak?”

¹³Kush hab ha ahg, “Pi amt gamai hu wabsh ba'ich i mu'i wo ha kowlant mo he'ekkia i mohto'is g o'odham.”

¹⁴Kush ha'i d shondal ch ab epai kakke, “Tt ahchim has wo chum masmak?”

Sh hab ha ahg, “Pi g hekid ha'ichu wo sha'i ha wohppo'idad ch pi ab hu hema ha'ichu wo sha'i abch mat pi wo wohok ch ehph mamt wabsh wo s-ap e tahtkk ch ab u'u mam he'ekkia i em-namkid.”

¹⁵Kush g hemajkam pi am hu dodolimad am oidahimch mas hu id d Jiosh si Kehsha matsh wo ha do'ibia.

¹⁶Kush heg hekaj hab kajj g John, “Pi g hab wo ni-elid manis ahni d si ha'ichu. Ab at hema wo i wuhsh ni-oidk mat d wo si ha'ichuk. Ahni ani hi wa em-pahl wapkon. T wabshaba heg ab wo em-mah g Hekia S-ap'ekam Gewkdag k gam hu hab wo i juh pi em-ap'ekam hab sha masma mat g mehi wo mei g sha'i.

¹⁷“Nam hig pi nehlichud g pilkani mamt g mohgaj gam hu wo i gawulkad k wo mehid k g pilkani ged hu wo i ba'iha. Pegih, t hab wa'ap am a'ai wo i ha gawulkai g hemajkam am lodaita ch ed ihda mani em-ahgid k wo ha do'ibia g s-ap'ekam k g pi ap'ekam s-ko'okam wo ha namkid. T g ha namkidadag

pi hekid wo huhug.” ¹⁸Neh, bash kajj g John ch nahnko masma am i chum ha tashogid g hemajkam g s-kehg ha'ichu ahgaj g Jiosh.

¹⁹Sh eda hegai kownal mash hab chehgig Herod ge'e hab junihim g pi ap'ekam ch atsh g e-wehnag ehs g hohnigaj. Sh hab chehgig hegai Herodias. Kush g John ab s-keh'id g kownal ch hab kajj mat pi hab wo chum e juh. ²⁰Tsh g Herod am ba'ich i pi ap ha'ichu hab juh matsh ged hu si kuh g John.

Matsh g Jesus e pahl wako

An g neid g Matthew 3:13-17; Mark 1:9-11

²¹Tsh wabshaba koi e kuh g John k wehs ha pahl wapko hegam matsh am wui e chehm ab s-wohochudch g Jiosh. Tsh g Jesus hab wa'ap am wui jiwia k e pahl wakon k am e ho'ige'idahun. Tsh g dahm kahchim gam i e kuhipi'o. ²²Kutsh g Hekia S-ap'ekam Gewkdag i hud ab ab g Jesus k hab sha mahs mo g hohhi. Sh ab neok g Jiosh ab dahm kahchim t amjed ch hab kajj ab wui g Jesus, “Ahpi ap d si ni-tatchuidch ni-alidag ch am si ni-tatchui oidch hab masma.”

Mash hedai d si shohshonaj g Jesus

An g neid g Matthew 1:1-17

²³Jesus ash am hu d i waikko wehst-mahm a'ahidag matsh eda am i himch g e-chikpan k am i ahgahi g Jiosh ha'ichu ahga. Kush idam d shohshonaj mant g ha-chehgig an wo ha o'oha. Bash masma s-e mahch mo d Josephbad alidag.

Sh g Joseph ab d Heli
amjedkam.

²⁴Kush g Heli ohgbad Matthat.
Sh g Matthat ohgbad d Levi.
Sh g Levi ohgbad d Melchi.
Sh g Melchi ohgbad d Jannai.
Sh g Jannai ohgbad d Joseph.
²⁵Sh g Joseph ohgbad d
Mattathias.
Sh g Mattathias ohgbad d Amos.
Sh g Amos ohgbad d Nahum.
Sh g Nahum ohgbad d Esli.
Sh g Esli ohgbad d Naggai.
²⁶Sh g Naggai ohgbad d Maad.
Sh g Maad ohgbad d Mattathias.
Sh g Mattathias ohgbad d
Semein.
Sh g Semein ohgbad d Josech.
Sh g Josech ohgbad d Joda.
²⁷Sh g Joda ohgbad d Joanan.
Sh g Joanan ohgbad d Resa.
Sh g Resa ohgbad d Zerubbabel.
Sh g Zerubbabel ohgbad d
Shealtiel.
Sh g Shealtiel ohgbad d Neri.
²⁸Sh g Neri ohgbad d Melchi.
Sh g Melchi ohgbad d Addi.
Sh g Addi ohgbad d Cosam.
Sh g Cosam ohgbad d Elmadam.
Sh g Elmadam ohgbad d Er.
²⁹Sh g Er ohgbad d Joshua.
Sh g Joshua ohgbad d Eliezer.
Sh g Eliezer ohgbad d Jorim.
Sh g Jorim ohgbad d Matthat.
Sh g Matthat ohgbad d Levi.
³⁰Sh g Levi ohgbad d Simeon.
Sh g Simeon ohgbad d Judah.
Sh g Judah ohgbad d Joseph.
Sh g Joseph ohgbad d Jonam.
Sh g Jonam ohgbad d Eliakim.
³¹Sh g Eliakim ohgbad d Melea.
Sh g Melea ohgbad d Menna.
Sh g Menna ohgbad d Mattatha.
Sh g Mattatha ohgbad d Nathan.
Sh g Nathan ohgbad d David.

- ³² Sh g David ohgbad d Jesse.
 Sh g Jesse ohgbad d Obed.
 Sh g Obed ohgbad d Boaz.
 Sh g Boaz ohgbad d Shela.
 Sh g Shela ohgbad d Nashon.
- ³³ Sh g Nashon ohgbad d Amminadab.
 Sh g Amminadab ohgbad d Admin.
 Sh g Admin ohgbad d Arni.
 Sh g Arni ohgbad d Hezron.
 Sh g Hezron ohgbad d Perez.
 Sh g Perez ohgbad d Judah.
- ³⁴ Sh g Judah ohgbad d Jacob.
 Sh g Jacob ohgbad d Isaac.
 Sh g Isaac ohgbad d Abraham.
 Sh g Abraham ohgbad d Terah.
 Sh g Terah ohgbad d Nahor.
- ³⁵ Sh g Nahor ohgbad d Serug.
 Sh g Serug ohgbad d Reu.
 Sh g Reu ohgbad d Peleg.
 Sh g Peleg ohgbad d Eber.
 Sh g Eber ohgbad d Shelah.
- ³⁶ Sh g Shelah ohgbad d Cainan.
 Sh g Cainan ohgbad d Arphaxad.
 Sh g Arphaxad ohgbad d Shem.
 Sh g Shem ohgbad d Noah.
 Sh g Noah ohgbad d Lamec.
- ³⁷ Sh g Lamec ohgbad d Methusela.
 Sh g Methusela ohgbad d Enoc.
 Sh g Enoc ohgbad d Jared.
 Sh g Jared ohgbad d Mahalaleel.
 Sh g Mahalaleel ohgbad d Cainan.
- ³⁸ Sh g Cainan ohgbad d Enos.
 Sh g Enos ohgbad d Seth.
 Sh g Seth ohgbad d Adam.
 Sh g Adambad d amjedkamaj g Jiosh.

Mash g Jiawul am chum s-wuimk g Jesus pi ap'ekam ch ed

An g neid g Matthew 4:1-11; Mark 1:12-13

4 Jesus atsh gam hu hih ab amjed g Jordan akimel matsh

hebai e pahl wako. Kush g Hekia S-ap'ekam Gewkdag ab mahkch g si ge'e gewkdag ch hab ahg mat gam hu wo hih am tohono jewed wui. ²Kush am ha'ichugkahim gi'ikko wehst-mahm tash ab. Sh heg oidam g jijawul ha-ge'ejig am chum s-wuimk pi ap'ekam ch ed.

Jesus ash pi ha'ichu ko'a heg oidam ch hekaj bihugim. ³Sh g ge Jiawul ab wui hab kajj, "Bap chum e elid map d Jiosh alidag. Pegih, ab g hig chehani ihda hodai mat wo e pahnnch naptki pi bihugim."

⁴Kush hab kajj g Jesus, "Pi ant hab wo juh. An o hab chu'ig Jiosh o'ohana ed:

Jiosh ne'oki o ba'ich d i si ha'ichu mo hi g ha'ichu hugi. Kut g o'odham hemho ab wo wa s-wohog elidad."

Deuteronomy 8:3

⁵Neh, tsh g Jiawul am hahawa sha'i si s-hohtam wuhpuij tahgio wehs i mahsid g kokownaltalig id dahm jewed ⁶⁻⁷k ab wui hab ep kajj, "Wehs o ab ni-mahks ihda gewkdag ch kaisdag ch d ni-eniga mant wo wa mah mani hedai hab i elid. Kunt wehs ab wo m-mah mapt ab ni-wui wo i gehsh k ab wo has ni-el."

⁸Kush hab kajj g Jesus, "Pi ant hab wo juh. An o hab chu'ig Jiosh o'ohana ed:

Heg amt wa'i Jiosh ab wui wo i gehsh k ab wo ihmud ch heg ab wo wa'i s-wohog elidad."

Deuteronomy 6:13

⁹Kutsh am hahawa wuhpuij tahgio i mahsid hegai ge'e cheopi mo am kehk Jerusalem t ab k hab ahg, "Mapt d wo Jiosh alidagk, pegih, am g i dah'i amjed mo gan

hu si uhgk kihtas. ¹⁰No hig pi an hab chu'ig Jiosh o'ohana ed:

Jiosh at ab wo ha cheha g mu'i anghil mat wo m-nuhkud.

¹¹Kut an hu wo si m-u'ukchid mapt nih g sha'i e-tahtad ab hu wo shul hohodai t ab."

Psalm 91:11-12

¹²Sh hab kajj g Jesus ab wui, "Pi ant wo pip'ich g Jiosh. An o hab chu'ig o'ohanaj ed:

Pi g wo sha'i pip'ichudad g e-kownalig Jiosh."

Deuteronomy 6:16

¹³Kush g Jiawul am hahawa sha dagito g Jesus am i wehs nahnko masma chum s-wuimkk pi ap'ekam ch ed.

Matsh g Jesus am i himch g e-chikpan Galilee chekshani ch ed

An g neid g Matthew 4:12-17; Mark 1:14-15

¹⁴Tsh gam hu hahawa hih g Jesus Galilee chekshani wui. Sh g Hekia S-ap'ekam Gewkdag si ge'e mahkch g gewkdag. Tsh gam hu a'ai s-e mai g ha'ichu ahga ab amjed. ¹⁵Kush am ha mashcham ha e'eda g ha-chechopi. Sh wehsijj ab si has elid g hemajkam.

Mash g Jesus si kih'amkam pi ab hu tatchua

An g neid g Matthew 13:53-58; Mark 6:1-6

¹⁶Kush am him k am hekid. Tsh gam hu hih g Jesus Nazareth kihhim wui mash wa am d si kihkam. Tsh g shahwai am i e ai. Kutsh am i e chehm g hemajkam cheopi ch ed nash pi eda e mihsmdad. Tsh am jiwia g Jesus k am dahiwua hab masma mash wa chum hekid am hab e junihim.

Kumtsh am hiwigi. Tsh am kekiwua matsh wo ne'okchul g Jiosh heki hu o'ohana. ¹⁷Kumtsh ab hema mah g holiwk o'ohana. Sh d o'ohanaj g Isaiaabad. Tsh an ne'okchul mo an hab chu'ig matsh g Jiosh si Kehsha hab wo chei:

¹⁸Jiosh at am i ni-kei mant am wo ha ahgidahid g sho'igkam g s-kehg ha'ichu ahgaj.

K heg hekaj am ni-wehmaj g Hekia S-ap'ekam Gewkdag ch ab ni-mahkch g si ge'e gewkdag.

K ab ni-chehani g Jiosh mant am wo ha ahgidahid g do'ibiadag hegam mo ha'ichukaj e wupulshch ch wo ha nench g pi neneadam k ab wo i ha wuwahas hegam mo ha'ichukaj e kudut

¹⁹k wo ahgachug mat e ai mat g Jiosh wo ha do'ibia g e-hemajkamga. *Isaiah 61:1-2*

²⁰Tsh g Jesus ab i holiwkai g o'ohana k ab uhpam mah g nuhkuddam k am hahawa dahiwua mat ha'ichu hab wo chei. Sh wehsijj ab si kaiham mat has wo chei.

²¹Kutsh am i neok k hab kajj ab ha wui, "Neh, hemu at e ai. Ni ahni hab wua ihda mant am ne'okchul em-wehhejed."

²²Tsh wehsijj ab si has i el no pi si s-ap neok k wabshaba hab kajj, "Aha no hig pi woho d Josephbad alidag?"

²³Sh hab kajj g Jesus, "No hig pi woho mant ab ni-wui hab wo chei hegai hab ha-che'idag mo hab chu'ig, Am g i e maskogid mapt d ge mahkai, k hab ep wo chei, Ia g hu hig hab ep juhni g s-hasig

ha'ichu e-kih am mapsh has masma am hab ge junihim Capernaum kihhim t am.”

²⁴Sh hab ep kajj g Jesus, “Mo wa woho mam pi ab hu has elid g Jiosh ha'ichu i tashogiddam amai mo hebai d i si kihkam. ²⁵Elijabad wehm o'odham ash wa hab masma pi ab hu has elid. Tsh heg hekaj pi am hu hema i wehmt matsh eda pi ha juh waik eda hugkam a'ahid ab. Tsh g bihugig i gei. Mu'ij ash g hehe'ejel wi'ikam u'uwi amai. ²⁶Tsh wabshaba g Jiosh am cheha g Elijabad matsh am wo hih Seraphath kihhim wui am Sidon jewed ch ed k am wo hema i wehmt g hejel wi'ikam uwi amai. ²⁷Kush mu'i kok'o g Tutuligo heg hekaj pi ha doddakam mumkidag mo hab e a'aga 'leprosy'. Tsh eda pi hema sha'i ha doaj hegai kelibad Jiosh ha'ichu i tashogiddam mash hab chehgig Elisha. Sh hema heg hekaj mumku g gawul mahs o'odham ch hab chehgig Naaman ch am kih Syria jewed ch ed. Kutsh heg wa'i doaj g Elishabad.”

²⁸Tsh wehsijj hegam mash am ha'ichug cheopi ch ed si babgat am i kaiok ihda ²⁹k atsh gam si ne'ioipa k am i chewaim g Jesus gam hu jegko. K eda g Nazareth an kehk kawulk t ab. Kutsh am i bei mo am hu hebai ge uhgk i koa g kawulk hab chum ahgk mat amjed wo i da'ich. ³⁰Tsh wabshaba g Jesus am wabsh ha shahgid wuhshani k gam hu hih.

Hema g o'odham mo g jiauwul an u'ukch

An g neid g Mark 1:21-28

³¹Tsh gam hu hahawa hih g Jesus Capernaum wui heg eda

chekshani k am ha mashcha g hemajkam cheopi ch ed mo am d i ha-mihshmda tash. ³²Kutsh wehsijj si has i el kaiok mo has masma ha mashcham no pi si s-e mamachim neok.

³³Sh am hema daha mo g jiauwul an u'ukch. Kush si s-kaidam hihnk ch hab kajj, ³⁴“Gam g hu hihm ahpi Jesus map ab Nazareth t ab d kihkam. A napt hab ahgk ia jiwia mapt wo t-kokda. S-mahch ani map hedai wud. Dap Jiosh si hekia s-ap'ekam kehsha.”

³⁵Tsh g Jesus ab si chehmo g jiauwul k hab kajj, “Pi g shahmuni k ab i wuhshani id amjed o'odham.” Tsh g jiauwul am si wua hegai o'odham wehsijj ha tahgio k ab i wuhsh amjed k pi sha'i ko'okam has juh.

³⁶Kutsh wehsijj ab si has i el g Jesus k hab kajj ab a'ai e wui, “Sha'i si s-gewkdag g ne'okij. Ab o chehani g jiauwul mat ab wo i wuwaha. K wa woho hab e wua.”

³⁷Kutsh wehsko e kah ihda anai hego oidk jejewed.

Matsh g Jesus ha dodaj g mu'i hemajkam

An g neid g Matthew 8:14-17; Mark 1:29-34

³⁸Tsh amjed gam hu hih g Jesus heg kih wui mo hab chehgig Simon. Sh eda g hohnigaj je'e ihda si mumku k ch s-toni iajidch. Kumsh am ahgid g Jesus ab amjed.

³⁹Tsh am him k am i kekiwua heg wo'ikud hugid an k am e ho'ige'idahu. Tsh am ha hekaj ap'et k am i wamig k ha hihidol.

⁴⁰Tsh gam hu hud g tash. Tsh wehsijj hegam mo g ha-naipijju

kok'o g nahnko mahs mumkidagkaj am ha u'apa Jesus wui. Kut wehsijj ab i ha tahtmahim k ha dodaj.

⁴¹Tsh mu'i ab wui i hihi hegam mo g jijawul an ha u'ukch. Sh idam jijawul si hihnk ch hab kajj, "Ahpi ap d Jiosh alidag." Kush ab si s-ha keh'id g Jesus ch gam hu i ha wuwhasid ch pi ha hiwigid mas am hu has wo kajjijid no pi s-mahch idam mo heg d Jiosh si Kehsha.

Matsh g Jesus am ha mihshmad Galilee chekshani ch ed

An g neid g Mark 1:35-39

⁴²Sh am hu hebai wabsh i si'alim, tsh g Jesus gam hu jegko i wuhsh. Tsh am i gahghi g hemajkam k am i chehg k chum pi hiwigi mat wo hih ab ha amjed. ⁴³Kush wabshaba hab kajj ab ha wui, "Hemho wa ant am wo i ahgahi g s-kehg ha'ichu ahga ab amjed g Jiosh kownaltalig an a'ai kihhim ch ed hab wa ehpi nat pi hab ahgk i ni-kei g Jiosh." ⁴⁴Tsh wa woho am i ha mihshmdahi wehsko ha-chechopi ed amai Galilee chekshani ch ed.

Matsh g Jesus ab ha'i i ha wai mat ab si wecho wo e mashchamad

An g neid g Matthew 4:18-22; Mark 1:16-20

5 Sh am hu hebai g Jesus an kehk mo an i koa hegai al kahchki mo hab chehgig Galilee Kahchki. Kutsh g hemajkam ab wabsh i shodbinidahi s-kaimkch g Jiosh ha'ichu ahga. ²Sh neid mo gohk wapalko am wupulshpi shuhdagi ch ed. Tsh g enigakam am ha dagito k ged hu ha wapkon g e-chuchagia. ³Kutsh am i chesh g Jesus hema ha eda idam wapalko.

Sh heg d Simon eniga. Sh hab ahg matsh am wo sha'i nu'ichkwua shuhdagi ch ed. Tsh g Simon hab juh. Tsh ab i dahiwwa g Jesus wahlko ch ed k am ha mashcha g hemajkam.

⁴Tsh am i ha'asa ha'ichu ha ahgid k hab ahg ihda Simon mat am wo i himch g e-wahlko mo am s-juh k shuhdagi k am wo i huduni g e-chuchagia ha wehm g e-wehm chikpandam.

⁵Sh hab kajj g Simon, "T-mashchamd, ge att chuhug sha'i si chikpan k pi ha'ichu sha'i bei. P wabshaba am t-ahgid matt am ep wo i huduni g t-chuchagia. Pegih, tt am hab wo t-juh." ⁶Kutsh wa woho am hihim k am i ha huhuds ge e-chuchagia k atsh sha'i si mu'i waptopi ha ui matsh chum alo e wanikumia g ha-chuchagia.

⁷Kush am ha'i ep chikpan hema wahlko ch ed. Kumtsh idam ab hahawa si ha wai mat am wo i ha wehmt. Tsh wa woho ab i himch g e-wahlko k wehs ha shuhshud g waptopikaj mat chum alo wachkk g ha-wapalko.

⁸Tsh am i nei g Simon mat haschu has i e juh k ab si i gei g e-tohtonkaj Jesus wui k hab wabsh kajj, "Ih, dani wabsh pi ap'ekam o'odham. K pi hab chum mahs maps wo ni-wehmajk ahpi s-ap'ekam ni-kownalig." ⁹Kutsh wehsijj hegam mash wehmaj si e totods neidch mat has e juh. ¹⁰Ha'i hegam wehmaj chikpandam g Peter ash d James ch John ch ash d a'alidaj hegai mash hab chehgig Zebedee.

Sh g Jesus hab kajj ab Simon wui, "Pi g am sha'i has e tahtkkad. I'ajed

apt imhab g o'odham an wo ha u'ud ni-wehhejed.” ¹¹Tsh am wabsh i chum ai g shuhdagi koa idam k am i ha wuwhas g wapalko k wehs ha'ichu am wabsh i dagito k gm hu i oi g Jesus.

Matsh g Jesus hema doaj mash g chuhkugaj wabsh muhkhim

An g neid g Matthew 8:1-4; Mark 1:40-45

¹²Sh am hu hebai g Jesus am hasko kihhim ch ed oimmed. Kush am hema g o'odham wehsko ma'ishch hegai mumkidag mo g chuhkugaj muhkhim. Tsh am jiwia g Jesus. Kutsh heg am i chehg k ab si kupal i gei wui k hab kajj, “Ab g si i s-ni-ho'ige'id k i ni-doajid pej maptp wo tatchuad.”

¹³Tsh g Jesus ab tahtam k hab kajj, “Am o wa s-ap'e. Doajini.” Tsh am ha hekaj i doa.

¹⁴Tsh g Jesus ab chehani k hab kajj, “Pi g am hedai ahgid ab amjed ihda k wabshaba am ha hekaj wo hih pahl wui. T am wo m-chechga k wo wohokamch mapt doa. Pt am hab haha wo juh hegai iagchulida mo wa g Jiosh em-chehani Mosesbad o'ohana ed. T hab wo s-mahchk g hemajkam mapt woho doa.”

¹⁵Tsh amjed gam hu hih hegai o'odham. Kutsh wehsko i e ahgahi ihda matsh g Jesus hab juh. Tsh hekaj mu'i hemajkam am wui hihi mat wo kah g ha'ichu ahgaj k wo e dodaj.

¹⁶Tsh g Jesus am wo ha mihshmad k wo ha dodajid k amjed gam hu hejelko wo him k wo e ho'ige'idahu.

Matsh g Jesus hema doaj mo ab wabsh i s-moik

An g neid g Matthew 9:1-8; Mark 2:1-12

¹⁷Sh am hu hebai ehp mash g Jesus am ha mashcham. Sh

am ha'i dadha g chehanig ha mashchamdand ch hegam mo si oid g chehanig ch hab e a'aga Palasi. Idam atsh ga hu a'aijed am dada ab amjed g Galilee chekshani ch Judea chekshani ch ab Jerusalem kihhim t amjed. Tsh g Jiosh ab si mah g gewkdag g Jesus mat wo ha dodaj g kok'odam.

¹⁸Tsh am ha'i dada g chechoj hema u'adch g pi himidkam. Id ash ab wabsh i s-moik ch am wo'o e-wahkus ed. ¹⁹Kush am i chum s-wahkidamk kih ch ed matsh wo chehgi g Jesus ab si hiwigch mat wo doaj. Sh wabshaba sha'i si s-hemajkamag. Kutsh pi has masma am hu wo i e wahki. Tsh heg hekaj gan hu hahawa i cheshaj kih dahm k am ge maggad g kih ma'ishpadag k amjed ab i huduni g wo'ikudaj am ha shahgid g hemajkam k am woi mash am kehk g Jesus.

²⁰Tsh am i nei g Jesus moki ab si hiwig idam k hab kajj ab wui ihda o'odham, “Ni-nawoj, ab ani s-m-ho'ige'id ch gam hu hab i juh g pi ap m-chu'ijig.”

²¹Kush hegam chehanig ha mashchamdand ch Palasi wabsh hejel hab e ahg, “Ih, sha'i si pi ap neok ihda o'odham hab masma e wepogidch g Jiosh. Heg at wa'i Jiosh wo e nako mat gam hu hab wo i juh g pi ap ha-chu'ijig.”

²²Sh g Jesus s-mahch mo haschu am oidahim ch hab kajj ab ha wui, “Pi g am wo sha'i oidahim manis pi woho edgid g gewkdag mant gam hu hab wo i juh g pi ap ha-chu'ijig. ²³Bam elid mo s-pehegim hab e kajj mat gam hu hab i e juh g pi ap chu'ijigaj no ge hedai s-mahch mas

s-wohom hab e juh. ²⁴Pegih, nt wo em-chehgi mani woho ge gewkdag ch hab wua mani has i kajj ahni Jiosh si Kehsha.” Neh, bash kajj ch hab hahawa kajj heg wui pi himidkam, “I g wamig k am beh'i g e-wahkus k hihm am uhpam.”

²⁵Tsh am ha hekaj i wami hegai o'odham k am bei g e-wahkus k gam hu uhpam hih ab si ihmch g Jiosh. ²⁶Tsh g hemajkam si has i elid k ab ihm g Jiosh hab kajjch, “Sha'i si s-kehg ha'ichu ach neid id tashkaj.”

**Matsh g Jesus ab i wai g Levibad
(Matthew)**

An g neid g Matthew 9:9-13; Mark 2:13-17

²⁷Sh hema d lial kowlantdam g kownal wehhejed ch hab chehgig Levi. Tsh g Jesus am cheh. Kush am daha heg eda kih mo am chikpan.

Sh hab kajj g Jesus ab wui, “Oi g i ni-oid.” ²⁸Tsh g Levi am ha hekaj i wuhshani k am wabsh i dagito wehs ha'ichu k gam hu i oi.

²⁹⁻³⁰Am wa'i mia amjed, tsh g Levi am hab juh g ge'e gegosig am wehhejed g Jesus. Sh am ha'i oiopo g Palasi mash idam ha'i d chehanig ha mashchamdham. Sh eda mu'ijj hegam mash am ha wehm e gegosid d lial kowlantdam hab masma mo g Levi.

Kush hegam Palasi am ha neid ch hekaj s-ha keh'id g Jesus chuchchai hab ha ahgch, “Ih, shahchu am ahgch am ha wehm e gegosid idam pi ap hemajkam, chum hems am ha wehm g lial kowlantdam?”

³¹Sh g Jesus hab kajj ab ha wui, “Idam pi ap hemajkam o s-e do'ibiamk hab masma mat g

kok'odam wo s-e doajidam. Hegam mo hab e elid mo s-ap'e at pi wo tatchua g mahkai. ³²Pi ant hab ahgk ia jiwia manis wo ha do'ibia hegam mo pi e do'ibiamk.”

**Ha-himdag mash he'ekko pi e
gegosid**

An g neid g Matthew 9:14-17; Mark 2:18-22

³³Sh ha'i g hemajkam hab kajj ab wui g Jesus, “Neh, mu'ikko o pi e gegosid ch wabsh e ho'ige'idahun hegam mo ab wecho e mashcham g John ch hegam mo ab ha wecho e mashcham g Palasi. Kuki wabshaba ahpi g m-wohochuddam pi hab e wua.”

³⁴Sh hab kajj g Jesus ab ha wui, “Nat hig pi wo e gegos g wo ha hohntam naipijju mat eda heg am wo ha wehmajk? ³⁵T am wo i e ai mat pi am hu wo ha wehmajk. T am hahawa pi wo e gegos. Pegih, bat wo wa e juh idam ni-naipijju mant hekid pi ia hu wo ha wehmajk.”

³⁶Sh am hahawa chum ha tashogid g Jesus mat g mashchamaj pi ap wo wehnad g ha-himdag ash hab kajj, “Pi at hedai g wechij ikuskaj wo shohsho g hekiuchij lihwa mat wo s-e wia nat pi wo i dahiwua k ba'ich wo i wantsh g hekiuchij. T hab wa'ap pi wo ap'et g hekiuchij nat ge wo wepo mahsk g wechij ikus. ³⁷T pi hedai g wechij nawait am wo toa hekiuchij ha'ichu elidag kokstal ch ed. Tp hab wo sha e juh, t g wechij nawait wo wantsh g ha'ichu elidag. T g nawait wo iawua k g ha'ichu elidag wo e padch. ³⁸Neh, hemho wa at g wechij nawait am wo e toa wechij ha'ichu elidag kokstal ch ed.

³⁹“Pi o hedai tatchua mat wo ih g wechij nawait hekid ab i jehkiok g hekiuchij nawait nat pi hab wo chei mo ba'ich i s-ap hab kahk g hekiuchij.”

Mamsh ab ha abchud mash chikpan mihshmda tash ed

An g neid g Matthew 12:1-8; Mark 2:23-28

6 Sh am hu hebai hihim idam Jesus ha mihshmda tash ed. Kush am eshas g pilkani wohg huhugid an. Sh hegam mash am wehmaj g Jesus ab ha wohni g pilkani ch i mohon g e-nohnhoikaj ch ko'a. ²Sh ha'i g Palasi ha neid ch hab kajj, “Shahchu am ahgch hab wua hegai mo g t-chehanig pi t-hiwgid machs hab wo wuad mihshmda tash ed?”

³Kush hab kajj g Jesus, “Bo wabsh masma hab e wua matsh wa g Davidbad. Pi amtki chegito matsh heg has e juh am i bihugimk. Bo chu'ig g Jiosh o'ohana ⁴matsh am i wah ge'e cheopi ch ed k am ui g pahn k huh hegam ha wehm mash am wehmaj. Kush d hegai pahn mo am e to'aw k ch hegam d wa'i ha wuikam mo d papal. T eda hemho wa am hab e juh. K heg hekaj am wa s-ap'e mat huh.” ⁵Sh hab hahawa ep kajj g Jesus, “Dani Jiosh si Kehsha ch gewkdag am dahm g mihshmda tash.”

Matsh ha doaj g Jesus mihshmda tash ed

An g neid g Matthew 12:1-8; Mark 2:23-28

⁶Sh am hu hebai d ep mihshmda tash. Tsh am i wahp idam Jesus hema cheopi ch ed. Kush g Jesus am ha mashcham g hemajkam. Sh

am hema daha g o'odham mash g s-apkojed nowij mahnikodag. ⁷Sh am ha'i dadha g chehanig ha mashchamdahm ch Palasi ch an wa s-nen'oid nash pi ab ha'ichu s-abchudamk g Jesus ch hekaj an neid mas wo hi wa ha doaj mihshmda tash ch ed.

⁸Sh g Jesus s-mahch mo haschu am chegito ch ash hab kajj heg wui mahnikokam, “Kekiwuani k ab i hihm ia hu ha ba'ich g hemajkam.” Tsh ab i kekiwua.

⁹Sh g Jesus ab hahawa ha kakke ch hab kajj, “Shahchu am ahgch hab elid mo pi hiwigidas mihshmda tash ed mamt wo i ha wehmt hegam mo e sho'igchud? Ab o em-ab mamt wo i ha wehmt g sho'igkam k ep wo ha do'ibia hegam mat am hu wo e ko'ij. Aha namt wabsh wo ha hiwigi mat wo e ko'ij?”

¹⁰Neh, bash kajj ch an hahawa wehsijj i ha neid k hab hahawa kajj ab wui hegai o'odham, “Ab g si i shelin g e-nowi.” Kutsh am wabsh i chum shelin k am wa'i hekaj ap'et. ¹¹Tsh hegam haha'ichu wabsh woho'i babgat matsh ha doaj ha mihshmda tash ab k am ha hekaj i e wehm a'aga mas has wo juh g Jesus.

Matsh g Jesus gamai gohk am i ha chuhcha

An g neid g Matthew 10:1-4; Mark 3:13-19

¹²Tsh am wa'i mia amjed am hu hebai gam hu i chesh g Jesus kawulk dahm k ge chuhug oidam e ho'ige'idahu Jiosh wui. ¹³Kut am i mahsi. Tsh ab hahawa i ha wai hegam mash ab si wecho e mashcham

k g gamai gohk am ha ui mat d wo si chuhchajj. ¹⁴Hema hegam ash d Simon. Kutsh heg hab ep chehch Peter mo hab d ahga 'Hodai.' Kush hema d Andrew ch d si wehngaj g simon. Kush ha'i d James ch John ch Philip ch Bartholomew ¹⁵ch Matthew ch Thomas. Sh hema d hegai James mash g ohgaj hab chehgi g Alphias. Sh hema hab ep chehgi g Simon ch d hema hegam mash tatchua mat g Tutuligo hejel wo himchudad g e-kownaltalig. ¹⁶Sh hema d hegai Judas mash g ohgaj hab chehgi g James. Kush hema d Judas Iscariot ch d hegai matsh wa gagda g Jesus. Neh, idam gamai gohk ash am d hahawa si chuhchajj g Jesus.

Mash g Jesus ha mashcham ch mu'i ha doajid

An g neid g Matthew 4:23-25

¹⁷Tsh ab hahawa i huhud hegam Jesus. Sh mu'i am ep ha'ichug g hemajkam ab amjed g Judea chekshani ch Jerusalem kihhim ch ab amjed g ge shuhdagi hugidag an miabidch g Tyre ch Sidon kihhim. ¹⁸Wehsijj ash s-kaimk g Jesus. Kush ab wui hihim g kok'odam ch hegam mash g jijawul an ha u'ukch. Sh g Jesus ha dodajid ch gam hu hab i ha wua g jijawul. ¹⁹Kush wehsijj ab chum s-tahtmamk g Jesus nash pi g gewkdaj ab wuhshani amjed ch wehs ha doajid.

S-ap tahhadkam ch pi ap tahhadkam

An g neid g Matthew 5:1-12

²⁰Tsh g Jesus ab i ha nei hegam mash ab si hiwig k hab kajj:
 "Mt wo chum si s-ap e tahtkkad ahpim mam ab e sho'igchud Jiosh wui.

Ab at wo i em-wahpki e-kihdag ed.

- ²¹Mt wo chum si s-ap e tahtkkad ahpim mam hemuch chum ha'ichu tatchua.
 B at wo wa em-mah g Jiosh mam haschu i tatchua.
 Mt wo chum si s-ap e tahtkkad ahpim mam shoani hemu no pi ab him g tash mamt wo wa si s-hehgigk.
- ²²T wo s-em-keh'idad g hemajkam ch wo s-em-ohhod ch wo s-ko'okam has em-ahgad ch hab wo chei mam d wabsh pi ap'ekam.
- ²³Mt wabsh wo s-ap e tahtkkad ch wo s-hehgigk id hekaj.
 Bash wa masma e sho'igchud hegam mash d kekelibad Jiosh ha'ichu i tashogiddam ch hekaj bei g Jiosh mahkigdag.
 T g Jiosh hab wa'ap wo em-mah g ge'e s-ap'ekam mo em-wehhejed an nuhkud e-kihdag ed.
- ²⁴T wabshaba wo si pi ap e tahtkkad hegam mo hemu d s-kakais no pi ab heki hu neid g s-e-hehgig.
- ²⁵T wo si pi ap e tahtkkad hegam mo pi ha'ichu tatchua hemuch.
 Ab o him g tash mat wo pi ha'ichu edgidag.
 T wo si pi ap e tahtkkad hegam mo s-e tahhadchud hemuch.
 Ab o him g tash mat wo shoanid.
- ²⁶T wo si pi ap e tahtkkad hegam mo wehs hemajkam ab si has ha elid hemuch.
 Em-shohshon ash hab masma si s-ap has ha ahg hegam mash hab wabsh s-e junimk mo d Jiosh ha'ichu i tashogiddam.

Mamtsh wo pihk e elidad hegam ha wui mo s-em-keh'id

An g neid g Matthew 5:38-48; 7:12a

²⁷“Nt wo em-ahgi mamt has wo masmak am ha wui. Ab g wabsh wo i si pihk e elidad ha wui g e-obga k wabsh g s-ap ha'ichu hab wo ha juni hegam mo s-em-keh'id. ²⁸Idam atp hems wo pi kehg neneokad ab em-wui ch wo em-sho'igchudad. Mt wabshaba wabsh wo si s-hemajimak am ha wui ch wo e ho'ige'idahu am ha wehhejed. ²⁹Tp hems s-ko'okam has wo em-juh. Mt wabshaba ab wabsh wo i s-ha ho'ige'el. Tp hems hema ab wo em-shonihi em-kahm ab. Kumt wabsh wo hiwigi mat aigojed ab ep wo em-shonihi. Tp hems hema wo em-wohppo'i g em-lihwa. Kumt g e-kotoni ep wo mah. ³⁰Tp hems hema ha'ichu wo i em-tai. Kumt wo mah. Kutp hems hema ha'ichu wo bei mo d em-eniga. Kumt pi uhpam wo tai. ³¹Bamt wo ha juhkchid g hemajkam mam has i chum ha elid mat hab wo em-juhkchid.

³²“Pi at wo em-mah g s-ap tahhadkam g Jiosh mamtp hegam ab wo wa'i ha tatchuad mo ab uhpam em-tatchua. Chum o hems g pi ap hemajkam ab ha tatchua hegam mo ab uhpam ha tatchua. ³³Pi at wo em-mah g s-ap tahhadkam g Jiosh mamtp hegam wa'i ha wehhejed hab wo juh g s-ap ha'ichu mo s-ap ha'ichu hab em-junid. Chum o hems g pi ap hemajkam hab wa masma hab e wua. ³⁴Pi at wo em-mah g s-ap tahhadkam g Jiosh mamtp hegam wa'i ha'ichu wo ha hiwigi mam hab

ha elid mat wo wa uhpam em-mah. Chum o hems g pi ap hemajkam hab wa'ap a'ai ha'ichu e hiwgid hab e elidch mat ab uhpam ep wo ui ha'akia mat he'ekia ha hiwigi.

³⁵“Neh, mt ab wo pihk e elidad ha wui g e-obga ch am hab wo ha unidad g s-ap ha'ichu ch wo ha'ichu ha mah mamt pi ab hu uhpam wo ge neidad. Bamt masma am wo e chehgi mam d a'aligaj g Jiosh. T heg mu'i s-kehg ha'ichu ab wo em-mah. Jiosh o hab wa masma s-ha ho'ige'id g pi ap hemajkam ch hegam mo pi ab hu uhpam ho'ige'elid. ³⁶Am g hab wo juhkchid g ho'ige'idadag hab masma mo g em-ohg Jiosh am hab juhkch.

Pi g ab hu wo ha mohto'id g chu'ijig

An g neid g Matthew 7:1-5

³⁷“Pi g am hedai s-ko'okam has wo ahgad o ab wo ha mohto'idad g pi ap'ekam. B at uhpam wo i e nodagi ab em-wui. Gam g hu wabsh wo pi chegito mat hema s-ko'okam has wo em-juh. Kut hab wa masma gam hu wabsh wo pi e chegito mamtp hems hema s-ko'okam has wo juh. ³⁸Ab g wo ha'ichu ha mahkad. T g Jiosh ab ha'ichu wo em-mahkad. Ab amt ba'ich i ge'e wo bei mamt he'es ab i ha mah no pi g Jiosh ba'ich i s-hemajima matp hems g hemajkam. Ab at wo i e nodagi em-wui mamt has i masma ab wo neidad hema.

³⁹“Pi at has masma wo em-wanimedad wohokam ch ed hegai mat hedai pi wo mahchk g wohokam. Heg at wo wa wepok matp hems hema g pi neadam ha'i ep wo i ha wanim g pi neneadam.

Kutp hems wehsijj am wo i shul hiktani ch ed. ⁴⁰S-mahch am mat g ha mashchamdah ha ba'ich wo i chum s-mahchk hegai mo haschu i ha mashcham. E mashchamdah at am hugkam wo chum s-mahchk g e-mashchama am i s-ap nahtok mo hegai mat hedai i ha mashcha.

⁴¹“Pi g am wo si s-nen'oidah g hema chu'ijig. Tp hems ba'ich i ge'ej g hejel em-chu'ijig. T heg wo wa wepok mam g chum ha'ichu ab i s-wuhshdamk wuhij ed mo eda ba'ich i ge'e ha'ichu ab wo'o em-wuhi ed. ⁴²Do iatog mamtp hab wo chei mamt ab wo ha'ichu i wuhshad ha-wuhi ed mo eda ba'ich i ge'e ha'ichu am wo'o em-wuhi ed. Hemho wa amt wehpeg wo i ap'ech g pi e-ap'edag k haha wo e nako mamt ha'i ep wo i ha wehmt k wo i ap'ech g pi ha-ap'edag.

Mas hedai s-wohom d s-ap'ekam

An g neid g Matthew 7:16-20; 12:33-35

⁴³“Mt wo s-mai mas hedai d s-ap'ekam o'odham hab wa masma mamt wo s-mai mas haschu d s-kehg uhs. S-kehg uhs at s-kehg wo bahidagt ch g pi kehg uhs pi kehg wo bahidagt. ⁴⁴Uhs o s-e mahch ab e-bahidag ab. Pi amt ab hu wo ui g suhna ho'i t ab o g uhdwis ab sha'i t ab. ⁴⁵K hab wa'ap masma g o'odham matp wo s-ap'ek ch s-kehg ha'ichu hab wo wuad o wo pi ap'ek ch pi kehg ha'ichu hab wo wuad. Matp has i masma ha'ichu chegito g o'odham, t hab masma wo neokad.”

Mattsh has masma s-wihnam wo shondad g t-doakag

An g neid g Matthew 7:24-27

⁴⁶Sh hab ep kajj g Jesus, “Ha'ijj am chum hekid hab ni-a'aga

‘ni-kownalig’ ch eda pi am hu hab wua mani haschu em-ahgid. ⁴⁷Ab g wo ni-hiwgad ch ab wo s-wohog elidah g ha'ichu ni-ahga. T hab wo s-ap'ek g em-doakag. ⁴⁸Id at heg wo wa wepok matp hems hema wo s-wihnam shondad g e-kihta. T hab pi wo i gei mat hekid wo hewed k juh k wo s-gewkam mel g shuhdagi. Pegih, mt hab wa masma s-wihnam wo gegokkad mo ihda kih mamtp ab wo s-ni-wohog elidah.

⁴⁹“T wabshaba pi wo ap'ek g em-doakag mamtp pi ab hu wo wohog ni-elidah. Id at heg wo wa wepok matp hems hema pi wihnam wo shondad g e-kihta. T ab wo mel g shuhdagi. T ha hekaj wo i gei g kihj k am wabsh wo i e padch. Pegih, t hab wa masma wo i e padch g em-doakag mamtp pi ab hu wo wohog ni-elidah.”

Matsh g Jesus hema doaj ahmoj wehhejed

An g neid g Matthew 8:5-13

7 Neh, tsh am i ha'asa ha'ichu ha mashcha g Jesus amai k gam hu hahawa hih Capernaum wui. Kutsh g chuhchajj am wehmaj hihi.

²⁻³Kush amai am hema d shondal ha-ge'ejig ch ab d ha-kehsha Rome t amjed ch kah ab amjed g Jesus. Sh id pionag hema muhkhim. Kush ab si tatchua g e-pionag ch hekaj ab ha tahni g Tutuligo ha-ge'egedga mat ab wo i wai g Jesus. T wo doaj g piongaj.

⁴Tsh hegam am dada k ab si e sho'igch Jesus wui k hab kajj, “Am g i wehmt ihda o'odham. ⁵Ab o si t-tatchua ahchim Tutuligo ch am hema i kei g cheopi t-wehhejed.”

⁶Kutsh gam hu ha oi g Jesus k am i aih g kihj hegai shondal ha-ge'ejig.

Tsh heg am ha'i ha ahgi g e-naipijju matsh am wo hihim k wo ha'ichu ahgi g Jesus. Kutsh am wui hihim k hab kajj, "Bo kajj g t-nawoj, 'Pi ani am hu hugkam d ha'ichu maps am wo i wah ni-kih ed ⁷o manis hejel am wo hih m-wui. Am apt hab wabsh wo chea. T wo doa g ni-pionag. ⁸S-amichud ani g m-gewkdag no pi g ni-ge'ejig gewkdag am ni-dahm. Ni ahni hab wa'ap gewkdag am ha dahm g ni-shondalig ch ni-pionag. T hab wo juh mant haschu ab wo i ha chea. Ni heg hekaj s-mahch mat am hab wo e juh mapt haschu am hab wabsh wo i chei.' Neh, bo kajj."

⁹Tsh g Jesus ab si has i el ab kaiok ihda. Sh mu'i hemajkam an oidahim. Kush ab ha wui hab kajj, "Pi ani koi hebai sha'i neid mas hema ha'as ge'e ab si ni-hiwig, chum hems am ha shahgid g Tutuligo," k am hahawa ha chea hegam mat ab dada mat g m hu uhpam wo hihi.

¹⁰Tsh am uhpam dada k chum nei. Kutsh doa g piongaj g shondal ha-ge'ejig.

Matsh g Jesus ab i wuhshad g hejel wi'ikam mad ab muhkig t amjed

¹¹Kush am ba'ich d i tash. Tsh gam hu hihi hegam Jesus heg wui kihhim mash d Nain. Kutsh mu'i hemajkam ha oi. ¹²Tsh am wabsh i chum dada mo ab kihjeg g kolhai an wehgaj g kihhim. Sh ab g muhki e u'a. Sh g je'ej g muhki d hejel wi'ikam. K id d si hemako madaj.

Kush mu'i ha wehmaj g hemajkam ab kihhim t amjed.

¹³Kutsh am i nei g Jesus ihda uwi k si pi ap e taht wehhejed k hab wabsh kajj ab wui, "Pi g am shoakad," ¹⁴k ch amjed am him k an taht hegai mo an ab wo'ichug g muhki.

Tsh ha hekaj gegokiwua hegam mo u'a. Kush hab hahawa kajj g Jesus, "Wechij o'odham, ab g i wamigi."

¹⁵Tsh am ha hekaj i dahiwua ihda o'odham k ab ha hekaj wabsh neok. Tsh g Jesus am wamgid k hab ah mat gam hu wo i oi g e-je'e.

¹⁶Kutsh wehsijj si e totodsid k ab si ihm g Jiosh ch hab kajj, "Ia atki hema jiwia t-shahgid g Jiosh ha'ichu i tashogiddam," ch ha'i hab ep kajj, "Jiosh atki ia jiwia t-shahgid mat wo t-do'ibia mattp hedai d hemajkamgaj." ¹⁷Kutsh ihda mat haschu has e juh an wehsko e a'aga Judea chekshani oidk ch an wehgaj.

Mamtsh has masma wo s-amich g Jiosh si Kehsha

An g neid g Matthew 11:2-19

¹⁸Sh eda ged hu e kuhpach hegai John mash am ha pahl wapkonahim g hemajkam. Kush am ahgid hegam mash ab si wecho e mashchamahim mash haschu has junihim g Jesus. Tsh heg gohk ab i ha waid ¹⁹k am ha cheha mat am wo hihim k ab wo kakke g Jesus mas wa woho d Jiosh si Kehsha aha nat ab hahawa hema wo i wuhsh mat d wo hegaik?

²⁰Tsh idam am dada Jesus wui k hab kajj, "Ab o t-chehani g John matt ab wo m-kakke maps woho d

Jiosh si Kehsha aha nat ab hahawa hema wo i wuhsh mat d wo hegaik?"

²¹Tsh g Jesus heg i tashkaj mu'i ha dodaj g kok'odam k mu'i ha wuwhas g jijawul ab ha amjed hegam mo an ha u'ukch k ha-nench g pi neneadam. Kush heg wehs neid idam John chuhchai. ²²Sh hab hahawa ha ahg g Jesus, "Am g uhpam wo hihim k wo ahgi g John mam haschu i neid ch haschu i kah. Ha ani dodajid g pi ha dodajidam kok'odam ch pi neneadam ch pi hihimidkam ch pi chechkaidkam ch ha chehegitoichud g ko'i ch am ha ahgid g sho'igkam mat g Jiosh wo ha do'ibia. ²³T g Jiosh ab wo s-em-ho'ige'idam mamtp hedai ab wabsh wo ni-hiwgad ch pi wo ni-dagito."

²⁴Tsh am i gam hu hihi hegam John chuhchai. Sh g Jesus am ha'ichu ha ahgid g hemajkam ab amjed g John ch hab kajj, "Neh, am amt wa hihim k ab kaiha g John. K wa eda am oimmelhim pi apkokam jewed ch ed. Kumt pi woho am hu wo i wuwha wui matp d wabsh s-pehegi o'odham ch am gawul wo wuad g e-ne'oki. Pi o an a'ai e wanchkwua g John. ²⁵Kumt pi hema s-neidam mo s-kakaisim e enigadadch. Hegam mo hab masma e enigadadch o si s-kakaisim kih. ²⁶Neh, heg amt s-kaim Jiosh ha'ichu i tashogiddam k heg wa woho kah. K g John am ba'ich ha'ichu k ed ep kehk ²⁷no pi d hegai mo ab amjed an o'ohanas mo g Jiosh hab ahg ch hab kajj:

Am ant hema wo i maskogi
mat am wo i ha ap'ech g

hemajkam am wehhejed g si ni-Kehsha jiwhiadag am jewed dahm. *Malachi 3:1*

Neh, bash kajj g Jiosh.

²⁸"Kunt wo em-ahgi mo g John wehs hemajkam ha ba'ich d i si ha'ichu am hugkam mat am i wuhsh g Jiosh kownaltalig id dahm jewed. T hahawa chum hems g si pi ha'ichukam hemajkam am Jiosh kownaltalig ed ba'ich d wo i s-has ha'ichuk mo hegai John."

²⁹Neh, bash kajj g Jesus. Kutsh wehs ab kaiha hegam mat ab s-wohog el g Jiosh k am e pahl wapko ab John wecho, chum hems hegam mo g lial ha kowlant g kownal wehhejed. ³⁰Tsh wabshaba pi ab hu wohog el g Jiosh tatchui pi e pahl wapkonk hegam mo d Palasi ch hegam mo d chehanig ha mashchamdam.

³¹Kush heg hekaj hab kajj g Jesus, "Bo masma pi ta wepoma mo g a'al hegam mat pi ab hu wohog el g John k pi ab hu ni-bei. ³²Neh, tp hems am wo chichwid g a'al ch hab wo chei, 'Am att em-gehged g e hohontam ha-piastakaj. Kumt pi e waila. Am att nei g mukhi ne'i. Kumt pi sha'i shoshani.'

³³"Id ani hab ahg mat g John ab i wuhshani k pi ih'e g nawait ch mu'ikko pi e gegosid ab e ho'ige'idahunch Jiosh wui. K mu'ijj hab kajj mo g jiauwul an u'ukch g chegitoidaj. ³⁴Nt ahni ia jiwia Jiosh si Kehsha k wabsh chum hedai ha wehm ni-gegosid. K mu'ijj hab kajj mani s-banma ch s-i'idag ch d ha-nawoj g s-ta keke'idamakam lial ha kowlantdam ch hegam mo pi ap oid g t-shohshon ha-chehanig.

Neh, bo masma pi ta wepoma ³⁵ch im hu hab wabsh i juh g Jiosh amichudadag. K wabshaba hegam mo ab s-wohochud am chehgidch mo d wohokam.”

Matsh g Jesus am e gegos heg kih am Palasi mash hab chehgidch Simon

³⁶Tsh hema g Palasi ab i wai g Jesus mat am wo wehmaj e gegos. Tsh am hih g Jesus kihj wui k am i dahiwua mat wo e gegos.

³⁷Kush eda am hema d uwi heg eda kihhim ch si pi ap d hemajkam.

Sh am dak ch e gegosid g Jesus.

³⁸Tsh id am jiwia k am wehgaj i kekiwua am u'adch g s-ap uhv shuhdagi al s-toa hodai ha'a ch ed. Sh eda am e shelinch g Jesus mo hab masma dadhaiwup ch e gegosid. K si shoak ihda uwi. Kush g oh'ogaj an iawua tahtadaj an. Kutsh an i dagio g che'echev e-mo'okaj k an si ha chintad k an hahawa iawua ga s-ap uhv shuhdagi tahtadaj ab.

³⁹Kush hab wabsh hejel e ahg hegai kihkam, “T wo chum s-mahchk mo si pi ap d uwi ihda matp woho d wo Jiosh ha'ichu i tashogiddamk ch pi wo hiwigi mas an wo taht.”

⁴⁰Sh g Jesus wabsh s-mahch mo hab masma oidahim ch ab wui hab kajj, “Simon, ab ant wo ha'ichu m-ahgi.”

Sh heg hab kajj, “Oi g ab ni-ahgid, ha mashchamd.”

⁴¹Kutsh g Jesus am ahgi ihda ha'ichu wepogida e-ahga k hab kajj, “Matp hema ab wo e wulshch g hetasp siant pihsh heg ab mo g lial ha hiwgid ch hema ab ab wo

e wulshch g hetaspo wehst-mahm pihsh ⁴²k pi wo e nako mat wo uhpam namkid. Kut im hu hab wo i juh g ha-wulshpadag. Neh, t hedai idam ba'ich ab wo i si tatchua?”

⁴³Sh hab kajj g Simon, “Na'as hegai mamt ba'ich i mu'i im hu hab i juh g wulshpadaj.”

Sh hab kajj g Jesus, “Pegih, ⁴⁴ab g neid ihda uwi. Ia ant jiwia m-kih am. Kupt pi ni-mah g shuhdagi mant wo i wapko g ni-tahtad. T wabshaba ihda am i wapko g ni-tahtad g e-oh'ogkaj k am i ha dagio g che'echev e-mo'okaj. ⁴⁵Pi apt ab hu ni-chintad mant ia jiwia. K wabshaba id g ni-tahtad chintad. ⁴⁶Pi apt ab hu i huhu g ni-mo'o. T wabshaba id g uhv shuhdagi an iawua ni-tahtad an. ⁴⁷Neh, nt hab wo chei mat am ge'e chehgi mo ab si ni-tatchua. T heg am wohokamch mat g mu'i pi ap chu'ijigaj im hu hab i e juh. Hegai mam hedai pi sha'i ge'e im hu hab i wua g ha-chu'ijig o pi sha'i ge'e am hu chehgid g e-tatchuidag.”

⁴⁸Sh hab hahawa kajj g Jesus heg wui uwi, “Im ant hu hab i juh g pi ap m-chu'ijig.”

⁴⁹K hegam ha'i mo ab dadha mihsa wui hab kajj ab a'ai e wui, “K hedai e elid ihda ch im hu hab i chum wua g pi ap ha-chu'ijig?”

⁵⁰Sh hab kajj g Jesus id wui uwi, “Ab ap ni-hiwig ch hekaj e do'ibia. Gamai g s-ap e tahtk kihm.”

Hegam u'uwi mash an wehmaj g Jesus

8 Sh amjed am hu hebai, tsh g Jesus am hih ha oidk g kihhim k am ahgahim g s-kehg ha'ichu ahga

ab amjed g Jiosh kownaltalig. Kush hegam gamai gohk chuhchaj am wehmaj. ²Kutsh mu'i am ha oi g u'uwi. Idam atsh wa ha dodaj g Jesus. Kush am ha'ichukaj i ha wehmt. Hema idam ash d Mary Magdalene. Id atsh g Jesus ab amjed i ha wuwahas g wewa'ak jijawul. ³Kush hema d Joanna. Sh g wehmaj kihkam ihda hab chehgig Chusa ch d ha'ichu am kownal wecho. Kush hema ehp d Susanna. Tsh idam u'uwi wo em-nolawt hegai mash haschu i tatchua hegam Jesus.

Ha'ichu wepogida ahga ab amjed g ha'ichu eshdam

An g neid g Matthew 13:1-9; Mark 4:1-9

⁴Kutsh mu'i hemajkam ab hihi Jesus wui ga hu a'ai kihhim amjed. Tsh am ha ahgi g Jesus ihda wepogida ahga:

⁵“Nt wo ha'ichu em-mashcha ab amjed g Jiosh kownaltalig wepogidch mat hema an ei g ha'ichu e-kaichka e-oidag ed. T ha'i gan hu wabsh shul wohg ch ed. T g hemajkam am keish k g u'uwihg am huh. ⁶T ha'i gan hu shul mo pi ge'ej g jewed ab waw t ab. T ab i chum wuhsh g e'es k wabsh gaksh no pi pi wadag amai. ⁷T ha'i gan hu shul g kaichkaj sha'i ch ed. T heg am wabsh wehnadk i ge'ege k ha kokda g esha. ⁸T wabshaba hegam mat an s-ap shul moihuna ch ed an wuhshani k siant ab kait hehemako.” Sh hab hahawa ep kaj g Jesus, “Neh, am g wo i a'amichud ahpim mam kah ihda.”

Mash haschu ahgch g Jesus g wepogida ahgakaj ha mashcham

An g neid g Matthew 13:10-17; Mark 4:10-12

⁹Kush g Jesus chuhchai ab kakke mas has d ahga ihda wepogida ahga.

¹⁰Sh hab kaj g Jesus, “Nt wo em-ahgi mo has d ahga no pi g Jiosh em-hiwgid mamt wo s-mai hegai mo haschu hemu am maskogid ab amjed g e-kownaltalig. Ni wabshaba heg wa'i ha ahgid ha'ichu wepogida ahga hegam mo pi ab hu wohochudamk. T hab pi wo amich ha'ichu ab amjed g Jiosh kownaltalig, chum as wo ha'ichu neid k wo ha'ichu kah.”

Mash g Jiosh ha'ichu ahgdam hab masma mo g ha'ichu eshdam

An g neid g Matthew 13:18-23; Mark 4:13-20

¹¹Kush hab ep kaj g Jesus, “Neh, nt wo em-tashogi ihda ha'ichu wepogida ni-ahga. Jiosh ha'ichu ahga o wepogidas mo g ha'ichu kai ch am wo e gantad hemajkam ha-i'ibdag ed. ¹²K eda ha'i g ha-i'ibdag s-kawpk hab masma mo g wohg. K g Jiawul am wabsh s-pehegi ha wohppo'id hegai mo haschu i kah. T hab pi ab hu wo wohoch g Jiosh ha'ichu ahga k pi wo e do'ibia.

¹³“K ha'i g ha-i'ibdag hab sha masma mo hebai pi ge'ej g jewed ab waw t ab. T idam wo si s-hohho'i g Jiosh ha'ichu ahga ab kaiok k wabshaba pi wihnam ab hu wo bebhe k ch ab hi wa al he'es wo s-wohochudad. T ab wabsh wo i chum hih g a'appema. T ha hekaj wabsh wo ta'i i shul.

¹⁴“K ha'i g ha-i'ibdag hab sha masma mo hebai s-sha'ig no pi e sha'ijidch heg hekaj kudutadag ch s-kaisdag ch s-tahhadkam. Kut pi ha'ichu hab wo juh am Jiosh wehhejed.

¹⁵“K ha'i g ha-i'ibdag s-moik hab masma mo g moihuna. Kut ab wo

kaiha g Jiosh ha'ichu ahga k am wo si i nuhkud e-ihbdag ed k am wo e nako mat am hab ha'ichu wo juh Jiosh wehhejed.

Mamt pi am hu wo ehsto g wohokam

An g neid g Mark 4:21-25

¹⁶“Wohokam o wepogidas mo g lahmpa tonlig. Namt hig wo ehsto g lahmpa ab mehidd aha namt an wo dai mat hebai wo em-tonlidch. Pegih, mt hab wa masma pi wo chum ehsto g wohokam. ¹⁷Wehs at wo s-e mai matp haschu chum e ehstokch. T haschu wo i chum e ma'ishchid wo e chehg k am wo i e wuhshad.

¹⁸“Am g wo s-amichud mam haschu i kah. Hegam mat s-ap wo hekaj g e-ap'ledag at ba'ich ep wo i nei. T wabshaba hegam mat pi ap wo hekaj wabsh wo heb hu wua.”

Mash g je'ej ch wepngaj s-neidamk g Jesus

An g neid g Matthew 12:46-50; Mark 3:31-35

¹⁹Tsh am chum dada g Jesus je'e ch wepngaj. Sh wabshaba si mu'ij g hemajkam an wehgaj. Kutsh pi e nako matsh ab wo miabi.

²⁰Sh hema hab kaij ab wui g Jesus, “M-je'e ch m-wepnag o am gegok jeg ed s-m-neidamkch.”

²¹Sh hab ahg g Jesus, “Neh, idam mo ab ni-kaiham ch ab s-wohog elid g Jiosh ha'ichu ahga o heg wa wepo mo d ni-je'e ch ni-wepnag.”

Matsh g Jesus dodolimach g hewel ch shuhdagi to'otonk

An g neid g Matthew 8:23-27; Mark 4:35-41

²²Sh am hu hebai hab ha ahg g Jesus g e-chuhchai, “Am att hu hig

shuhdagi aigojed wo i chehchsh.”

Tsh wa woho am dadhaiwua wahlko ch ed k am gahi i shul.

²³Sh am hebai him g wahlko shuhdagi ch ed. Tsh g Jesus am i wo'iwua k koi. Kutsh g hewel ab haha wabsh i meh. Tsh ab i to'otonkai g shuhdagi k am iawua wahlko ch ed mash s-ta ehbidam hab mahs ha wehhejed.

²⁴Kutsh g chuhchaij am wui dada g Jesus k am wuhan k hab kaij, “T-mashchamd, ttiki wo t-ko'ij.”

Tsh am i wami g Jesus k ab si cheha g hewel ch shuhdagi to'otonk. Tsh am i wehs ha'asa k gam hu wabsh i pi shahmuni. ²⁵Sh hab hahawa kaij ab ha wui, “Ab g wabsh wo ni-hiwgad.”

Kutsh eda si has i elid k si s-ehbeni k ash hab kaij ab a'ai e wui, “Kus hedai wud ihda o'odham ch ab si chehani g hewel ch to'otonk mat wo ha'asa. K ab s-wohog elid.”

Matsh g Jesus gam hu hab i ha juh g jijawul ab amjed g hema cheoj

An g neid g Matthew 8:28-34; Mark 5:1-20

²⁶Tsh am hihim k gam hu dada ga hu aigojed g Galilee shuhdagi heg maibidch kihhim mash d Geresa.

²⁷Kush am hema oimmed g cheoj jeg ed ch am chum kih heg eda kihhim. Sh wabshaba g jijawul an u'ukch g chegitoidaj. Kush gan hu wabsh kih mash an chehchog ch an e hihashp g ko'i.

Kutsh ab i hud g Jesus. ²⁸Tsh id am chehg k si s-kaidam hihnk ch ab i meh pi ha'ichu enigadadch mash hab wa chu'ig k ab wui i gehsh k si s-kaidam hab kaij, “Jesus, alidaj g

si uhgk Jiosh, gam g hu hihm k pi ko'okam has ni-juhni." ²⁹Bash kajj nash pi g Jesus ab si ha chehani g jijawul mat ab wo i wuwha amjed.

Kush wa eda g jijawul mu'ikko an bebhe ihda. Kumsh gd hu chum si kukpadch ch g kakhioj ch nohnhoij g e hukshchim wapainomikaj gan hu si wupulshp. Kush wabsh ha wanikumiak g e hukshchim wapainomi. Tsh g jiawul gam hu wo i wushshad tohono jewed ch ed.

³⁰Sh hab kajj g Jesus ab wui, "Shahp chehgig?"

Sh hab kajj, "Bani chehgig Mu'ichu," nash pi mu'i jijawul an u'ukch. ³¹Tsh g jijawul ab si e sho'igch Jesus wui matsh pi am hu wo ha shul Jiawul kih ed.

³²Sh eda mu'i an oiopo g kokji kawulk bahsho ch e gegosid. Sh idam jijawul ab si tahni g Jesus matsh am wo ha dagito. Tsh am wo i wahp ha eda idam kokji. Tsh am ha hiwigi g Jesus. ³³Tsh ab i wuwha ab amjed g o'odham k am i wahp ha eda g kokji. Kutsh wehsijj idam kokji am agshp i wohp k gam hu shul shuhdagi ch ed k wachkk.

³⁴Tsh hegam mo am ha nuhkud gam hu uhpam wohp k am ahgahim ihda kihhim ch ed ch an ha oidk hegam mo an o'oidag.

³⁵Tsh g hemajkam am himto mat wo nei mat haschu has e juh. Kush ihda o'odham am daha Jesus wui ch ab e enigadadch ch wabsh si s-ap ha'ichu chegito. Kutsh wabsh woho'i e totods.

³⁶Kush hegam mash neid am ha ahgid mat has masma e doaj ihda o'odham. ³⁷Kush wehsijj idam Geresa t am hemajkam ab ahgid

g Jesus mat gam hu wo hih ab ha amjed natsh pi sha'i si s-ehbeni. Tsh wa woho hab e juh k an dahiwua wahlko ch ed mat gam hu wo hih.

³⁸Kutsh hegai o'odham matsh ab i wuwha g jijawul amjed ab si e sho'igch Jesus wui k hab kajj, "Nt wo m-oi."

K wabshaba g Jesus hab ahg, ³⁹"Uhpam g hihm k am wo i ha ahgidahi mat haschu hab juh g Jiosh m-wehhejed."

Tsh wa woho hab e juh k am i ahgahi kihhim oidk matsh haschu si ge'e hab juh g Jesus am wehhejed.

Matsh hema uhpam chegitoich g chehia muhki g Jesus

An g neid g Matthew 9:18-26; Mark 5:21-43

⁴⁰Tsh ga hu aigojed hahawa ep dada hegam Jesus. Kush mu'i hemajkam am nenida ch si s-ap i e taht k ab i nei.

⁴¹⁻⁴²Tsh am hema jiwia g o'odham k hab chehgig Jairus ch wabsh d ha'ichu am cheopi ch ed. Sh id chehiaga muhkhim ch d gamai gohk a'ahidag. Kutsh ab wecho si i gei g Jesus k ab ahgid matsh gam hu wo oi kihj wui. Tsh gam hu chum wehmaj hih g Jesus.

Tsh g hemajkam am wabsh kawod him k gan hu wabsh i biha. ⁴³Kush eda am hema ha'ichug g uwi ch gamai gohk a'ahidag mumku heg hekaj mo g eh'edaj jegwoni. Tsh pi hedai e nako mas wo doaj, chum as wehs hugio g e-lialiga ha namkidch g mamakai. ⁴⁴Kutsh ab i hih Jesus wehgaj k an taht g kahbaj hugidag. Kutsh am wabsh si ha'asa g eh'ed jegwoni.

⁴⁵Sh hab kajj g Jesus, “Doht an ni-taht.” Tsh pi hedai am hu e ah.

Sh hab hahawa kajj g Peter, “T-mashchamd, an o m-bihagch g hemajkam ch ab m-shodbinch.”

⁴⁶Sh wabshaba hab kajj g Jesus, “Ab at hema ni-taht. Ni s-mahch nat pi ab i wuhsh g gewkdag ab ni-amjed.”

⁴⁷Tsh am i nei hegai uwi mamt s-mai k ab hahawa i him k si gigiwek ch ab i gei Jesus wecho amai hemajkam ha tahgio k ash am ahgid g Jesus mat haschu ahgk ab taht k has masma ha hekaj doa.

⁴⁸Sh hab kajj g Jesus ab wui, “Pegih, ni-uwiga, am apt wa doa napt pi ab i ni-hiw. Gamai g s-ap e tahtk hihm k am wabsh s-doakad.”

⁴⁹Kush hab wabsh kia kajj ihda g Jesus. Tsh ab hema mel ab kihj amjed g Jairus k ash hab kajj, “Muh at g m-chehiaga. Kupt pi am hu ep wo kudu g ha mashchamd.”

⁵⁰Kutsh kah g Jesus k hab kajj ab wui g Jairus, “Pi g am sha'i e todsid. Ab g wabsh i ni-hiwig. Kut wabsh wo e chegito.”

⁵¹Kutsh ged hu dada kihj am. Tsh hegam wa'i ha ui g Jesus Peter ch James ch John ch hegam jehjij g chehia. Tsh am e wehm i wahp. ⁵²Kush eda wehsijj shoani ch pi ap e tahtk wehhejed g chehia. Kush hab kajj g Jesus, “Pi g am wo shoanid. Heg o wa wepo ni-wehhejed mo wabsh kohsh g chehia.”

⁵³Kush wabsh has ahg hegam nash pi si s-mahch mat muh. ⁵⁴Tsh wabshaba g Jesus ab bei nowij ab k ab si neok wui ch hab kajj, “I wamigi, chehia.” ⁵⁵Kutsh uhpam

e chegito k ha hekaj i wami. Sh g Jesus am ha chehani mat wo ha'ichu mah. T wo huh. ⁵⁶Tsh hegam jehjij am wabsh e totods matsh e chegito. Sh g Jesus am ha ahgid mat pi hedai wo ha ahgi mat haschu has e juh.

Matsh g Jesus chuhchai gam hu ahgachug g ha'ichu ahgaj

An g neid g Matthew 10:5-15; Mark 6:7-13

9 Am hu hebai, tsh am i ha wai g Jesus g e-chuhchai. Tsh am wui i e hemapai. Kutsh ab ha mah g gewkdag mat gam hu wo i ha wuwahas g jijawul ab ha amjed hegam mo an ha u'ukch k wo ha dodaj g kok'odam ²k am hahawa ha cheha mat am wo i ahgahi ab amjed g Jiosh kownaltalig. ³Pi atsh koi hihi, sh hab ha ahg, “Gm amt wabsh wo i hihim k pi ha'ichu wo u'uk, chum hems pi g cheowikud nih g limoshan kostal nih g ha'ichu hugi nih g lial nih chum hems hema ep lihwa. ⁴Am amt wo dadkkad heg kih am mat hedai i si s-ap ab wo i em-nei am hugkam mamt hekid wo i hihi ab amjed hegai kihhim. ⁵Kutp hebai pi ap ab hu wo i em-nei g hemajkam, mt am wo dagito hegai kihhim k ab wo si shahmud g e-shuhshk mamt wo ha chehgi mamt wo ha dagito k pi wo ha ahgi ab amjed g Jiosh.”

⁶Tsh wa woho am hihi idam chuhchaj ha oidk g kihhim k am ahgahim g Jiosh ha'ichu ahga ch ha doajid g hemajkam wehsko.

Matsh g kownal Herod am wabsh i pi e amich

An g neid g Matthew 14:1-12; Mark 6:14-29

⁷Sh eda g Herod am wabsh kia d kownal Galilee ch ed ch am i kah

wehs ihda mash haschu has e wua. Am amsh wehsko a'aga mas hedai wud ihda Jesus. Ha'ijj ash hab kajj, "Doki hegai Johnbad mo wa ha pahl wapkonahim. Heg amt mua. Kutki wabshaba uhpam e chegito."

⁸Kush ha'ijj hab kajj, "Doki Elijabad o hema ep hegam kekelibad Jiosh ha'ichu i tashogiddam."

Kutsh wa g Herod am i pi e amichud ⁹k hab kajj, "Am ant wa ha cheha mat an e hikuch g John mo'o. Kus hedai wud ihda o'odham mani mu'i ha'ichu kah ab amjed?" bash kajj ch wabsh am chum i e nakog mat wo nei g Jesus.

Matsh g Jesus ha gegos g hetasp mihl chechoj ch mu'i ehp

An g neid g Matthew 14:13-21;

Mark 6:30-44; John 6:1-14

¹⁰Tsh am hu hebai am i uhpam dada g Jesus chuhchai k am ahgid g Jesus wehs ha'ichu mat haschu has i juh. Tsh gm hu hahawa i ha ui matsh gam hu hejelko hasko hihi maibidch hegai kihhim mo hab chehgig Bethsaida. ¹¹Tsh am i kah g hemajkam k am i ha oi s-neidamk g Jesus. Tsh g Jesus si s-ap ab i ha neid k am ha ahgi ab amjed g Jiosh kownaltalig k ha dodaj g kok'odam.

¹²Kutsh gam hu i juh. Tsh g chuhchaij am dada wui k hab kajj, "Am g ha chehani g hemajkam mat am wo hihi kihhim wui o am hasko o'oidag wui k wo bei g ha'ichu hugi k an hasko wo kohk heg hekaj mo ia hu wabsh si heb hu iia."

¹³Sh wabshaba hab kajj g Jesus ab ha wui, "Ahpim amt wo ha'ichu ha mah mat wo huh."

Sh hab kajj idam, "Heg ach wa'i hetasp pahn ch gohk waptopi edgid. Aha nap tatchua matt am wo hihim k wo ha nolawt g ha'ichu hugi ha wehhejed idam mu'i hemajkam?"

¹⁴Kush eda sha'i mu'ij g hemajkam mash hetasp mihl d chechoj.

Sh hab kajj g Jesus, "Hab g wo ha ahgid g hemajkam mat wo dadhaiwua hehetaspo wepst-mahm e wehm."

¹⁵Tsh wa woho hab e juh g chuhchaij. Kutsh wehsijj am i dadhaiwua.

¹⁶Tsh g Jesus am ha ui hegam hetasp pahn ch gohk waptopi k ab i nea dahm kahchim wui k ab ho'ige'el g Jiosh k am hahawa hahain k ab ha mah g e-chuhchai. Tsh idam ab i ha mahkhi g hemajkam. ¹⁷Tsh wehsijj e gegosid k kokwod. Tsh g chuhchaij an i u'ihi g ha wihipi'idag g hemajkam ahim matsh wo shuhshud g gamai gohk hoha.

Matsh g Peter am ah mo hedai wud g Jesus

An g neid g Matthew 16:13-19; Mark 8:27-29

¹⁸Sh am hu hebai am hejelko e ho'ige'idahun g Jesus. Tsh am wui dada g chuhchaij. Kutsh am ha'asa e ho'ige'idahun k hab kajj, "Doh'o ni-elid g hemajkam?"

¹⁹Sh hab kajj hegam, "Ha'ijj o hab kajj map d ha-wap kondam, Johnbad. K ha'ijj hab kajj map d Elijabad. K ha'ijj hab ep kajj map d hema ehp hegam kekelibad Jiosh ha'ichu i tashogiddam ch ia uhpam e chegito."

²⁰Sh hab kajj ab ha wui, "Kum ahpim hedai ni-elid?"

Sh hab kajj g Peter, “Bach m-elid map d Jiosh si Kehsha!”

Mash g Jesus am ha ahgid matsh wo e sho'igchud k wo e muhkid

An g neid g Matthew 16:21-28; Mark 8:31-9:1

²¹Sh hab kajj, “Dani ahni. Kumt wabshaba pi hedai wo sha'i ahgi hemu mani hedai wud. ²²Wehpeg at hemho wo wa ni-bei g ge'eged ch u'ugchu papal ch chehanig em-mashchamdam ahni Jiosh si Kehsha k mu'i wo ni-sho'igchud k am wo i ni-dagito mant wo ni-muhkid. Nt wabshaba uhpam wo i wuhsh muhkig amjed heg eda waik tash amjed mamt wo ni-mua.”

²³Sh hab hahawa ep kajj ab wehsijj ha wui, “Mamtp am wo s-oidam g ni-himdag k hemho wa gam hu wo dagito g hejel e-tatchui k ahni ni-tatchui hab wo junihid ni-wehhejed e sho'igchudch. Heg at wo wa wepok mam ab mohto g kots ch ab ab wo e muhkid. ²⁴Pi amt wo heki wua g e-doakag mamtp wo hekaj am ni-wehhejed. Heg at wo heki wua g e-doakag matp hedai wo chum s-da'ad.

²⁵“Pi at ha'ichu wehhejed wo s-kehgajk matp g o'odham wehs wo bei hegai mo haschu i tatchua id dahm jewed k wabshaba pi wo e do'ibia. ²⁶Pi g am wo si e elidad ni-hekaj ahni Jiosh si Kehsha ch hekaj g ni-mashchamadag. Nt ahni hab wa'ap pi wo si ni-elidad em-hekaj mant hekid ia ep wo jiwia. Idani at si s-tondam ab wo e chehgi g ni-gewkdag ch ni-ohg gewkdag ch ha-gewkdag g s-ap'ekam anghil. ²⁷Neh, ia am ha'i ha'ichug mamt ho'ip kia nei g Jiosh kownaltalig k

haha wo ko'ok. Am g wo s-chegitok mani id am em-ahgid.”

Matsh am gawul i e chehgi g Jesus ha wui

An g neid g Matthew 17:1-8; Mark 9:2-8

²⁸Sh am hu d i hemako domig amjed mash hab kajj ihda. Kutsh g Jesus gan hu wo e ho'ige'idahu uhgk do'ag t ab k ab i ha wai hegam Peter ch John ch James matsh gan hu wehmaj wo i chehchsh.

Kutsh gan hu dada heg dahm do'ag. ²⁹Tsh am i e ho'ige'idahu g Jesus k atsh am gawul i e juh. Tsh g wehschugaj hab e juh mash si s-tondam s-tohta. ³⁰Tsh haha wabsh am wehmaj i e chehgi g Mosesbad ch Elijabad. ³¹Kush g Jiosh gewkdag ab ha ab e chehgid hab masma mo g tonlig. Sh idam am wehmaj a'aga g Jesus matsh pi sha'i tash amjed am hab wo e juh hegai matsh haschu g Jiosh am ap'ech matsh wo muh am Jerusalem t am.

³²Sh eda hegam Peter sha'i si gewpkog ch s-kohksim ch wabshaba ab si i nehnea k nei g Jesus ch hegam gohk o'odham mash am wehmaj gegok. ³³Tsh gam hu wo hihi hegam gohk. Tsh g Peter wabsh kohsh k da'iwuni k hab kajj, “T-mashchamdam, s-ap'e oki mach ia ha'ichug. Tt ia waik hab wo em-juni g al chechopi matt hekaj ab wo si has em-el ahpi ch Mosesbad ch Elijabad.”

³⁴Tsh g chewagi ab i wuhsh mash eda wabsh kia neok g Peter k ab ehka ha dahm. Kutsh si s-ehbeni hegam Peter matsh ab i hud g chewagi.

³⁵Tsh g Jiosh ne'oki ab kaida chewagi t amjed k hab kajj, “Jesus o d si ni-tatchuidch ni-alidag. Heg amt ab wo si kaihamad.”

³⁶Sh am hahawa hejel kehk g Jesus. Kush pi am hu ha'ichug hegam gohk.

Sh hegam Peter pi hedai sha'i ha'ichu ahgid ia'i idani hegai mash haschu i neid.

**Matsh g Jesus gam hu hab i juh g
jiawul ab amjed g ali**

An g neid g Matthew 17:14-18; Mark 9:14-27

³⁷Sh am ba'ich d i tash. Tsh ab hahawa i huhud do'ag t amjed. Kush sha'i mu'i hemajkam am nenida g Jesus ch ab nam.

³⁸Kush hema si s-kaidam neok ch hab kajj, “Ha mashchamdand, id o d wa'i ni-alidag m ia kehk. ³⁹K g jiawul an bebhe ch am si hihnk ch am i wuhpa jewedo. K g totshagi i chechshshaj chinij ab. S-ko'okam o has wua g jiawul ch chum alo pi dadagitosh. ⁴⁰Kuni ab wa chum si ha ahgid g m-pionag mat gam hu hab wo i juh. T wabshaba pi e nako.”

⁴¹Sh hab kajj g Jesus ab ha wui g e-chuhchai, “Sho'o wa'i pi ge'ej g em-wohochudadag. M im hu hab wabsh i si e juhkch ab ni-amjed. Shahag wepo mant hemho wa tash ia wo em-wehmajkad ch ab wo em-nakogad mat hekaj wo i ge'eda.” Bash kajj ch am hahawa ahgi hegai o'odham, “Ab g i beka'i g e-alidag.”

⁴²Sh ab chum him g ali. Sh haha wabsh ep i wua hegai jiawul am jewedo. Kush am si banimmed. Tsh g Jesus ab si s-keh'el g jiawul k i wuhshad k am hahawa bei g al k ab i wanim ohgaj wui.

⁴³Kutsh wehsijj si e totods g hemajkam mat g Jiosh hab masma am i chehgi g e-gewkddag k ab si has elid wehs hegai mo g Jesus hab junihim.

**Mash g Jesus am ep ha ahgid ab
amjed g e-muhkig**

An g neid g Matthew 17:22-23; Mark 9:30-32

Sh g Jesus hab kajj ab ha wui g e-chuhchai, ⁴⁴“Am g wo s-chegitok ihda mant am wo em-ahgi. E o aihim mat g s-ni-keh'iddam an wo ni-bei ahni Jiosh si Kehsha k am wo ni-gagda ha wui g haha'ichu.”

⁴⁵Kush pi sha'i amichud mas haschu hab ahg ch wabshaba s-ehbid mas ab wo kakke.

**Matsh hedai d wo si ha'ichuk am
Jiosh nena ed**

An g neid g Matthew 18:1-5; Mark 9:33-37

⁴⁶Sh am hu hebai am e ne'owin hegam Jesus chuhchai mas hedai d wo si ha'ichuk. ⁴⁷Kush g Jesus s-ha amichud mo haschu am chegito ch heg hekaj g al ali ab i kei e-hugid an ⁴⁸k ash hab kajj ab ha wui, “Hegai mat hedai am ni-wehhejed s-ap ab wo neidad g al ali ch hab wa'ap s-ap ab ni-neid. Kutp hedai s-ap ab wo ni-neidad ch hab wa'ap s-ap ab neid g Jiosh nani pi d Kehshaj. Hegai mo hedai i si pi e ha'ichuchud am em-shahgid o d si ha'ichu.”

**Mash ab t-wehmaj hegai matp hedai
pi ab hu t-wui kehk**

An g neid g Mark 9:38-40

⁴⁹Sh am hu hebai g John hab kajj, “T-mashchamdand, hema ach neid g o'odham. K heg am m-chehcheg ch gam hu hab i ha wua g jijawul ab

ha amjed hegam mo an ha u'ukch. Kuch hab ahg mat wo ha'asa no pi pi am hu t-wehmaj."

⁵⁰Kush hab kajj g Jesus ab ha wui, "Pi g am wo sha'i shohbid. Tki wo i em-wehmt hegai matp hedai pi ab hu em-wui kehk."

**Mamtsh s-ohhod g Jesus
am hema kihhim t am
Samaria chekshani ch ed**

⁵¹Kush s-mahch g Jesus mo e aihim mat g Jiosh am wo uhpam i bei e-kihdag wui ch heg hekaj am i e shelch mat am wo hih Jerusalem wui k am wo i e nako. ⁵²Sh am hihimad ch am hema miabid g kihhim Samaria chekshani ch ed. Kutsh g Jesus am ha'i ha cheha g e-chuhchai matsh ha ba'ich wo hihim k wo bei g koksikud ch ha'ichu hugi. Kutsh idam ha e juh.

⁵³Tsh wabshaba am i s-mai hegam hemajkam mash d gam hu himdam g Jesus Jerusalem wui k heg hekaj pi hohho'i mat am wo jiwia nash pi pi ha hohho'id g Jerusalem t am hemajkam.

⁵⁴Kutsh hekid g James ch John am i s-mai mo pi hohho'id k hab kajj, "T-kownalig, nap tatchua matt ab wo i tai g Jiosh. T ab wo i huduni g mei k wo ha kokda?"

⁵⁵Sh g Jesus si s-gewkam ha shohbid. ⁵⁶Tsh amjed gam hu hahawa hihi hema ep kihhim wui.

Mash s-hasig mamt wo oidad g Jesus

An g neid g Matthew 8:19-22

⁵⁷Sh am hu hebai hihim. Kush hema g o'odham hab kajj ab Jesus wui, "Ni-nahtokch ani ahni mant wo i m-oid k wo i m-wehmt."

⁵⁸Sh hab kajj g Jesus ab wui, "Napt hig wo e nako? Neh, chum o hems g gagso ge wahpagga ch g u'uwihig ge koksh. Ni wabshaba ahni Jiosh si Kehsha pi sha'i ha kih ia jewed dahm. K heg hekaj s-hasig maps wo ni-oidad."

⁵⁹Sh hab ep kajj g Jesus ab hema wui g o'odham, "Oi g ni-oid."

Kush wabshaba hab kajj, "Heu'u, ni-kownalig. T ho'ipki hekid muh g ni-ohg. Nt wo hiashpok haha wo m-oi."

⁶⁰Sh hab kajj g Jesus, "Am g ha hiwigid hegam mo pi u'ukch g wechij doakag mat wo ha hiash g ko'i. Pt ahpi hi am wo him k wo i ahgahi ab amjed g Jiosh kownaltalig."

⁶¹Sh hema hab ep kajj g o'odham, "Ni-kownalig, am ant wo i m-oid k wabshaba wehpeg wo hih uhpam k an wehs wo i ha neidok g ni-hajuni."

⁶²Sh hab kajj g Jesus ab wui, "Neh, nat hig shelinim wo moihunad hegai mat hedai am uhpam wo nea amai mo hebaijed him? Pegih, t hab wa masma pi ha'ichu wehhejed wo s-kehgajk am Jiosh kownaltalig ed hegai mat am uhpam wo nea."

**Matsh g Jesus am ha cheha
g wewa'akko gamai gohk
matsh wo ha mihshmad**

10 Tsh amjed g Jesus am ha'i ep i ha chuhcha wewa'akko gamai gohk matsh go'ogok e wehm wo ahgahi g ha'ichu ahgaj am ha oidch hegam kihhim matsh hebai ap'ech matsh am epai wo hih. ²Sh hab kajj g Jesus ab ha wui, "Neh, mu'ij o hegam mo e nahtokch mat wo e do'ibia. Kuch eda pi mu'ij

ahchim mach am ha ahgidahim g do'ibiadag ahga. Id o heg wa wepo mat hebai g ha-hihka wo si ge'e'jk. T g ha-pionag pi wo mu'ijk. Ab g wo si tahnid g Jiosh mat mu'i wo i ha chuhcha mat am wo ha ahgidahid g s-kehg ha'ichu ahgaj ch ab wo i ha ba'ihamad hegam mo e nahtokch.

³“Neh, bat masma wo s-ta ehbidamak g hemajkam am em-wehhejed mat g shesh'e am ha wehhejed g kahwal mahmad. ⁴Mt wabshaba pi ha'ichukaj wo e kudut k pi ha'ichu wo u'ad nih g ha'ichu eniga nih chum hems g lial. Jiosh at hab wo ha juh g hemajkam mat wo em-dagio'i. Am amt wo s-e hohtmagi kihhim wui k pi hedai wo hiwigi mas wo em-shohbi wohg ch ed.

⁵“Kumt hebai wo dada ha-kih am k am hab wo chei, ‘Jiosh o ab em-makiog g s-ap tahhadkam.’ ⁶⁻⁷Kut s-ap ab wo i em-nei matp ab wo s-em-wohoch k ab wo i em-wahpki mamt am wo dadkkad. Kumt pi has wo elid k am wo dadkkad ch wo e gegosidad ch an wo i ha ahgidahid g s-kehg ha'ichu ahgaj g Jiosh am hugkam mamt gam hu wo hihi ab amjed hegai kihhim. Chikpandam o ab d wuikam mat ab wo bei g e-nam-kidadag. K idam d ha wuikam mat am hab wo juh. Pi amt inhas wo wahpkid k am wo dadkkad am hugkam mamt ep wo ba'ich hihi. ⁸Kut hebai g hemajkam s-ap ab wo i em-nei kihhim ch ed, mt wo huh mat haschu wo i em-gegos ⁹k wo ha doaj g kok'odam k wo ha ahgi g hemajkam mat ab i ha miabi g Jiosh kownaltalig.

¹⁰“Kut hebai pi ap ab hu wo i em-nei g hemajkam, mt am wo i wuwaha kahya ch ed ¹¹k ab wo si i shahmud g e-shuhshk k hab wo chei, ‘Id att hekaj am wo em-chehg matt wo em-dagito. Mt wabshaba wo s-chegitok mat ab i chum em-miabi g Jiosh kownaltalig.’

¹²Neh, hegam si pi ap'ekam hemajkam mash wa am kihkahim Sodom kihhim ch ed at wo bei g s-ko'ok e-namkidadag mat hekid wo e ai g ge'e lodaita tash. T wabshaba ba'ich wo i s-ko'okam e namkid hegam mat pi ab hu wo em-kaiha.

Mash si s-ta ehbidama mamt pi ab hu wo wohoch g Jesus

An g neid g Matthew 11:20-24

¹³⁻¹⁴“Mu'i s-hasig ha'ichu ant am hab juh Korasin ch Bethsaida kihhim ch ed. Kutki eda g hemajkam amai pi ab hu ni-wohoch. T heg hekaj ab wo bei g s-ko'ok e-namkidadag ge'e lodaita tash ch ed. Hegam mo am kih Tyre ch Sidon kihhim t am ch pi ge'e mahch ab amjed g Jiosh at pi am hu hugkam wo bei g s-ko'ok e-namkidadag. Tp hems ab wo i e sho'igchud k gam hu wo s-ohhod g pi ap e-chegitoi matp wo nei ihda s-hasig ha'ichu. ¹⁵Capernaum t am hemajkam o ab si e haschud. T wabshaba g Jiosh gam hu wo i ha shul jiauwul kih ed.”

¹⁶Sh hab ep kajj ab e-chuhchai ha wui, “Heg o wa wepo mo ahni ab ni-kaiham hegai matp hedai ab wo em-kaiha. Kut ahni s-ni-ohhod matp hedai wo s-em-ohhod. Kutp hedai wo s-ni-ohhod k hab wa'ap s-ohhod g Jiosh nani pi d kehshaj.”

**Matsh uhpam ep dada hegam
wewa'akko gamai gohk**

¹⁷Tsh woho gam hu hihi hegam wewa'akko gamai gohk. Tsh am hebai i cheka. Tsh am i uhpam dada k sha'i si s-hehgig ch hab kajib, "T-kownalig, chum hems g jijawul ab s-t-wohog elid mach am m-chechcheg ch ab si ha chehani mat gam hu hab wo i e juh."

¹⁸"Heu'u, nat pi hegai mo d ha-ge'ejig ch d Satan heb hu wua g e-gewkdag," bash kajib g Jesus, "Neid ani mat ab i gei Jiosh kihdag amjed hab sha masma mat g wepgi. ¹⁹Neh, ab ant em-mah g gewkdag mamt wo e nako mamt am wabsh wo ha keish g kokh'oi ch nanakshel ch wehs g gewkdag g ge Jiawul. Kut pi wo sha'i s-ko'okam em-juh. ²⁰Mt wabshaba pi heg hekaj wo s-hehgigk mo g jijawul ab s-em-wohog elid. Heg amt hekaj wo s-hehgigk mo gan hu o'ohanas g em-chechig Jiosh kihdag an mam d e do'ibiakam."

**Mash g Jiosh ab ha mahkch g
amichudadag hegam mo ab hiwig g
Jesus**

An gan neid g Matthew 11:25-27; 13:16-17

²¹Kutsh ia'i idani g Hekia S-ap'ekam Gewkdag ab mah g Jesus g si ge'e s-hehgig. Kush am e ho'ige'idahun ch hab kajib, "Ni-ohg Jiosh, dap kownal wehs ha'ichu dahm. K hab d m-elida mat pi hedai wo e nako mas hejel wo s-amich g ha'ichu m-ahga. E o ehstokch ab ha amjed g s-chu a'amichuddam. Kup wabshaba am ha chehgid idam mo ha'ichu s-mahchimk hab

masma mo g a'al. Ni heg hekaj ab si m-ho'ige'id."

²²Neh, bash kajib g Jesus ch am hahawa ha ahgid g hemajkam, "Ni-ohg Jiosh at ab ni-mah wehs ha'ichu. Pi o hedai ni-mahch ch hegai wa'i ni-ohg s-ni-mahch. K pi hedai mahch g ni-ohg. Ni ahni wa'i s-mahch ch hegam ehp mani hedai i wui tashogid."

²³Tsh am hahawa i e hejelko hegam Jesus. Kush hab ha ahg, "Do si s-ap tahhadkam mam am neid ch kah ihda mam haschu i neid ch kah. ²⁴Mu'ijj g kekelibad Jiosh ha'ichu i tashogiddam ch kokownalbad o wa chum s-neidamk hegai mam haschu i neid ch chum s-kaimk mam haschu i kah."

**Matp hedai am wo i ha
wehmajk ch d wo ha nawojk**

²⁵Tsh am hu hebai am hema jiwia g chehanig ha mashchamdak wabsh chum heki s-himchudam g Jesus hab kajib, "Ha mashchamdak, shahnt wo ni-juh. T hekaj ab wo i ni-wahki g Jiosh e-kihdag ed?"

²⁶Kush hab kajib g Jesus ab wui, "Nap hig pi mahch mo has chu'ig an Jiosh o'ohana ed heg amjed."

²⁷Sh hab kajib hegai o'odham, "Heu'u. Bo chu'ig:

Matt hemho wa ab wo si pihk t-elidad t-kownalig Jiosh wui wehs t-ihbdagkaj ch id am wo chehgidch wehs t-doakagkaj ch wehs t-gewkdagkaj ch wehs t-chegitoidagkaj.

Deuteronomy 6:5

K hab ep chu'ig:

Matt hemho wa ab wo si pihk t-elidad t-nawojk wui hab

masma mach has i masma
hejel t-wehhejed si pihk
t-elid.” *Leviticus 19:18*

²⁸Sh hab kajj g Jesus, “Heg o wud.
Kut s-ap ab wo i m-wahki maptp
heg am hab wo junihid.”

²⁹Kush ihda o'odham s-mahch
mo pi am hu hab junihim hegai
chehanig ch wabshaba gam hu
wabsh chum s-e oanamk ch ash
ab kakke g Jesus, “K hedai d
ni-nawoj?”

³⁰Sh g Jesus am ahgid ihda
ha'ichu wepogida ahga, “Neh,
matp hems am hema hih g t-wehm
Tuhligo Jerusalem t amjed gam
hu Jerico wui. T am haha wabsh
g s-chu e'eskam am cheggia k ehs
g ha'ichu enigaj k gewichkwua k
chum alo mua. ³¹K am wo'o.

“T ab haha wabsh g pahl hema hih
wohg oidch k nei mo am wo'o ihda
o'odham k gam hu wabsh mehk him
k an bij. ³²T hab wa masma g papal
ha wehm chikpandam ab hema him
k am nei hegai o'odham mo am wo'o
k gam hu wabsh bijim k gam hu hih.

³³T g hema Samaria t am o'odham
am hahawa him k cheh ihda
o'odham. Kum ab a'ai s-e keh'id g
Samaria t am hemajkam ha wehm. T
eda ihda si s-ho'ige'id ³⁴k ab i wako g
eh'ed g nawaitkaj k ab i huhud k an
i hobino g ikuskaj k an hahawa dai
e-shoiga an k gam hu i bei kihhim
wui mat am hebai wo ha nuhkudach.

³⁵“K am ba'ich d i tash. T gam hu
wo hih ihda o'odham k wabshaba
ab ha'i ha mah g lial mat wo
nuhkud k hab ha ah, ‘Am g wo
nuhkud. Kunt ia ep wo jiwia k wo
wa em-namkid mamt haschu ba'ich
wo i heki gei wehhejed.’

³⁶“Neh, kup hedai hab elid idam
waik mo s-ap d nawojij hegai mamt
gewichkwua?”

³⁷Sh hab kajj hegai chehanig
ha mashchamdam, “Hegai mo
s-ho'ige'id.”

Sh hab kajj g Jesus, “Pegih, gamai g
hihm k am hab e junihid hab masma.”

**Mamtsch pi wabsh wo chikpanidad g
Jesus ch wabshaba ab ep wo ihm ad**

³⁸Sh amjed am hebai hihim idam
Jesus ch am dada hema kihhim t
am. Sh am hema g uwi hab chehgig
Marda ch ab i ha wahpki e-kih ed.

³⁹Kush am wehmaj daha g wehngaj
ch hab chehgig Mary ch id ab i
dahiwua Jesus wui k ab si kaiham
g ha'ichu mashchamaj.

⁴⁰Sh eda g Marda si chikpan ch e
kudut k am jiwia Jesus wui k hab
kajj, “Ni-kownalig, nap pi sha'i has
elid mat g ni-wehnag am wabsh i
ni-dagito mant hejel hab wo juh g
chikpan. Ab g ahgid mat ab wo i
him k wo i ni-wehmt.”

⁴¹Sh hab kajj g Jesus ab wui, “Ih,
Marda, mu'i ap ha'ichukaj e kudut.

⁴²K eda am d wa'i hemako ha'ichu
mo d si ha'ichu. Id at g Mary ab bei.
Kut pi wo sha'i e wohppo'idach.”

**Mo haschu g Jesus ha mashcham ab
amjed g ho'ige'idahun a**

An g neid g Matthew 6:9-13; 7:7-11

11 Sh am hu hebai e
ho'ige'idahun g Jesus ch
am i kuhgit. Sh hema hab kajj g
chuhchaj ab wui, “T-kownalig, oi
g hig t-mashcham matt has masma
wo t-ho'ige'idahu hab masma mo
wa g John ha mashcham hegam mo
ab si wecho e mashcham.”

²Sh hab kaj g Jesus ab ha wui, "Id amt hab wo chei am e ho'ige'idahunch:

Jiosh t-ohg, ab ach si has m-elid ch si ha'ichuchud g m-chehgig ch tatchua mapt wo i ge'edaj g e-kownaltalig ia t-shahgid.

³Ab g i s-t-ho'ige'id k ab wo t-mahkad g ha'ichu hugi wehs tashkaj.

⁴Gam g hu hab i juhni g pi ap t-chu'ijig nach pi ahchim gam hu pi chechegitod g ha-chu'ijig hegam mat hedai i pi ap has chu'i ab t-wui.

Pi g am hiwgid g Jiawul mas am wo t-shul pi ap'ekam ch ed."

⁵⁻⁶Sh hab ep kaj g Jesus ab ha wui hegam mo ab si wecho e mashcham, "Neh, tp hems hema pi am hu ge'e wo ha'ichu hugik. T am hema mehkjed wo jiwia hudunk ab mat ab i chehgim. Kut am wo hih g kihkam e-hugid am kihkam wui k ab wo ha'i tai g sismo mat wo gegos g e-nawoj.

⁷"T hab haha wabsh wo chum chei g hugidaj am kihkam, 'Pi g ia hu ni-kudut. Heki ant hu ab yahwidad g ni-kihjeg. Kutt heki hu wohpiwua g t-a'aliga ha wehm. Nt pi wo i wamig k wo m-mah ha'ichu.'

⁸"T wabshaba pi has wo e elid k ab wabsh wo kia tahnid. T am haha wo i wamig k ab wo mah nat pi pi ha'asa ab wo tahnid.

⁹⁻¹⁰"Pegih, mt ahpim hab wa masma pi ha'asa ab wo tahnid g Jiosh mam haschu i tatchua. T ab wo em-mah. Am g wo ha'ichu i e gahgidad. T wo em-chehgi. Ab g wo shontpag g kihjeg. T ab wo i e kuhpi'o em-wehhejed.

¹¹"Neh, s-mahch am mat pi hedai wabsh g wamad ab wo mah g e-alidag mat g watopi ab wo tai.

¹²Kut pi wabsh g nakshel ab wo mah mat g chuchul nonha ab wo tai. ¹³Mam has i masma pi ap'e ch wabshaba s-mahch mamt g s-kehg ha'ichu ab wo ha mah g e-a'aliga. No hig pi g em-ohg Jiosh ba'ich i e nahtokch mat ab wo ha mah g Hekia S-ap'ekam Gewkdag hegam mat ab wo tai."

Mash g Jesus g Jiawul wehm ab a'ai e cheggia

An g neid g Matthew 12:22-30; Mark 3:20-27

¹⁴Sh am hu hebai hema pi ha neok g cheoj nash pi g jiawul an u'ukch. Kutsh g Jesus gam hu hab i juh g jiawul. Tsh am ha hekaj i neo. Tsh g hemajkam si has i el. ¹⁵Sh eda ha'i hab kaj, "Moki g jijawul ha-ge'ejig ab mahkch g gewkdag. K heg hekaj gam hu hab i ha wua g jijawul ab ha amjed hegam mo an ha u'ukch." ¹⁶Sh ha'ijig wabsh chum heki s-himchudamk g Jesus ch ab chehani mat g s-hasig ha'ichu hab wo juh k hekaj am wo ha chehgi mo ab Jiosh t amjed.

¹⁷Sh wabshaba g Jesus s-mahch mo haschu am chegito ch hab kaj ab ha wui, "S-mahch am mat g o'odham wo padch g hejel e-jewedga mat ab a'ai wo e cheggia. Kut g e-wehm kihkam hab wa'ap wo padch g hejel e-kihdag mat ab a'ai wo e cheggia. ¹⁸Pegih, t has hig masma g Jiawul pi wo padch g hejel e-kownaltalig matp ab wo sha ni-mah g gewkdag mant am wo i ha wuwahas g piongaj?

¹⁹Neh, em-pionag o hab wa'ap i

ha wuwhasid g jijawul. Kum eda pi hab masma hab ha elid mo g Jiawul ab ha mahkch g gewkdag. Pegih, idam at wo em-ahgi mo pi woho hegai mam hab chum elid. ²⁰Jiosh gewkdagkaj ani gam hu hab i ha wua g jijawul. K id am wohokamchud mat heki hu in i wuhsh g Jiosh kownaltalig em-shahgid.

²¹“Nat hig pi wo e nahtokch g si s-gegoki kownal g e-cheggiakudkaj mat wo nuhkud g e-kih. T hab pi hedai wo wohppo'i g ha'ichu enigaj. ²²Tp wabshaba g ba'ich i s-gegoki kownal wo cheggia k wo gewito k gam hu wo i ui hegai cheggiakudaj mo ab chum si hiwig k am wo a'ai i tahp g ha'ichu enigaj am ha wehhejed g e-shondalig. Neh, bani wa masma cheggia g ge Jiawul. ²³K hegama mat hedai pi ab hu wo i ni-wehmajk ab ni-wui gegok ch wabsh ha gantan hegama mani s-ha do'ibiamk.”

Mat g jiawul has masma an uhpam ep wo bei g o'odham

An g neid g Matthew 12:43-45

²⁴Kush hab ep kaj g Jesus, “Matp hems g jiawul an wo hema u'ukch g o'odham ch wabsh wo dagito mat am hebai ep wo e ul. Kut hegai o'odham wo i chum kegch g e-doakag. T wabshaba g jiawul pi hebai wo chehg k hekaj hab wo i e ah, ‘Mo hig woho d ni-kih hegai o'odham. Nt hig am uhpam wo hih wui.’ ²⁵Kut wa woho am uhpam wo him k wo cheh mo am wabsh jeg ch si kegchudas ch hehosimhunus. ²⁶T am haha wo him k wewa'ak ep wo ha u'apa g jijawul. T idam

ba'ich wo i pi ap'ek ch am wehmaj wo i chiwia. Neh, t ihda o'odham hahawa ba'ich wo i pi ap'ek mo wa ga hu i heki hu.”

Mo haschu d s-wohom s-hehgig

²⁷Sh an wehgaj gegok g hemajkam. Kush hema g uwi hab kaj am wui g Jesus, “Do si ge'e s-hehgig heg wehhejed uwi mat an m-mahsid k m-si'ichudahim.”

²⁸Sh wabshaba hab kaj g Jesus, “Ba'ich at wo i s-hehgig hegama mat ab wo kaihamad g Jiosh ha'ichu ahga.”

Mamsh s-neidamk g s-hasig ha'ichu

An g neid g Matthew 12:38-42

²⁹Sh am i mu'idahim g hemajkam. Kush hab kaj g Jesus, “Mu'ijj o g ha-chegitoidag pi ap'e. K heg hekaj s-neidamk mant hab wo juh g s-hasig ha'ichu k am wo wohokamch mani ab Jiosh amjed. Bant wa'i masma am wo ha chehgi mani d Jiosh si Kehsha matsh wa hab e juh hegai kelibad Jiosh ha'ichu i tashogiddam mash d Jonah. ³⁰Heg atsh wa am si has masma i e chehgi ha wui g Ninevah t am hemajkam. Nt ahni am si has masma wo i ni-chehgi am ha wui g hemajkam ia'i idani.

³¹⁻³²“Hegama Ninevah t am hemajkam atsh gam hu s-ohhod g pi ap e-chegitoida am i kahk g Jonabad k hab pi ab hu wo e chu'ijigch ge'e lodaita tash ch ed. Ni ahni ba'ich d i si ha'ichu mo g Jonabad. Kum eda pi ab hu ni-kaiham ch heg hekaj ab wo motoig g chu'ijig lodaita tash ch ed. (31) Mehkjed atsh ab i hih g uwi

kownal ab wakolim tahgio amjed mat ab wo kaiha g Solomonbad ha'ichu mahchig. Ni ahni ba'ich d i si ha'ichu mo g Solomonbad. Kum eda pi ab hu ni-kaiham ch heg hekaj ab wo motoig g chu'ijig lodaita tash ed.”

**Mash em-tonlidch g
em-amichudadag**

An g neid g Matthew 5:15; 6:22-23

³³Kush hab ep kajj g Jesus, “Wohokam o wepogidas mo g lahmpa. Kum s-mahch mo pi hab d ahga g lahmpa mas am wo e ehsto ha'ichu wecho. Mt an wo dai mat hebai wo ha tonlidad hegam mo ab i wahpk.

³⁴“Em-wuhpui at s-ap am wo i wahki g tonlig matp wo s-mamsk k wabshaba pi am hu wo i wahki matp pi wo mamsk. Kum heg hekaj s-ap ha nuhkud. ³⁵Pegih, wahm amt wo si s-ap nuhkudag g ha'ichu e-amichudadag mat heg s-ap am wo i wahki g wohokam. ³⁶Bat wa'i masma ab wo i shuhdad g em-chegitoidag g wohokam.”

**matsh g Jesus ab ha'ichu ha abch
hegam mo d Palasi ch hegam ehp mo
d chehanig ha mashchamd**

An g neid g Matthew 23:1-36; Mark 12:38-40

³⁷Tsh am i ha'asa neo g Jesus. Tsh am hema jiwia g Palasi k am waid mat wo wehmaj e gegos. Kutsh wa woho am i wahk k am i dahiwua matsh wo e gegos. ³⁸Tsh hegai Palasi si has i el neidok mat pi e wako hab masma mo d ha himdag.

³⁹Kush s-amichud g Jesus ch hab kajj ab wui, “Neh, ahpim Palasi am si kegchud g e-honshpadag. K

wabshaba g em-chegitoi wabsh shuhdags g pi ap'ekamkaj. Heg o wa wepo mam an wa'i wehgaj si kegchud g hohas-haha'a. K ged hu ha eda wabsh kia s-bibtagi. ⁴⁰Damt wabsh wo totontok mamtp heg wo wa'i s-ap nuhkud e-honshpadag. Jiosh at hab wa'ap nahto g em-doakag. Kumt heg ep wo chum nuhkud. ⁴¹Am g wehs wo i dagito Jiosh wui k hab wo s-chechojimak ab sho'igkam ha wui ch wo nei mat wehs ha'ichu wo s-kehgajk am em-wehhejed.

⁴²“Neh, ahpim Palasi am ab mahk g Jiosh g hemako tahpani mo wehst-mahm e tahpanch g em-eniga, chum hems g nahnko mahs pi-miandi ch ha'ichu tat. T wabshaba g Jiosh s-ko'okam wo em-namkid nam pi pi ap'echud hegai mam haschukaj ha sho'igchud ha'i ch pi ab hu tatchua g Jiosh.

⁴³Sha'am wa'i s-hohho'id mamt si s-apko wo dadhaiwua am cheopi ch ed ch s-hohho'id mat ab wo si has em-elidad g hemajkam mamt an wo i wuwha kahya ch ed. ⁴⁴Ih, sho'ig! Mt wo si s-ko'okam e namkidach. Neh, pi at wo mahsk g hiha'ini matp pi am hu wo tohndask. Kumtp hems am wabsh dahm wo oiopod. Pegih, bat sha masma pi wo mahchk g hemajkam mam d pi ap'ekam nam pi ehstokch g pi ap e-chu'ijig.”

⁴⁵Kush hema hab kajj g chehanig ha mashchamdab ab wui, “Ha mashchamdab, ahchim ap hab wa'ap has t-ahg hab kajjch.”

⁴⁶Sh hab kajj g Jesus, “Pegih, ab em-wui o hab wa'ap him g s-ko'ok em-namkidadag. Mu'i

s-hasig ha'ichu am ab ha chehani g hemajkam. K id d s-wehch ha'ichu mohtoi am ha wehhejed. M eda ahpim pi ha'ichu hab sha'i wua mams hekaj ha wehm wo moht.

⁴⁷⁻⁴⁸“Em-shohshon at mu'i

ha kokda g Jiosh ha'ichu i tashogiddam. Kum ahpim ha wepo masma, chum ams ha hehosid g ha-hiha'iniga hegam mamt ha kokda. K heg hekaj ab em-wui him g s-ko'ok em-namkidadag. ⁴⁹Heki o hu hab kajj g Jiosh, 'Ab ant wo i ha wuwhas g ha'ichu i tashogiddam ha shahgid g hemajkam. Kut ha'i wo ha-kokda k ha'i wo ha sho'igch.' ⁵⁰Neh, kum ha wepo chu'ijig mamtp ha wepo ha'ichu elid. Kut wepo masma wo em-ai g s-ko'ok ha-namkidadag heg hekaj wehs mat hab juh ga hu i amjed mat in i e nahto g jewed. ⁵¹Abelbad atsh wa wehpeg e muhkid. Tsh amjed mu'i ep e ko'ij. Tsh g Zecariabad ga hu si ha oidch e muhkid amai shahgid g iagchulidakud ch ge'e cheopi. Kum ahpim ha wepo chu'ijig hegam matsh wa ha kokda ch ha wepo masma wo bei g s-ko'ok e-namkidadag mamtp hedai ha wepo elid ha'ichu.

⁵²“Ahpim chehanig ha mashchamdandam amt wo i chum ha amichudach g hemajkam mat has masma wo s-mahchk g Jiosh. Kum eda ahpim pi mahch ch ep ha shohbidch hegam mo s-mahchimk. Heg o wa wepo mam ab yahwidad g kihjeg mat pi hedai am hu wo i wah. Jiosh at s-ko'okam wo em-namkid heg hekaj.”

⁵³Tsh am i wuhsh g Jesus k gam hu chum hih. Tsh hegam chehanig

ha mashchamdandam ch Palasi ab hahawa si s-ta ke'idam has ahg k mu'i ha'ichu kakke ⁵⁴hab wabsh chum ahgch mat wo heki himch mat pi ap ha'ichu hab wo chei.

Mamt pi hab wabsh wo s-e junimk mam d s-ap'ekam

An g neid g Matthew 10:26-27

12 Kutsh sha'i si mu'i mihl hemajkam am i e hemapad k wabsh a'ai e keishshap.

Sh hab kajj g Jesus ab ha wui g e-chuhchai, “Neh, hegam mo d Palasi o hab wabsh s-e junimk mo d s-ap'ekam. Mt wo s-e nen'oidk mamt pi am hu ha oidk hab wo masmak. ²Hegai mo chum e ma'ishch at wehs wo e ma'ishpi'o. Pej, wehs s-a'agi ha'ichu at wo s-e mai. ³Wehs at wo mahsko e wua mamtp haschu chum s-a'agi hab kajj. Kut wehs am si s-kaidam wo e ahgad kih dahm amjed mamtp haschu i chum s-jupij hab kajj ged hu si e-kih ed.”

Mamtsh hedai wo s-ehbidad

An g neid g Matthew 10:28-31

⁴Sh hab hahawa kajj g Jesus ab ha wui g hemajkam, “Neh, ni-naipijju, pi g wo sha'i ha ehbidad hegam matp hedai wo chum s-em-kokdaim. Pi at wo e nako mas ba'ich s-ko'okam has wo i em-juh em-kokdak. ⁵Heg at wa'i Jiosh wo e nako mat am wo em-da'ich Jiawul kih ed mamtp pi am hu wo wohog elidad. Kumt heg ab wo wa'i si has elidad. ⁶⁻⁷K wabshaba g Jiosh si s-hemajima ch pi tatchua mas wo s-ko'okam em-juh. Am g wo oidahim mo chum hems g al

u'uwhig s-ap ha nuhkud. K eda chum alo pi ha'ichu namkig idam. Kum ahpim wehs ha'ichu ba'ich d i ha'ichu am tahgio. Jiosh o wehs ha'ichu s-mahch ab em-ab. Mt heg hekaj pi ha'ichu wo sha'i ehbidad ab wui e dagitokch."

**Mamtsh wo tasho e ah mam ab
hiwig g Jesus**

*An g neid g Matthew 10:32-33;
12:32; 10:19-20*

⁸Sh hab ep kajj g Jesus, "Neh, am amt wo s-ni-mahch k ah hemajkam ha tahgio mani d em-do'ibiakam. Kunt ahni hab wa'ap wo s-em-mahch k ah am ha tahgio g anghil ch am Jiosh tahgio. ⁹Kutp wabshaba hedai pi wo ni-mahch k ah am ha tahgio g hemajkam, nt ahni hab wa'ap pi wo mahch k ah am ha tahgio g anghil ch am Jiosh tahgio.

¹⁰"Jiosh at gam hu hab wo i juh g pi ap chu'ijigaj hegai mat hedai wo wa chum has ni-ah matp gam hu wo s-ohhod g pi ap e-chu'ijig. T wabshaba pi gam hu hab wo i e juh g pi ap chu'ijigaj hegai mat hedai wo s-ko'okam has ah g Hekai S-ap'ekam Gewkdag.

¹¹"Pi g wo sha'i kudut ab amjed mamt has masma e wehhejed wo neo mamtp hems am wo em-lodai chechopi ch ed o am ha tahgio g kokownal. ¹²Hekia S-ap'ekam Gewkdag at wo em-ahgi mamt has wo chei."

**Ha'ichu wepogida ap amjed
g s-kais o'odham**

¹³Sh am hema g o'odham hab kajj ab wui, "Ha mashchamdham, hab g

ahgid g ni-nawoj mat am wo i ha ni-tahpani hegai mat g t-ohg an dagito t-wehhejed."

¹⁴Sh hab kajj g Jesus ab wui, "Pi ant heg hekaj ia hu jiwia manis wo em-lodait k am wo i em-ap'echudach g ha'ichu em-eniga am em-shahgid."

¹⁵Sh am ba'ich hab ep kajj ab wehs ha wui, "Am g wo s-e nen'oidk mamt pi heg wo wa'i hu'uidad s-kaisdag. Pi amt d wo s-ap doakamk heg hekaj mam haschu i eniga, chum ams d wo s-kaisk."

¹⁶Sh id am hahawa chum ha tashogid ch hab kajj, "Tp hems hema d wo s-kaisk. K g e'eshaj si ge'e babhe. ¹⁷K hab e ahg, 'Pi o an hu wi'is mant hebai ep wo toa g ha'ichu bahidag. Shuhshud at g ni-waptto. ¹⁸Nt hig wo i ha shulig k am ba'ich i ge'eged ha'i wo i chuhcha k am wo ba'iha g ha'ichu bahidag ch wehs ha'ichu ni-eniga. ¹⁹Si at ha'ichu s-ni-abam. Nt mu'i a'ahidag ab wo hekaj ihda s-i'owi ha'ichu k wo ni-ulinihogidad ch wo ni-gegosidad ch wo ih'ed ch wo si s-hehgigk.' Neh, bo e ahg ihda s-kais.

²⁰"K wabshaba ab wui hab kajj g Jiosh, 'Dap wabsh tohnto. Id i s-chuhugam ab apt wo muh. Kut d wabsh wo hemak ch wo ui g ha'ichu m-eniga map hejel am chum e wi'idch.' ²¹Neh, bo wa chu'ig ch hab wa'ap wo wa chu'igk wehs ha wehhejed hegam mo hejel s-e kaischudamk ch wabshaba pi am hu Jiosh wehhejed hekaj g s-e-kaisdag," bo kajj g Jesus.

Ab g wo si i hiwig g Jiosh

An g neid g Matthew 6:25-34

²²Sh hab hahawa ep kajj g Jesus ab ha wui g e-chuhchai, "Heg ani

hekaj am em-ahgid ihda mamt pi wo si e kudutad ab ha'ichu e-hugi ab o ab ha'ichu e-eniga ab. ²³Jiosh at ab em-mah g em-doakag, pegih, k hab wa'ap ab wo em-mah mamt haschukaj wo e dagio'idad.

²⁴“An g wo i ha neid g hahawani. Idam o pi ha'ichu e'eshad ch pi od g ha'ichu esha ch pi ha kihki o ha waptto mat am eda wo ba'iha. Jiosh o ha gegosid. Kum eda ahpim ba'ich d i si ha'ichu mo g u'uwhig am tahgio g Jiosh. T heg s-ap wo em-dagio'idad. ²⁵Pi amt wo e nako mams am ba'ich wo i himch g e-a'ahidagga am wabsh hekaj e kudutch. ²⁶Mamtp pi wo e nako mamt hab wo juh ihda al ha'as chum ha'ichu, pegih, k haschu ahgk wo e kudutad g ba'ich i ge'leged ha'ichukaj?

²⁷“An g wo i ha neid hegam ha'ichu wuhshanig m an chuhch. Pi o chikpan ch pi shohshom g ha'ichu eniga. Kuki eda g ha-heosig ba'ich i s-kehgaj mo g ha'ichu enigaj hegai s-kais kownalbad mash hab chehgig Solomon. ²⁸Neh, tp hems s-hohtam wo gaksh hegai sha'i m an chuhch k wo hekaj e nanda. K eda heg wa wepo mo g Jiosh si s-kehg enigadadch g heosigkaj. Pegih, am g wo s-wohochud mat ab s-ap wo em-enigadadch. ²⁹Pi g heg wa'i hekaj wo e kudutad mamt wo e gahgi g ha'ichu hugi. ³⁰Wehs hemajkam an jewed dahm o chum hekid id an si e gahgid. K wabshaba g em-ohg Jiosh s-mahch mam tatchua ihda. ³¹Mt g Jiosh kownaltalig wehpeg am wo ul e-doakag ed. T g Jiosh ab epai wo em-mah mam haschu i tatchua.

Mash haschu d s-em-kaisdag an dahm kahchim ch ed

An g neid g Matthew 6:19-21

³²“Pi g am wo sha'i ha'ichu ehbidad ahpim mam al he'ekiajj ab ni-hiwig. Em-ohg Jiosh o ab si tatchua mat ab wo i em-mah g e-kownaltalig. ³³Wehs g wo gagda mam haschu i edgid k wo ha mah g namkigaj g sho'igkam k an haha wo edgidad g ba'ich i s-kehg kaisdag Jiosh kihdag ed. T heg pi hekid wo huhug. T pi hedai wo em-ehs. T g hiofch pi hekid wo padch. ³⁴Kumt am wo s-hihimim no pi g em-tatchuidag am ulinig mo hebai ha'ichug hegai mam haschu hab elid mo d em-kaisdag.”

Mattsh wo si t-nahtokch matsh wo uhpam ep jiwia g Jiosh alidag

³⁵⁻³⁶Kush hab ep kaj g Jesus, “Mt wo si e nahtokch mat haschu has wo e juh hab sha masma mat g pion wo si e nahtokch mat g ha-ahmo wo uhpam jiwia. Ha-ahmo atp hems am wui wo hih g wo ha hohntam gegosig k pi oi wo uhpam jiwia. T wabshaba g piongaj ab wo s-ap e enigadadch ch ab wo mehich g e-kanjel ch g e-ahmo ab wo nenida. T am wo i jiwia k wo si shontpa. T ab ha hekaj wo i kuhpi'o g kihjeg wehhejed. ³⁷T wo si s-hehgigk hegam pion mat g ha-ahmo wo ha cheh mo nenead ch e nahtokch. Neh, t heg ab hab wo juh g bahshodag k wo si s-ap ha dadsh k wo ha gegos. ³⁸T wo si s-hehgigk hegam mat wo e nahtokch mat wo jiwia, chum as hems eda wo i huh g s-chuhugam o i ba'iwichkim.

³⁹“Neh, pi o ta machima mas hekid hema wo i jiwia g s-chu ehskam. Kum heg hekaj chum hekid nuhkud g e-kihdag. ⁴⁰Pegih, k hab wa'ap pi ta machima em-wehhejed manis hekid wo uhpam jiwia jewed wui ahni Jiosh si Kehsha. Mt heg hekaj wo si e nahtokchid chum hekid.”

Mamtsh s-ap hab wo junihid g e-chikpan

An g neid g Matthew 24:45-51

⁴¹Sh hab kaj g Peter, “T-kownalig, nap ahchim wa'i hab t-ahg aha nap wehs hab ha ahg?”

⁴²Sh hab kaj g Jesus, “Chum amt hedai wo e nahtokch mamtp wo s-wapagimak ch wo s-chu a'amichudad. S-mahch am mat g ha-ahmo hema wo e gahgi g hab mahs chikpandam k wo nuhkudach g e-kihdag. T heg s-ap wo ha chikpanchudad ch wo ha dagio'idad g e-wehm pion mat eda pi an hu wo ha'ichugk g ha-ahmo. ⁴³T am ep wo jiwia k wo cheh mo ihda s-ap am hab junihim g e-chikpan. Kut d wo si ge'e s-hehgigk heg wehhejed pion ⁴⁴nat pi g ahmoj am hahawa wehs dahm wo kei g e-kihdag.

⁴⁵“T wabshaba pi ap d wo ha-kehshak matp hedai wo i ha sho'igchudad g e-wehm pion ch wo si e gegosidad ch wo nawmmukad hab e ahgch mat pi oi wo jiwia g ahmoj. ⁴⁶T haha wabsh wo jiwia k wo cheh mo pi ap hab wua g e-chikpan k wo si s-ko'okam namkid k gam hu hab wo i juh.

⁴⁷“T wo bei g s-ko'ok e-namkidadag hegai pion mat wo s-mahchk g e-ahmo tatchui ch

eda pi am hu hab wo junihid. ⁴⁸T wabshaba pi am hu i si s-ko'okam wo bei g e-namkidadag hegai mo pi e mahch ch hab junihim g pi ap'ekam. Ba'ich i ge'e ha'ichu amt uhpam wo s-behim ab amjed hegai mamt ba'ich ha'ichu nuhkudach.”

Matsh g hemajkam ab e wui wo gegokiwua heg hekaj Jesus

An g neid g Matthew 10:34-36

⁴⁹Kush hab ep kaj g Jesus, “Ia ant jiwia jewed dahm mant wo i ha chu'amu g hemajkam hab sha masma mant am wo si i nai ha-i'ibdag ed. T hab wo s-nenenashanik ab Jiosh wui. Mat hu'i heki hu hab wo e juh. ⁵⁰Am ant s-ta ehbidam ha'ichu gahi wo wuhshani k si ni-kudut heg hekaj. ⁵¹Pi g hab wo e elidad mat wo dodolimat g hemajkam mant ia jiwia. ⁵²Ab at em-wui wo gegokiwua hegai mat pi wo ni-tatchuad, chum hems ha'akia em-wehm kihkam. ⁵³Cheoj atp hems wo s-keh'idad g e-ohg o g e-alidag. T g uwi g e-je'e o g e-mad o g e-kahkma je'e wo s-keh'idad.”

Mamtsh wo chum s-mahchk mat oi si ha'ichu hab wo e juh

An g neid g Matthew 16:2-3

⁵⁴⁻⁵⁶Sh hab hahawa ep kaj g Jesus, “Neh, mt wo s-mahchk mas wo juh o as wo tonih am neidk mas hebajjed hewed ch has mahs chewagi i wushke. M eda pi am hu i a'amichud mo haschu has e junihog ia'i idani neidch mani haschu hab wua. Shahag wepo mam pi mahchimk.

**Mamtsh s-hohtam am wo i e ap'ech
ab ha'ichu e abchudch**

An g neid g Matthew 5:25-26

⁵⁷“E o aihim mat g Jiosh wo ha lodai g hemajkam. Am g wo a'amichud mamt has wo chum masmak. ⁵⁸S-mahch am mamt hemho wa s-hohtam am wo i e ap'ech heg wehm mat ab wo ha'ichu i em-abch. Tp hems am wo i em-wahpki lodaita ch ed mamtp pi am hu wehmaj wo i e ap'ech. T g usagakam am wo i em-dagito chi-lihhi wui. T heg ged hu wo si em-kuh. ⁵⁹Kumt pi wo sha'i i e wuhshad am hugkam mamt hekid wo i wehs ha namkid mamt he'ekia i em-to'i.”

**Mattsh gam hu wo s-ohhod
g pi ap t-chegitoi**

13 Kush ia'i idani ha'i g o'odham am ahgid g Jesus matsh g kownal Pilate ha'i ha kokda g Galilee t am hemajkam mash eda idam am hab chum wua g iagchulida Jiosh wui.

²Sh g Jesus hab kajj am ha wui, “Kumtp hab elid mo id am wohokamchud mo ba'ich d i si pi ap'ekam mo hedai i Galilee t am kihkam namt pi hab masma ha kokda. ³K eda pi woho. Wehsijj am hab masma d pi ap'ekam ch wo bei g s-ko'ok e-namkidadag mamt wo sha pi ohhod g pi ap e-chegitoi.

⁴“Neh, am atsh i gei g uhgk kih Siloam wo'o t am Jerusalem ch ed. Kutsh gamai gigi'ik e ko'ij. Kum hab elid mo id am wohokamchud mo idam ba'ich d i si pi ap'ekam mo hedai i hegam

mo am kih Jerusalem t am. ⁵K eda pi woho. Wehsijj am hab masma d pi ap'ekam ch wo bei g s-ko'ok e-namkidadag mamt wo sha pi ohhod g pi ap e-chegitoi.”

**Mash g Jesus ha wepogid g
pi bahidkam suhna uhs**

⁶Sh g Jesus am ha ahgid ihda ha'ichu wepogida ahga, “Neh, matp hema g o'odham ge suhnaga am uhdwis e-oidag ed ch am him k am s-u'im g suhna. K pi ab hu bahidag.

⁷“K hab ahg g oidag nuhkuddam, ‘Neh, waik a'ahid ab ach am nenneid hegai suhna uhs ch pi koi ha'ichu sha'i bei ab amjed. Pt wo shonch. S haschu ahgk am hig wo kehkk oidag ch ed?’

⁸“K wabshaba hab kajj g oidag nuhkuddam, ‘Am att hig wabsh wo dagito hemako ahidag ehg. Nt am wo si i moihun k am wo iawua g haiwani biht an wehgaj. ⁹Kut am wo s-ap'ek matp ab wo bahidagt. Nt wabshaba am haha wo si shonch matp pi ab hu wo bahidagt.’ ”

**Matsh g Jesus am hema doaj g
uwi mihshmda tash ch ed**

¹⁰Sh am hu hebai mihshmda tash ch ed g Jesus am ha mashcham cheopi ch ed. ¹¹Sh am hema ha'ichug g uwi mash g jiawul an u'ukch. Kush gamai gigi'ik a'ahid ab wa'i mumku mash ab wabsh i e olatch ch pi e nako mat wo shel i kekiwua. ¹²Tsh am i cheh g Jesus k ab si wai. Tsh ab i hih. Kush hab kajj, “Ahpi uwi, ia at wo i doa g m-mumkidag,” ¹³K ab hahawa taht. Kutsh ha hekaj shel i kekiwua k ab si ihm g Jiosh.

¹⁴Kutsh ab si bagat hegai mash d ha-wanimeddam am cheopi ch ed matsh g Jesus ha doaj ha-mihshmda tash ed k ash hab ha ah g hemajkam, “Am o ha'ichug g chuhtp tash matt heg eda wo chikpanad. Kunt heg oidam tash ia wo dada k wo e doaj, hi wa pi t-mihshmda tash ed mo g Jiosh am kehshch.”

¹⁵Sh hab kajj g Jesus ab wui, “Ih, pi ap sha'i woho ab hu has elid g Jiosh pi ab hu ho'ige'idch ihda uwi no pi d chum aligaj. S-mahch ap mat wabsh chum hedai g e-woiwisga o g e-wuhluga am wo wul'ok k am wo be k ged hu wo i'ich, chum hems e-mihshmda tash ed. ¹⁶Pegih, tt wahm wo i wehmt ihda t-wehm o'odham. Jiawul o wa ab wulshch gamai gigi'ik ahid ab. Kutt hemho wa wo wul'o, chum hems mihshmda tash ed.”

¹⁷Kutsh si e el hegam mo s-keh'id. Sh wabshaba g hemajkam si s-hehgig heg hekaj si s-kehg ha'ichu mat hab juh.

**Matsh has masma wo i ge'eda g
Jiosh kownaltalig**

An g neid g Matthew 13:31-32; Mark 4:30-32

¹⁸Sh hab ep kajj g Jesus, “Am ant he'es wo i em-tashogi g Jiosh kownaltalig ¹⁹am wepogidch g ha'ichu kai. Neh, heg am e'esha mo al chumaj ch oi wa am wo wuhshani k ha'as wo i ge'eda mo g s-ehheg uhs. Tp hems g u'uwihg an ab wo koksht. Pegih, t hab wa masma wo ge'e i ge'eda g Jiosh kownaltalig, chum as al chum am wo shonwua.”

**Matsh am wo chehmo g jewed g
Jiosh kownaltalig**

An g neid g Matthew 13:33

²⁰⁻²¹Sh hab ep kajj g Jesus, “Jiosh kownaltalig o hab wa'ap wepogidas mo g jewajidakud. Heg amt wo be k am wo wah wehnadk g chu'i k am he'es wo i dai. T g jewajidakud wo chehmo g wahga mat wehs am wo i kopodka. Pegih, t g Jiosh kownaltalig hab wa masma wo chehmo g jewed.” Neh, bash kajj g Jesus

**Mash s-hasig matt am wo i wahp
Jiosh kownaltalig ed**

An g neid g Matthew 7:13-14, 21-23

²²Sh am hihimhim hegam Jesus ha oidk g kihhim. Sh g Jesus am ha'ichu ha mashcham g hemajkam ch am wabsh i si ha'ab e gewkadch Jerusalem wui.

²³Sh hema ab kakke ch hab kajj, “Ni-kownalig, nat pi sha'i mu'i wo e do'ibia g hemajkam?”

Sh hab kajj g Jesus ab wui, ²⁴“Heu'u. Kunt heg hekaj am wo si e nakogad mamt am wo i wahp Jiosh kownaltalig ed. Mu'ijj at am wo chum s-wahpkim k pi wo e nako. Heg o wa wepo mamt am wo i wahp al aj kihjeg t amjed. ²⁵Id ant wo wepogi g kih enigakam mat am wo i ha wahpki g e-machiga k am haha wo si kuh g pualit. T ab ha'i ep wo i chum s-wahpkim. T hab wo ha ah, ‘Gam g hu wo hihim. Pi ani sha'i em-mahch.’

²⁶“Neh, bat wa masma mu'i am wo i chum s-wahpkim ni-kownaltalig ed hab kajjch,

'M-wehm ach t-gegosidahim. Kup am ha mashcham t-kihhim am.'

²⁷"Kunt hab wo ha ah, 'Pi ani sha'i em-mahch. Gam g hu wo hihim ab ni-amjed. Dam si pi ap hehemajkam.'

²⁸"T haha wo si shoanid ch ga hu wabsh wo i si e ki'ishch nat pi wo sha'i si s-ko'ok ha'ichu nakogad. T eda am wo ha'ichugk g Abrahambad ch Isaacbad ch Jacobbad ch wehs g Jiosh ha'ichu i tashogiddam. ²⁹Kut g hemajkam ab wo i hihi si'al tahgio amjed ch huduni tahgio amjed ch ab juhpin tahgio amjed ch wakolim tahgio amjed k am wo dadhaiwua e wehm Jiosh kownaltalig ed. ³⁰Kut am d wo si haha'ichuk hegam mo hemuch d pi haha'ichu. T hegam mo hemuch d si haha'ichu d haha wo pi haha'ichuk."

Mash g Jesus si pihk e elid ab ha wui g Jerusalem t am hemajkam

An g neid g Matthew 23:37-39

³¹Tsh am ha hekaj ha'i dada g Palasi k hab kaj ab Jesus wui, "Gam g hu hihm ia amjed nash pi s-m-mu'amk g Herod."

³²Sh hab kaj g Jesus ab ha wui, "Herod o sha ban masma ch hab kaj. Him k ahgid mant ha'as tash am wabsh kia gam hu hab wo i ha junihid g jijawul ch wo ha doajidad g kok'odam ch haha wo s-ap nahto g ni-chikpan. ³³Kunt pi wo sha'i ni-muhkid im hu haha wabsh i himadch. Am o wa'i Jerusalem t am e ko'ijid g Jiosh ha'ichu i tashogiddam.

³⁴"Th, t wo si e sho'igch g Jerusalem t am hemajkam

nat pi g Jiosh s-ap wo ha dagito. Ha-shohshon ash wa ha ma'ichshulig ch mu'i ha kokda g Jiosh ha'ichu i tashogiddam. T idam am ha oidk hab wo e juh. Mu'ikko ani hab chum si ni-tahtk mant wo si s-ap em-nuhkud hab sha masma mat g chuchul g e-mahmad ab e wecho wo ha hemapai. M wabshaba pi ab hu tatchua manis hab wo em-juh. ³⁵K eda an hab chu'ig Jiosh o'ohana ed mamt ab wo chum ni-ihmad ch hab wo chech'ed mat g Jiosh am i ni-kehsh k si s-ni-ho'ige'id. Kunt ia wo i s-ap em-dagito am hugkam mamt hab hahawa masma hab wo e juh."

Matsh g Jesus hema ep doaj mihshmda tash ch ed

14 Sh hema d uhgchu ch d Palasi ch hebai hab juh g ge'e gegosig ha-mihshmda tash ed k ash ab i wai g Jesus. Kutsh am jiwia. ²Sh eda an hema ha'ichug g cheoj ch mahniko nash pi g kakhioj ch nohnhoij ge totskoni. Kumsh an si s-nen'oid g Jesus mas wo doaj nash pi ab ha'ichu s-abchudamk.

³Sh hab kaj g Jesus ab ha wui hegam chehanig ha mashchamd ch Palasi, "Shahchu am ahgch hab elid mo pi t-hiwgid g t-chehanig machs wo ha doaj t-mihshmda tash ed?"

⁴Sh pi hedai has sha'i kaj.

Tsh g Jesus ab hahawa i wai ihda o'odham k doajid k am hahawa dagito. Kutsh gam hu hih.

⁵Sh hab hahawa kaj g Jesus ab ha wui, "Neh, namt hig pi woho ab ha hekaj wo i wuhshad g e-alidag o chum hems g e-woiwisga matp am

wo sha gei wawhia ch ed, chum as d wo em-mihshmda tashk?”

⁶Kush pi hedai e nako mas has wo chei.

Mamtsh pi wo tatchua mamtsh wo wehpegat am ge'e gegosig am

⁷Kutsh ha'i hegam ha-waida gan hu si wehpeg s-apko dadhaiwua. Kush am ha neid g Jesus ch hab kajj, ⁸“Pi g am hu si s-apko wo dadhaiwua mamt hekid am wo hihi gegosig wui. Tp hems am hema wo jiwia mat am ba'ich d wo i s-has ha'ichuk. ⁹Kut am haha wabsh wo jiwia hegai mat ab i em-wai k hab wo em-ah mamt wo hiwigi hegai s-has ha'ichu abai mamt ab chum dahiwua. Kumt wo si e el namt pi hahawa ga hu wabsh si ha oidk wo dahiwua.

¹⁰“Ba'ich at wo i s-ap'lek mamt ga hu wabsh mehk wo dahiwua. Kut g kihkam ab wo i him k hab wo em-ah, ‘Ni-nawoj, oi g i hihm k ia hu s-apko ni-miabidch i dahiwua.’ Neh, t id ab wo em-mah g si has elida am ha tahgio hegam ha'i ha-waida.

¹¹“Mt wo pi ha'ichuch hegai mat hedai wo chum si e ha'ichuch k ab wo si ha'ichuch hegai mat wo pi e ha'ichuch.”

¹²Sh hab hahawa ep kajj g Jesus ab wui hegai mat ab i wai, “Pi g hegam ab wa'i ha waid e-naipijju o g e-wepnag o g e-hajuni o g s-kakais e-hugid an kihkam mapt hekid hab wo juh g gegosig. Ab at epai wo i m-wai idam. Kupt hab masma ab wo bei g e-namkidadag heg hekaj mapt id hab juh. ¹³Ab g i ha waid g sho'igkam ch mamaniko

ch pi hihimidkam ch pi neneadam mapt hekid hab wo juh g gegosig.

¹⁴Pi at wo e nako idam mat wo uhpam m-namkid. T g Jiosh ab wo m-mah g s-kehg m-mahkigdag mat hekid am wo i ha wuwahas g s-ap'ekam hemajkam ab muhkig amjed.”

Ha'ichu wepogida ahga ab amjed g ge'e gegosig

An g neid g Matthew 22:1-10

¹⁵Sh am hema daha g o'odham ch kah ihda. Tsh am i ha'asa neo g Jesus. Sh id ab wui hab kajj, “Ttki wo si s-hehgigkad, am i wahpk Jiosh kihdag ed, heg wa wepo matt am wo dadhaiwua ge'e gegosig ch ed.”

¹⁶Sh hab kajj g Jesus, “Heu'u, mamtp woho am wo i wahp. Id o wepo masma matp hems hema hab juh g ge'e gegosig k mu'i ab ha waid g hemajkam. ¹⁷T am i e ai. Kut am hema cheha g e-pionag. T heg am him k ha-ahgi mo wehs ha'ichu e nahtokch.

¹⁸“K wabshaba idam am ahgid mat pi wo e nako mat am wo hihi. “Neh, tp hems hema am wo ahgi, ‘Ha ant nolawt g oidag k heg s-neidamk ch hekaj pi am hu wo hih.’

¹⁹“Kutp hems hema am wo ahgi, ‘Wehst-mahm woiwis ant am ha nolawt k hegam s-ha a'appemimk.’

²⁰“Kutp hems hema am wo ahgi, ‘Ha ant hohnt k hekaj pi am hu wo hih.’

²¹“Neh, t am hahawa uhpam hih ihda ha-pionag k am ahgi g e-ahmo. T g ahmoj wabsh woho i bagat k hab kajj ab e-pionag wui, ‘S-hohtam

g am hihm kahya ch ed ch wohg ch ed k ab wo i ha ui g sho'igkam ch mamaniko ch pi neneadam ch pi hihimidkam.'

²²“Kut wa woho hab juh k am hahawa jiwia k hab kajj, ‘Bant juh g m-chehanig. K wabshaba am wabsh kia wilis g kih.’

²³“K hab ep kajj g ahmoj, ‘Am g i wuhshani k an mehk hihm chu'uchum wopog oidch an sha'i ch ed k hab wo ha juh mat ab wo i hihi mat wo shuhd g ni-kih. ²⁴Pi at ab hu i hihi hegama mo d chum si ni-waida. Kunt pi hema wo sha'i hiwigi mas wabsh wo i jeh g ni-gegosig.’ ”

Mattsh haschu wo nako nach pi ab si tatchua g Jesus

An g neid g Matthew 10:37-38

²⁵Sh am hu hebai hihim hegama Jesus. Sh mu'i hemajkam am ha wehm hihim.

Tsh ab i ha nei g Jesus k hab kajj ab ha wui, ²⁶“Pi am ab hu sha'i ni-tatchua mamtp pi ba'ich ab wo i ni-tatchua mam hi g e-jehj ch e-wepnag ch e-wehm kihkam ch e-a'aliga. ²⁷Hemho wa amt gam hu wo dagito g hejel hab e-elida k ahni hab ni-elida hab wo junihid ch ni-wehhejed wo e sho'igchudad. Id at heg wo wa wepok mam ab mohto g kots ch ab ab wo e muhkid.

²⁸“Neh, nat hig pi am hu wo i a'amich hegai matp hedai am hema ge'e wo kiht mas am hi wa ahim lialiga mat wo nahto g e-kihta?

²⁹Mt wo ashad matp am hab wabsh wo juh g shondaj k pi wo e nako mas am hu wo i nahto g e-kihta.

³⁰Kut hab wo e chech'ed, 'Thda

o'odham at am chum hema i kei g kih k wabshaba pi e nako mat wo nahto.' Pegih, mt ahpim hab wa masma wo i a'amich mams wo e nakog k ab wo ni-hiwgad.

³¹“Neh, matp hems hema g kownal wo s-cheggiam g e-obga k eda al wehst-mahm mihl (10,000) wo shondaligak. T g obgaj gokko wehst-mahm mihl (20,000) wo shondaligak ch ab him. T hegai kownal am wo i chum a'amich mas hu hi wo wa e nako mat wo cheggia.

³²Tp hab wo mahsk matki pi wo e nako, t hemho wa am wo ha'i ha cheha mat ab wo nam hegai hema kownal mat ga hu wabsh kia mehk wo himad k wo s-mai mas he'ekia wo i namkid. T pi wo cheggia.

³³Neh, bo chu'ig. Kumt ahpim pi wo e nako mamt ab wo ni-hiwgad, heg hi wa mamt wehs ha'ichu wo dagito am ni-wehhejed.”

Mattsh onkaj ha'ichu wehhejed wo s-kehgajk

An g neid g Matthew 5:13; Mark 9:50

³⁴Sh hab ep kajj, “Mt ha'ichu wehhejed wo chum s-kehgajk hab masma mo g on. ³⁵Heg at gam hu wabsh wo s-e ohhod mat wo sha kahko. Kumt wo s-e nen'oidad namt pi wabsh wo s-e ohhod mamtp pi ha'ichu wehhejed wo s-kehgajk. Ab g wo i a'amichud ahpim mam kah ihda.”

Ha'ichu wepogida ahga ab amjed g heb hu himkam kahwal

An g neid g Matthew 18:12-14

15 Sh am hu i hebai, sh mu'i lial ha kowlantdam ch pi ap hemajkam ab i miabi g Jesus

mat ab wo kaiha. ²Tsh g Palasi ch chehanig ha mashchamdab ab i s-babgam neneok k hab kaij, “Ihda o'odham o wabsh s-ap ab ha neid g pi ap hemajkam ch ha wehm e gegosid.”

³Tsh heg hekaj am ha ahgi ihda ha'ichu wepogida ahga, hab kaijch:

⁴“Id o wepo masma mamtp hems hema ahpm siant wo kahwaligak. Kut hema wo heb hu hih. Namt hig pi am wo ha dagito hegama humukto gamai humukt kolhai ch ed k am wo i gahghi hegai hema am hugkam mamt wo chehg ⁵k an haha wo kushwiot k hih uhpam ⁶k ab wo i ha wai g e-naipijju. T am wo i e hemapai. Kumt hab wo ha ah, ‘Si g wo s-hehgigk ni-wehm. Cheh ant g ni-shoiga mat chum heb hu hih.’ Kut am em-wehm wo si s-hehgigk. ⁷Pegih, t hab wa masma d wo si s-hehgigk an eda g Jiosh kihdag chum hems hemako em-wehhejed mamt gam hu wo s-ohhod g pi ap e-chegitoi. Kum eda ha'i hejel hab chum e elid mam d s-ap'ekam hemajkam ch pi tatchua mams gam hu wo s-ohhod g pi ap e-chegitoi.”

Ha'ichu wepogida ahga ab amjed g heb hu e wuakam lial

⁸Kush id am ep ha ahgid g Jesus ch hab kaij, “Matp hema g uwi wehst-mahm wo enigak g lial ch hema wo heb hu wua. Tp hems wo mehi g e-lahmpa k an wo i wosu g e-kih k an wo i gahghi am hugkam mat wo chehg ⁹k ab haha wo i ha wai g e-naipijju. T am wo i e hemapai. T hab wo ha ah, ‘Si g wo s-hehgigk ni-wehm. Cheh ant g

ni-lialiga mant chum heb hu wua.’ Kut am wehmaj wo si s-hehgigk.

¹⁰Pegih, t hab wa masma wo si s-hehgigk g anghil chum hems hemako em-wehhejed mamt gam hu wo s-ohhod g pi ap e-chegitoi.”

Ha'ichu wepogida ahga ab amjed g simnoltdam

¹¹Sh hab ep kaij g Jesus, “Matp hems hema g o'odham gohk wihpiopga. ¹²T g chumchu ab wui i him k hab kaij, ‘Ni-ohg, wapt wo i ni-mah hegai mat d wo chum ni-wuikamk.’ Kut wa woho am i gawulkai g e-eniga k ab ha mah g e-wihpiopga hegai mo haschu d ha-wuikam.

¹³“T ihda chumchu am ha hekaj gagda g e-eniga k bei g namkigaj k gam hu simnolt mehk jewed wui k am heki wua g e-lialiga am hab wuadch g pi ap'ekam. ¹⁴T am i huhug g lialigaj. T am hahawa gei ge'e bihugig. K ihda simnoltdam pi ha'ichu edgid mas wo huh. ¹⁵K am hahawa hema chikpanachud e-oidag ed mat wo ha nuhkud g kokji. ¹⁶Kut chum hems heg s-hugim mo haschu g kokji ko'a. T pi hedai ha'ichu mah mas wo huh.

¹⁷“T am hahawa ha'ichu kop mo'oj ed. K hab e ahg, Wehs g ni-ohg pionag o s-edgid g ha'ichu hugi. Kuni eda ahni d bihugimkam. ¹⁸Nt hig wo uhpam hih ni-ohg wui k hab wo chei, ‘Ni-ohg, pi ant ap has chu'i ab m-wui ch ab Jiosh wui. ¹⁹K hahawa pi d ni-wuikam mams hab wo ni-a'agad mani d m-alidag. Chum anis hems d wabsh wo m-pionagk.’

²⁰“Neh, t am ha hekaj i wuhshani k am wui hih g e-ohg. T heg cheh

mo im hu wabsh kia him k ab si s-ho'ige'id k ab wui med k gan hu kohm k ab chintad.

²¹“K ab wui hab kajj g alidaj, ‘Ni-ohg, pi ant ap has chu'i am m-wui ch am Jiosh wui. K hahawa pi d ni-wuikam mams hab wo ni-a'agad mani d m-alidag.’

²²“T wabshaba g ohgaj hab wabsh ha ah g e-pionag, ‘Ab g wo i bek g s-kehg eniga k an wo wahkid k g anilo an wo sha'ich nowij an k g shuhshk ab ep wo cheka ²³k wo mua g s-gihg wisilo. Kutt hab wo juh g ge'e gegosig k wo si s-hehgigk. ²⁴Uhpam at ep jiwia ihda ni-alidag mat gam hu mehk hih. Id o heg wa wepo mat muh k ep e chegito.’ Neh, t wa woho hab e juh g si ge'e s-hehgig.

²⁵“K eda gam hu chikpan g ge'echu alidaj oidag ch ed ch pihhun k ab hih. K eda si s-hehgig ch ne'ed ch keihin. ²⁶Kut kah k ab hema kakke g pion mas has d ahga ihda.

²⁷“K heg hab kajj, ‘M-wehnag at jiwia. Kumt mua g s-gihg wisilo k hab juh g ge'e gegosig nat pi s-ap jiwia.’

²⁸“Neh, t bagat ihda ge'echu k pi am hu i wah. T am hahawa kah g ohgaj k am i wuhshani k am wabsh s-ap ab chum waid. ²⁹K wabshaba ab wui hab kajj, ‘Neh'e, ha'akia a'ahidag ani ab m-wecho ch chum hekid hab wua g m-tatchui. Kupt eda pi hekid chum hems g siwat mad ab ni-mah mant wo ni-gegosid k wo s-hehgigk am ha wehm g ni-naipijju. ³⁰T wabshaba ia jiwia ihda m-alidag mat hedai heki wua g m-kihdag ha wehm g chechpa'awi. Kupt mu'ij g s-gihg wisilo.’

³¹“K g ohgaj ab wui hab kajj, ‘Ni-alidag, ahpi ap chum hekid ni-wehmaj. K wehs hegai mo d ni-eniga d m-eniga. ³²K wabshaba hemu am wa s-ap'e matt wo si s-hehgigk nat pi uhpam ep jiwia ihda m-wehnag mat am simnolt. Heg o wa wepo mat muh k ep e chegito,’ bo kajj g ohgaj.”

Ha'ichu wepogida ahga ab amjed g s-e mahchim maliom

16 Sh am ep ha ahgid g Jesus ihda wepogida ahga ch hab kajj, “Tp hems am hu hebai hema d wo s-kais o'odhamk. K hegai mat am i kei mo d maliom wabsh heki wua g lialigaj. ²T am i wai e wui k hab kajj, ‘Am ant ha'ichu sha naksh ab m-amjed k antki hekaj hab wo chei mapt am wo i kuint k am wo o'oha wehs map has i masma nuhkud g ha'ichu ni-eniga nantki pi wo m-dagito.’

³“T hab i e ah ihda o'odham, ‘Tki wo i ni-wuhshad g ni-ahmo. Nis has wo ni-juh? Pi ant wo ni-nako manis wo waikkat k si ni-elid manis wo ha'ichu ha tahnid. ⁴Neh, s-mahch ani mantki has wo ni-juh k mu'i wo naipijjuk. T idam ab wo i ni-wahki e-kihki ed mamt hekid wo i ni-wuhshad id amjed ni-chikpan.’ ⁵Bo kajj ch am hahawa hehemako ha waid hegam mo ab ab e wulshch g ahmoj. Kut am hema jiwia. K g maliom ab wui hab kajj, ‘Nap s-mahch map he'ekia ab ab i e wulshch g t-ahmo?’

⁶“K hab kajj ihda, ‘Heu'u, hemako siant waplin g a-saidi ani ab ab ni-wulshch.’

“K hab kajj hegai maliom, ‘Ab ant wo i huduni. Pt am wa'i hetaspo

wehst-mahm waplin ab ab wo e wulshch.'

"T gam hu hih hegai. Kut am hema ep jiwia.

⁷"K g maliom ab wui hab kajj, 'Nap s-mahch map he'ekia ab ab i e wulshch g t-ahmo?'

"K hab kajj ihda, 'Hemako mihl kokstal g pilkani.'

"K hab kajj hegai maliom, 'Ab ant wo i huduni. Pt am wa'i gigi'ik siant kokstal ab ab wo e wulshch.'

⁸"Neh, t g ahmoj si has i el am i kahk mat has e juh ihda s-chu banmadamkam maliom nat pi si s-e mahch k hab e juh. Neh, hegam mo pi mahch g Jiosh o em-ba'ich i s-e mahch ch hab wua ha'ichu.

⁹"Id ani em-ahgid mamt wo s-ap hekaj g e-kaisdag am ha wehhejed hegam mo tatchua g i wehmtadag. T g Jiosh s-ap am wo i em-wahpki e-kihdag ed mamt hekid wo muh.

¹⁰"Hegai matp hedai s-ap wo nuhkud g al chu'uchum ha'ichu at hab wa'ap s-ap wo nuhkud g ge'eged ha'ichu. Kutp hedai wo ha banmad g al chu'uchum ha'ichukaj k hab wa'ap wo ha banmad g ge'eged ha'ichukaj. ¹¹Am g wo s-ap nuhkudad hegai mam haschu em-nuhkudachud id dahm jewed. T g Jiosh am wo ha'ichu em-nuhkudach e-kownaltalig ed. Heg o d s-wohom kaisdag ¹²ch d wo em-enigak mamtp wo s-ap nuhkud hegai mam haschu em-nuhkudachud id dahm jewed.

¹³"Pion at pi wo e nako mat gohk wo a'amok. Hema at ba'ich ab wo i tatchuad ch ba'ich i s-ap wo chikpanidad. Kumt ahpim hab wa'ap pi wo sha'i e nako mams

wepo ab wo ha tatchuad g Jiosh ch ihda jewed dahm s-kaistalig."

Sho'oshpol ha'ichu mashchamaj g Jesus

An g neid g Matthew 11:12-13;

5:31-32; Mark 10:11-12

¹⁴Sh am ha'i kah g Palasi wehs ihda. K eda g Palasi si pihk e elid g s-kaisdagkaj. Kush idam heg hekaj nahnko ahg g Jesus.

¹⁵Sh hab kajj g Jesus ab ha wui, "Ahpim am hab chum e wua mam d s-ap'ekam am ha tahgio g hemajkam. K wabshaba g Jiosh s-mahch g em-i'ibdag. Hegai mo haschu i g hemajkam hab chum elid mo d si ha'ichu o d wabsh pi ha'ichu am Jiosh nena ed.

¹⁶"Mosesbad ch hegam ha'i kekelibad Jiosh ha'ichu i tashogiddam at an o'oha mamt has wo chum masmak. Kumt id wo chum hekaj am hugkam mat ab i wuhsh hegai John mo em-pahl wapkonahim. K am i amjed ihda s-kehg ha'ichu ahga ab amjed g Jiosh kownaltalig am e ahgahim. K wabsh chum hedai am chum e nakog mat am wo i wah. ¹⁷T wabshaba pi wabsh wo huhug hegai chehanig. Ba'ich at wo i pi hasigk mat g dahm kahchim ch jewed wo huhug.

¹⁸"Dat wo pi ap chu'ijkamk hegai matp hedai wo s-ohhod g e-wehm kihkam k hema ep wo bei. K hab wa'ap wua g pi ap'ekam hegai matp hedai an wo bei g ha-ohhoda."

Ha'ichu wepogida ahga ab amjed g s-kais o'odham ch Lazarus

¹⁹Sh id am ep ha ahgid g Jesus:

“Tp hems hema d sha'i si s-kais o'odham ch chum hekid g si s-namkig eniga ab wahpkch ch wehs tashkaj si s-kakaisim kihdag. ²⁰K am hema d si sho'igkam o'odham ch hab chehgig Lazarus ch wehsko hihiwog. Kum ab i bebhe ch ab dadsha s-kais o'odham kihjego. ²¹hab elidch mat he'es ha'ichu wo al huh mo ab i shulig s-kais o'odham mihsa t ab. K g gogogs ab winikon g hihiwdaj.

²²“T am i muh ihda sho'igkam o'odham. T g anghil am i be k an u'apa anai mam am ha nuhkud g s-ap'ekam.

“Kut g s-kais o'odham hab wa'ap muh. Kumt ged hu cheh. ²³T am i e chegito k oki am ha'ichug mo am kuhkpi g pi ap'ekam ch sha'i si s-ko'ok ha'ichu tahtk ch ab i nea e dahm. K g Lazarusbad ab wehmaj daha g t-shohshon Abraham. ²⁴K ihda s-kais o'odham ab si s-kaidam hab kajj, ‘Ni-shohshon, Abraham, ge'le s-ko'ok ani nakog id eda mehi. Ab g si i s-ni-ho'ige'id k ab wo cheha g Lazarus mat am wo wahki g e-nowi shuhdagi ch ed k ab wo i him k ab wo iawua ni-nehni ab.’

²⁵“K wabshaba hab kajj g Abrahambad, ‘Ni-hajuni, am g i chegito map wa in d doakam ch wehs ha'ichu s-kehg edgid. K wa g Lazarus d wabsh si sho'igkam ch wabshaba hemuch ab si s-ap e tahtk iia. Kup ahpi g s-ko'ok tahtk. ²⁶Gamai wa ba'ich o an ge s'tadani ch s-juhk hiktani an t-tahgio. Kutt pi wo t-nako machs hedai am gahi wo i chesh em-wui o mamt ahpim ab gahi wo i chesh t-wui.’

²⁷⁻²⁸“K hab kajj g s-kais o'odham, ‘Pegih, ni-shohshon, am ani hetasp wepnag. K idam am wabsh kia d dodakam ch am kih ni-ohgbad kih am. Ab g si i s-ni-ho'ige'id k am wo cheha g Lazarus mat am wo him k am wo ha shohbi. T pi ia hu ha'ab wo dada mo ia g s-ko'ok e tahtk.’

²⁹“K hab kajj g Abrahambad, ‘M-wepnag o edgid g Moses o'ohana ch Jiosh ha'ichu i tashogiddam ha-o'ohana. T heg am wo ha shohbi matp ab wo kaiha.’

³⁰“K hab hahawa ep kajj g s-kais o'odham, ‘Ni-shohshon, Abraham, pi at woho ab wo kaiha. Pt wabshaba hema hab wo sha juh mat ep wo e chegito. T ab wo kaiham k gm hu wo s-ohhod g pi ap e-chegitoi.’

³¹“K hab kajj g Abrahambad, ‘Pi o ab hu kaiham g Moses o'ohana ch Jiosh ha'ichu i tashogiddam ha-o'ohana. K am wa tasho mat hab wa'ap pi ab hu wo wohoch hegai matp hems ep wo e chegito.’ Neh, bo kajj ch am dagito.”

Jesus ha'ichu ahga ab amjed g pi ap'ekam

An g neid g Matthew 18:6-7, 21-22; Mark 9:42

17 Sh hab hahawa ep kajj g Jesus ab ha wui hegam mash ab hiwig, “Chum o hekid ha'ichu hab e wua mamtp hems heg hekaj am wo i shul pi ap'ekam ch ed. T wabshaba s-ko'okam wo e namkid hegai mat hab wo em-juh mamt am wo i shul. ²Ba'ich at wo i s-ap'ek wehhejed matp hems wo e wachumchud k wo e mua. T hab pi am hu wo ha shul g al

ni-wohochuddam pi ap'ekam ch ed.

³Am g wo s-e nen'oidad!

“Mt wo ahgi g e-wehm wohochuddam matp pi ap wo chu'i ab em-wui. Kutp hems ab s-ap wo em-kaiham k gam hu wo s-ohhod g pi ap e-chegitoi. Kumt ab wo i s-ho'ige'el. ⁴Tp hems mu'ikko hab wo juh g pi ap'ekam ab em-wui hemako tash ed. Mt wabshaba chum hekid ab wo i s-ho'ige'el mat hekid gam hu wo s-ohhod g pi ap e-chegitoi k ab wo em-tai g ho'ige'elig.”

**Mamt ge'e ha'ichu hab wo juh
g al chum wohochudadagkaj**

⁵Sh hab kajj g Jesus chuhchai ab wui, “T-kownalig, ab g i ge'edajid g t-wohochudadag.”

⁶Kush hab kajj g Jesus, “Pi am tatchua g ge'e wohochudadag. Wehs at hab wo e juh hegai mamt hab wo che'e k wo s-wohoch mat hab wo e juh. Mtp hems am wo ahgi ihda gohi uhs mat wo e huhpshan k ged hu wo e ei ge shuhdagi ch ed. Kut wa woho hab wo e juh.”

**Mamt hab wo masmak
mo g ha-pionag**

⁷Sh g Jesus am ha'ichu ha wepogid ch hab kajj, “Pi o ab hu sha'i ab g ha-ahmo mas wo ha hihidol g e-pionag, chum as hegam ge tash oidam am chikpan oidag ch ed. ⁸Pion at wo hihidol g e-ahmo k wo gegosid k hahawa hejel wo e gegos. ⁹Ab o ha ab mat am hab wo wa juh hegai mo haschu am hab i ha chehani. Kut pi hab wo chum el mas ab wo ha ho'ige'el. ¹⁰Pegih, bo wa masma am em-wehhejed.

Wehs amt ha'ichu am hab wo juh mo haschu ab i em-chehani g Jiosh k hab wabsh wo e ahgad mam d wabsh pion ch am hab wabsh juh g e-chikpan.”

**Matsh g Jesus wehst-mahm ha doaj heg
amjed mo g ha-chuhkug muhkhim**

¹¹Sh am wabsh kia hihim hegam Jesus Jerusalem wui ch am hihi ha shahgid g Samaria chekshani ch Galilee chekshani. ¹²Sh am hema d al kihhim. Kush am ha'i dadha jeg ed nash pi kok'o heg hekaj mo g ha chuhkug muhkhim ch chum pi ha doajig. Tsh am i chum wahp hegam Jesus mash em kihjeg g kolhai. Tsh idam kok'odam am cheh g Jesus k i wahpamig k d wehst-mahm ch am nam k ga hu wabsh meh k gegok ¹³ch amjed s-kaidam hab kajj, “Jesus, t-kownalig, ab g i s-t-ho'ige'id.”

¹⁴Sh ab ha neid g Jesus ch hab kajj, “Gamai g wo hihim k ab wo e-chehgi papal ha wui.”

Tsh am he'es i hihim k s-mai matki ha doda. ¹⁵Kutsh hema ab uhpam i hih am i s-mahchk mat doa k ab si ihm g Jiosh si s-kaidam ¹⁶k atsh am si gei jewed dahm ab Jesus wecho k ab si ho'ige'el. Kush eda ihda pi d Tuhligo ch d wabsh Samaria t am o'odham.

¹⁷Kush hab kajj g Jesus, “A nant pi woho wehst-mahm o'odham ha dodaj. ¹⁸T eda al hemako ia uhpam jiwia k ab ho'ige'el g Jiosh k d wabsh go'ol o'odham. ¹⁹Kekiwuani k gamai hihm. Ab ap ni-hiwig ch heg hekaj doa.”

**Matsh has masma wo i wuhsh g
Jiosh kownaltalig**

An g neid g Matthew 24:23-28, 37-41

²⁰Sh ha'i g Palasi hab si kajj ab wui g Jesus, “A pt hekid hig am wo

i t-chehgi ihda Jiosh kownaltalig map an ahgachug?”

Kush hab kajj ab ha wui, “Pi amt g e-wuhpuikaj wo nei g Jiosh kownaltalig ²¹mams hab wo chei, ‘Ia o ha'ichug’ o ‘Gd o hu ha'ab ha'ichug.’ K eda am em-shahgid.”

²²Sh amjed hab kajj hegam ha wui mash ab si wecho e mashcham, “Ab o him g tash mamt wo chum tatchuad mant ia wo em-wehmajk chum hems hemako tash ab ahni Jiosh si Kehsha. Nt wabshaba pi ia hu wo ha'ichugk. ²³Ha'i at hab wo kajjijid ‘Gad g hu wo neid g Jiosh si Kehsha’ o ‘Ia g hu wo neid.’ Mt wabshaba pi am hu wo i ni-gahghi. ²⁴Wehsko ant wo ni-chehgi mant hekid ep wo jiwia jewed dahm hab sha masma mat g wepgi s-masma an gahi wo kekiwua chewagi ch ed. ²⁵Nt wabshaba hemu mu'i wo ni-sho'igch. T pi ab hu wo ni-tatchua idam hemajkam ai'i idani.”

Mash pi hedai s-ap mahch mas hekid ep wo jiwia g Jiosh alidag

²⁶Kush hab ep kajj g Jesus, “Bat wo masmak mant hekid ep wo jiwia mash wa hab chu'ig eda mash g Noahbad in d doakam. ²⁷Hemajkam ash wa gam ha wabsh i si nenead ch e gegosid ch ih'ed ch e hohont ch gam hu wabsh i pi chegito g Jiosh. T haha wabsh e ai g tash mat hegam Noahbad am i wahp ge'e wahlko ch ed. Kut mel g shuhdagi k ha wi'in k wehs ha kokda.

²⁸“Bat ep wo masmak mash wa hab masma mash wa g Lotbad in d doakam. Wehsijj ash gam hu wabsh i si nenead ch e gegosid ch ih'ed ch

ha'ichu ha nolawt ch ha'ichu gagda ch ha'ichu e'asha ch kihkit. ²⁹Kutsh wa g Lotbad ab i wuhsh Sodom kihhim t amjed. Tsh g mei ch ha'ichu s-mehidkam ab ha dahmjed i e iawua hab sha masma mo g juhki. Kutsh wehs e kokda.

³⁰“Bat wo wa masmak heg i tash mant am wo i ni-maskogi. ³¹Kut pi hedai am hu wo sha'i chum i wah e-kih ed mat am wo ha'ichu ui, chum as hems imhab wo wa'i oimmedad e-kih wehgaj o am wo chikpanad oidag ch ed. ³²Pi at chum hems wo s-huwi g e-kihdag. Batsh wa e juh g Lotbad hohnigbad k hekaj e muhkid. ³³Bat wa masma wo heb hu wua g e-doakag hegai matp hedai wo chum s-huwidad g e-doakag hejel e wehhejed. T wabshaba wo do'ibia g e-doakag hegai matp hedai wo hekaj ni-wehhejed. ³⁴Tp hems gohk am wo kokkshad e-kih ed ch hema gam hu wo i e be k hema am wo wih mant hekid ep wo jiwia. ³⁵Gohk u'uwi atp hems am e wehm wo chu'ad g pilkani. T hema gam hu wo i e be k hema am wo e wuiok. [³⁶Gohk o'odham at am wo oiopod oidag ch ed. T hema gm hu wo i e be k hema am wo e wuiok.]”

³⁷Sh hab kajj g chuhchaj ab wui, “A t hebai hab wo i e juh ihda?”

Sh hab kajj g Jesus, “Am at wo tashok mat hebai hab e juh. Namt hig pi wo mahchk mat hebai wo kahchk g muhki am neidch mo am e hemapadch g nunuwi? Pegih, mt hab wa'ap wo s-ap s-mahchk mat hebai hab wo i e juh ihda mani em-ahgid.

Mamtsh pi hekid wo dagito g e-ho'ige'idahuna

18 “Chum amt hekid wo e ho'ige'idahunad am Jiosh

wui ch pi hekid wo dagito,” bash kaij g Jesus ch am hahawa ha ahgid ihda ha'ichu wepogida ahga:

²“Tp hems am hebai hema d usagakam ch wabshaba pi ab hu has elid g Jiosh ch pi ab hu ha ha'ichuchud g hemajkam. ³⁻⁴T am wui hema jiwia g hejel wi'ikam uwi k ab tai mat am wo i wehmt namsh pi s-lodaitamk. T pi ab hu wohog el. K wabshaba id chum hekid ab wui jijiwia.

“Kut hab i e ah g usagakam, ‘Chum ani hi wa pi ab hu has elid g Jiosh ch pi ab hu ha ha'ichuchud g hemajkam. ⁵K wabshaba sha'i si ni-kudut ihda uwi ch wo am hu ni-gewkoch pi ni-dagitok. Nt heg hekaj am hab wo juni hegai mo ab ni-chehani.’ ”

⁶Sh hab hahawa ep kaij g Jesus, “Neh, bat wo ha juni g pi ap'ekam usagakam hegai mo haschu chum hekid ab tahni. ⁷Pegih, bamt wa masma chum hekid ab wo tahnid g Jiosh g i wehmtadag. ⁸Kut s-hohtam am wo i ap'ech ha'ichu am em-wehhejed. T eda mu'i am wo e cheghi mo pi wo ho ab hu ni-hiwig mant hekid ia ep wo jiwia jewed dahm.”

Ha'ichu wepogida ahga ab amjed g Palasi ch lial kowlantdam

⁹Ha'i ash hab e elid g hemajkam mo d s-ap'ekam ch eda hab ha elid ha'i ehp mo d pi ap'ekam. Sh g Jesus am ha ahgid ihda ha'ichu wepogida ahga:

¹⁰“Neh, gohk o'odham at am hihi ge'e cheopi wui mat wo e ho'ige'idahu. K hema d Palasi ¹¹ch am hejelko kehk ch am e

ho'ige'idahun ch hab kaij, ‘Ab ani si m-ho'ige'id, Jiosh, mani pi s-banma ch pi hekid ha'ichu ha iattogid ch pi am hu hab junihim g s-uam ha'ichu hab masma mo chum hedai hab e junihim. Ab ani m-ho'ige'id mani pi hab masma mo hegai pi ap ha kowlantdam m an kehk.

¹²Gohk tash ani ni-ho'ige'idahun ch pi ha'ichu ko'a domig ed ch ab m-mahk g hemako tahpani mo wehst-mahm e tahpanch mani he'es ha'ichu ab i neid.’ Neh, bo wa masma e haschud g Palasi.

¹³“K wabshaba hegai hema ga hu wabsh mehk kehk ch pi e nako mas ab wo uhgk i nea dahm kahchim wui no pi si e sho'igchud. Id o hab kaij, ‘Jiosh, ab g si i s-ni-ho'ige'id ahni pi ap'ekam hemajkam.’ Neh, bo kaij hegai hema.

¹⁴“Kunt wo em-ahgi mat id am i ap'ech g Jiosh e tahgio. T s-ap e taht k hih uhpam. T g Jiosh pi am hu i ap'ech hegai Palasi. Do wohokam mat g Jiosh wo ha'ichuch hegai mat hedai hejel pi wo e ha'ichuch k wo pi ha'ichuch hegai mat hejel wo chum e-ha'ichuch.”

Matsh g Jesus s-ha ho'ige'el g chu'uchum a'al

An g neid g Matthew 19:13-15; Mark 10:13-16

¹⁵Sh ha'i g o'odham am ha u'apa g al chu'uchum a'al Jesus wui mat ab wo ha taht. Kush g chuhchaj ha neid ch chum s-ha keh'id mo hab e wua. ¹⁶Tsh wabshaba g Jesus ab i ha wai g a'al k hab kaij ab ha wui g e-chuhchai, “Ab g wabsh wo i ha hiwigid g a'al mat ab wo i hihi ni-wui k pi an hu wo sha'i ha shohbi. Am at wabsh s-moimam

wo i wahp Jiosh kownaltalig ed ab ni-hiwigch. ¹⁷Nt wo si shel em-ahgi mamt hab wa'i masma wo i wahp.”

Mash am hema chum s-e do'ibiamk g s-kais o'odham

An g neid g Matthew 19:16-30; Mark 10:17-31

¹⁸Kush hema g Tutuligo ha wanimeddam ab kakke g Jesus ch hab kajj, “Ha mashchamdmap d s-ap'ekam, shahchu ant am hab wo juh mant ab wo bei g pi ha huhugedam doakag?”

¹⁹Sh hab kajj g Jesus, “Pi ap mahch map haschu ahgch hab ni-a'aga mani d s-ap'ekam. Heg o wa'i Jiosh d s-ap'ekam. Kup pi woho mahch mani hedai wud.

²⁰S-ha ap mahch idam chehanig mo hab chu'ig:

Pi g am hu ha ehsidad g ha-wehm kihkam.

Pi g am hu ha mua'i g o'odham.

Pi g am hu ha'ichu ha ehsidad.

Pi g am hu ha'ichu ha iattogidad.

Ab g si has ha elidad g e-ohg ch e-je'e.”

Exodus 20:14, 13, 15-16, 12

Neh, bash kajj g Jesus.

²¹Sh hab kajj ihda o'odham, “Wehs ihda ani hab junihim ged hu i ni-alijk amjed.”

²²Tsh am i kah g Jesus ihda k hab kajj ab wui, “Hemako ha'ichu o am wi'is mapt am hab wo juh. Wehs apt wo gagda map haschu i edgid k wo ha mah g namkigaj g sho'igkam k ab wo i ni-oid k am wo ni-wehmajk. Bapt masma wo edgidad g s-kaistalig an dahm kahchim ch ed.”

²³Tsh si pi ap e taht ihda o'odham am i kaiok nash pi d sha'i si s-kais ch si s-huwid g s-e-kaisdag.

²⁴Tsh am i nei g Jesus mo pi ap e tahtk k hab kajj, “Sha'at wa'i si s-kawkam wo i wahp Jiosh kownaltalig ed hegam mo d s-kakais. ²⁵Nam hig hab elid mat wo e nako g ka-mihyo mas am wo gahi wuhsh ho'ipad jeg ed. Pegih, t hab wa masma pi wo e nako hegam mo hiwig g ha'ichu e-eniga mas am wo i wahp Jiosh kownaltalig ed.”

²⁶Sh hab kajj idam, “A t hedai wo e nako mat wo e do'ibia.”

²⁷Sh g Jesus hab kajj, “Pi at hedai wo e nako mas hejel wo e do'ibia. T wabshaba g Jiosh wo e nako mat wo ha do'ibia.”

²⁸Sh g Peter hab kajj, “Neh, ahchim att am i dagito g t-kihdag matt wo i m-oi.”

²⁹⁻³⁰Sh hab kajj g Jesus ab ha wui, “Woho amt hab e juh. Kunt am wo em-ahgi mat g Jiosh ba'ich i ge'e ha'ichu ab wo em-mah ia jewed dahm ahpim mamt hedai wo dagito g e-kihdag o g e-wehm kihkam o g e-wepnag o g e-jehj o g e-a'aliga wehhejed g Jiosh kownaltalig. T am i dahm g pi ha huhugedam ap'edag ab wo em-mah e-kihdag ed.”

Mash g Jesus idani waikko am ahg g e-muhkig

An g neid g Matthew 20:17-19; Mark 10:32-34

³¹Kutsh am hejelko i ha ui hegam gamai gohk e-chuhchai k hab kajj ab ha wui, “Neh, am att wo hihi Jerusalem wui. T am hab wo e juh am ni-tahgio hegai mo wa g kekelibad Jiosh ha'ichu i tashogiddam an o'ohan ab ni-amjed.

³²Am amt wo i ni-dagito ha wui g gawul mahs hemajkam. T hegam wo nahnko ni-ahgad ch ab wo

ni-siswuimad ³³ch wo ni-gewittan k hahawa wo ni-mua. Nt wabshaba ep wo ni-chegito mat d wo i waik tashk amjed.”

³⁴Kush wabshaba pi sha'i amichud mas haschu hab ahg g Jesus. Heg o wa wepo mo e e'estokch g ha'ichu ahgaj.

Matsh g Jesus hema doaj g pi neadam

*An g neid g Matthew 20:29-34;
Mark 10:46-52*

³⁵Sh am hihim hegam Jesus miabidch g Jerico. Sh g pi neadam am hema daha wohg hugid an ch ha'ichu ha nead.

³⁶Kutsh an bibbij. Sh id ha kah ch ab ha kakke mas haschu an has e wua.

³⁷Kumsh hab ahgid, “An o him hegai Jesus mo ab Nazareth t amjed.”

³⁸Sh am si s-kaidam hab kajj, “Jesus, ab g si i s-ni-ho'ige'id, ahpi map d t-kownaligbad David amjedkam.”

³⁹Sh hegam mash am ba'ich hihim g Jesus si s-keh'id ch hab ahg mat wo pi shahmuni.

Kush wabshaba haha wabsh ba'ich i s-kaidam hab kajj, “Ab g si i s-ni-ho'ige'id, ahpi Davidbad amjedkam.”

⁴⁰Tsh am hahawa i kekiwua g Jesus k ha chehani mat ab wo i e bek g pi neadam o'odham. Tsh am i jiwia. Sh hab kajj g Jesus ab wui, ⁴¹“Shahchu ant hab wo m-juni?”

Sh hab kajj ihda, “Ni-kownalig, chum ani tatchua mant ep wo ha'ichu neidad.”

⁴²Sh hab kajj g Jesus, “Ha'ichu g neid. Doa apt nap pi ab ni-hiwig.”

⁴³Tsh am ha hekaj wabsh s-ap ha'ichu neid k ab si i ho'ige'el g Jiosh k gam hu i oi g Jesus. Tsh am i nei g mu'i hemajkam ihda k wehsijj ab si ihm g Jiosh.

19 Tsh am dada hegam Jesus Jerico t am k am wabsh gahi wo wuwaha. ²Sh am hema chum si s-neidamk g Jesus ch d uhgchu lial kowlantdam ch d si s-kais ch ash hab chehgig Zackias. ³Sh wabshaba sha'i mu'ij g hemajkam. Kush eda al shopolk ihda ch pi ap neid ⁴ch hekaj gam hu ha ba'ich meh g hemajkam k an i chesh uhs t an.

⁵Tsh am i ai g Jesus mo an da k ash an uhgk i neid k hab kajj ab wui, “S-hohtam g ab i huduni, Zackias. Ab ant wo jiwia m-kih am.”

⁶Kutsh ha hekaj ab i hud g Zackias k si s-hehgig ch ab i wahki e-kih ed.

⁷Kush wehsijj g hemajkam si s-ju'ujpij neneok ch hab kajj, “Ihda o'odham atki am wo i dahiwua heg kih am mo d wabsh pi ap hemajkam.”

⁸Tsh am i kekiwua g Zackias k hab kajj ab Jesus wui, “Neh'e, eda hugkam ant wo ha mah g sho'igkam g ha'ichu ni-eniga k uhpam ep wo ha namkid gi'ikko e dahm mantp he'es i ha banmad.”

⁹Sh hab kajj g Jesus ab wui, “Id o am chehgidch map wepo wohochudadag mo g t-shohshon Abraham ch hekaj e do'ibia id i tash ab. ¹⁰Id ant hekaj ia jiwia jewed dahm ahni Jiosh si Kehsha mant an wo i ha gahghim k wo ha do'ibia g pi ap chu'ijkam.” Neh, bash kajj g Jesus.

**Mamtsh wo chum i ge'edaj mo
haschu ab em-mahk g Jiosh.**

An g neid g Matthew 25:14-30

¹¹Pi ash sha'i tash matsh gam hu wo dada idam Jesus Jerusalem t am. Kush hab e ahg g hemajkam mat si e ai mat am wo i wuhsh g Jiosh kownaltalig. Tsh heg hekaj am ha ahgi g Jesus ihda ha'ichu wepogida ahga ¹²k hab kajj: "Hema o d sha s-has ha'ichu id eda ha'ichu ni-ahga. Kum am waid meh k jewed amjed mamt wo kownalch. ¹³T pi koi him k ab i ha wai g wehst-mahm e-pionag k wehsijj g hemako ohla lial ab i ha mahkhi mat wo hekaj k am wo i mu'idaj mat am wo i hih. ¹⁴K eda mu'ijj pi hohho'id g wehmayj o'odham ch am ha'i i e chuhcha mat am wo hihim k hab wo chei mo pi hohho'id mat d wo ha-kownaligk ihda o'odham.

¹⁵"Kumt wa woho hab juh hegai s-has ha'ichu o'odham mamt kownalch. T am i uhpam jiwia k am ha hekaj ha wai hegam e-pionag mat am wo dada k am wo e ah mat he'ekia i dahm nahto g lial heg amjed mat wa ab ha mah.

¹⁶"K g wehpepkam hab kajj am jiwiak, 'Ni-kownalig, wehst-mahm lial ant nahto am dahm hegai hemako mapt ni-mah.'

¹⁷"K hab kajj g ahmoj, 'S-ap apt hab e juh k d si s-wagimakam ni-pionag. Bant wo m-juh mapt wehst-mahm kihhim wo nuhkud napt pi s-ap nuhkud g al chu'uchum ha'ichu.'

¹⁸"K hema ep hab epai kajj am jiwiak. 'Ni-kownalig, hetasp lial ant

nahto am dahm hegai hemako mapt ni-mah.'

¹⁹"K id hab ahg g ahmoj, 'Bant wo m-juh mapt hetasp kihhim wo nuhkud.'

²⁰"K hema ep hab epai kajj am jiwiak. 'Ni-kownalig, m ia kahch g m-lialiga. Gd ant hu si wuh pa-nihda ch ed k ged hu si ehsto.

²¹S-m-ehbid ani heg hekaj map s-ta ke'idama. Am ap wabsh u'u hegai map haschu pi chikpan ch am bahbhiam hegai ha'ichu bahidag mo pi d m-esha.'

²²"K hab kajj g ahmoj ab wui, 'Hegai map has i kajj ant hab masma wo m-mohto'i g chu'ijig, ahpi s-padmakam pion. S-mahch apki mani s-ta ke'idama ch wabsh u'u hegai mani haschu pi chikpan ch ab i bahbhiam hegai ha'ichu bahidag mo pi d ni-esha. ²³Pegih neh, pt haschu ahgk pi am hu cheh g ni-lialiga wahnko ch ed mant ab uhpam wo ui wehnadk hegai mat haschu ab mahmadt.' ²⁴k hab hahawa kajj ab ha wui hegam mo am gegok, 'Gam g wo si wohppo'id hegai lial k heg wo mah mat g wehst-mahm lial nahto.'

²⁵"K hab kajj idam ab wui, 'T-kownalig, heki o hu wehst-mahm lialiga.'

²⁶"Sh hab kajj ab ha wui, 'Pi at has e juh nat pi ba'ich ha'ichu ab ep wo i nei hegai mat s-ap wo nuhkud g e-nuhkuda. T wabshaba wo e wohppo'idach mo he'es al i chum nuhkud hegai mat pi ap wo nuhkud. ²⁷Kumt ab wo i ha u'u k wo ha kokda am ni-tahgio hegam ni-obga mo chum pi tatchua mant d wo ha-kownaligk,' bo kajj g ha-ahmo id eda ha'ichu ni-ahga."

**Mash mu'ijj si s-hehgig ch ahg mo g
Jesus d Jiosh si Kehsha.**

An g neid g Matthew 21:1-11;

Mark 11:1-11; John 12:12-19

²⁸Kutsh gam hu hahawa hihi idam Jesus Jerusalem wui. Sh g Jesus am ha ba'ich him. ²⁹Kush gohk al kihhimag ch hab chehgig Bethphage ch Bethany ch ab hugidaj ab g Olive U'us Kawulk. Tsh gohk am ha cheha g e-chuhchai ³⁰k hab ha ahg, "Am g wo hihim heg wui kihhim m am mia kehk k am wo i wahp. T am wo hema e wulshch g wechij wuhlu mat koi sha'i e chesh. Id amt wo wul'ok k ab wo i wanim. ³¹Kutp hema wo sha em-kakke mams haschu ahgk wul'o, mt hab wo ah mani ahni em-mashchamdahm tatchua."

³²Kutsh wa woho am hihi hegama gohk. Kutsh hab masma hab e juh mash hab ha ahgid g Jesus. ³³Kush am wupul'ok hegai wuhlu. Sh hab kajj g enigakam mas haschu ahgk am wul'o.

³⁴Sh hab kajj hegama, "T-mashchamdahm o tatchua." Kutsh ha hiwigi.

³⁵Tsh gam hu i wanim g wuhlu Jesus wui k an toa g e-liliwa wuhlu dahm k an i cheshaj g Jesus. ³⁶Kush am him cheshajch. Sh idam g e-liliwa am i to'ahim wohg oidk.

³⁷Sh am i aihim g Jerusalem. K g wohg am agshp i huduni ab amjed g Olive U'us Kawulk. Sh mu'i hemajkam an ha wehgaj ch ab i ho'ige'id g Jiosh ch ab si ihm si s-kaidam heg hekaj si ge'e ha'ichu mo neidchkahim ch hab kajj:

³⁸"Jiosh at wo s-m-ho'ige'el ahpi mapt ia jiwia wehhejed.

Psalms 118:26

Si ge'e s-hehgig o an ha'ichug dahm kahchim ch ed ch si ge'e has elidadag ab wui g Jiosh."

³⁹Sh am ha'i gegok g Palasi ch hab kajj ab wui g Jesus,

"Ha mashchamdahm, ha g chehani mat wo ha'asa hab chei."

⁴⁰Sh hab kajj g Jesus, "Neh, matp idam wo ha'asa hab chei, kut chum hems g hohodai si s-kaidam ab wo ihm ad g Jiosh ni-hekaj."

**Matsh g Jesus shosha wehhejed
g Jerusalem t am hemajkam**

⁴¹Sh am i aihim g Jerusalem. Kutsh shosha g Jesus ⁴²k hab kajj, "Mat hu wo i s-mahchk g Jerusalem t am hemajkam id i tashkaj mat has wo e juh k wo e do'ibia. ⁴³Ab o him g tash mat wo ha biha g ha-obga k wo ka kuh ⁴⁴k s-ap wo ha hugio wehsijj hegama mat am wo ha'ichugk k wehs wo wuahawua g kihhim. K pi sha'i mahch mat idani wo chum ha do'ibia g Jiosh."

**Matsh g Jesus gam hu si i ha wuwhas
hegama mo am uamhun g ge'e cheopi**

An g neid g Matthew 21:12-17;

Mark 11:15-19; John 2:13-22

⁴⁵Kutsh am hahawa hih g Jesus k ged hu jiwia ge'e cheopi t am. Sh eda am ha'i dadha ge'e cheopi wehgaj ch am ha'ichu gagda. Kutsh gam hu si i ha wuwhas ⁴⁶hab kajjch ab ha wui, "Bo chu'ig g Jiosh o'ohana mo hab kajj g Jiosh:

'Ahni o d ni-wehhejedkam ihda ge'e cheopi.

T ab wui wo hihimad g hemajkam ch ab wo si has ni-elidad.' *Isaiah 56:7*

Neh, bo kajj g Jiosh. Kumt eda an be k am eda hab wabsh wua g hejel e-tatchui ch chum hems ha'ichu s-a'agi ha ehsid ab ha wui ha'ichu gagdach.”

⁴⁷Kush wehs tashkaj am ha mashcham g Jesus ge'le cheopi ch ed. Sh hegam u'ugchu papal ch chehanig ha mashchamdam ch ha wanimeddam g hemajkam chum s-mu'amk. ⁴⁸Sh wabshaba g hemajkam chum hekid ab si kaiham. Kush heg hekaj pi e nakog hegam mash chum s-mu'amk.

Mamsh ab kakke g Jesus mas hedai amjed u'ukch g e-gewkdag.

An g neid g Matthew 21:23-27; Mark 11:27-33

20 Sh am hu hebai g Jesus am ha mashcham g hemajkam ge'le cheopi ch ed ch am ha ahgid g s-kehg ha'ichu ahgaj g Jiosh. Kutsh am dada g u'ugchu papal ch chehanig ha mashchamdam ha wehm g ge'eged ²k hab kajj ab wui, “Dohp hab chum elid map ab amjed ab u'ukch g e-gewkdag ch am hab ha'ichu wua. Oi g am t-ahgid.”

³Sh hab kajj g Jesus ab ha wui, “Pegih, nt ahni wehpeg ab epai ha'ichu wo em-kakke. Am g wo ni-ahgid ⁴mams hedai hab elid mat ab mah g Johnbad g gewkdag mat wo ha pahl wapko. Nat g Jiosh ab mah aha nat wabsh g o'odham?”

⁵Kush idam am wabsh hejel si a'aga ch hab kajj, “Shahtt hig wo chei? T ab wo t-kakke matt haschu ahgk pi ab hu wohoch mattp hab wo chei mo ab Jiosh amjed u'ukch g gewkdag. ⁶T g hemajkam wo t-ma'ichshul mattp hab wo chei mo ab wabsh o'odham amjed u'ukch.

Mu'ijj o hab elid mo d Jiosh ha'ichu i tashogiddam.”

⁷Neh, bash kajj ch ab hahawa uhpam i e nohnogi Jesus wui k hab kajj, “Pi ach sha'i mahch mas hedai amjed ab u'ukch g e-gewkdag.”

⁸Sh hab kajj g Jesus ab ha wui, “Pegih, nt ahni hab wa'ap pi wo em-ahgi mani hedai amjed u'ukch g ni-gewkdag ch hab wua wehs ihda.”

Ha'ichu wepogida ahga ab ha amjed g uhdwis oidag nuhkuddam.

An g neid g Matthew 21:33-46; Mark 12:1-12

⁹Neh, bash kajj g Jesus ch am hahawa ha ahgid g hemajkam ihda ha'ichu wepogida ahga hab kajjch: “Neh, matp hems hema am ei g uhdwis e-oid ed k hab hahawa i e ah mat gam hu hasko mehk wo him k pi oi wo jiwia. Kut ha'i wo nuhkudad g oidaj ch wo namkid hegai mo haschu ab d i chum wuikamaj. Pegih, t am ha shulig k gam hu hih. ¹⁰Kut am i e ai mat wo bai g uhdwis. T am hema cheha g e-pionag mat am wo him k ab wo i u'idk g wuikamaj. T wabshaba g nuhkuddam gewichkwua g pionag k pi ha'ichu sha'i mah. Kut gam hu uhpam hih.

¹¹“T g enigakam hema ep cheha g e-pionag mat am wo hih. T id ep gewichkwua g nuhkuddam k si s-ta edam sho'igchud k pi ha'ichu sha'i mah. T gam hu uhpam hih.

¹²“T g enigakam hema ep cheha mat am wo hih. T hab wa'ap s-ko'okam has juh k gam hu si wuhshad.

¹³“K hab hahawa kajj g uhdwis oidag enigakam, ‘Neh, si ni-tatchuidch ni-alidag ant wo

cheha mat am wo hih. Heg at hemho ab wo wa has el.’

¹⁴“T heg gan hu hih. T wabshaba ab i nei hegam nuhkuddam k hab kajj ab a'ai e wui, ‘Id o d enigakam alidag. Tt hig wo mua. T d wo t-enigak g uhdwis oidag.’ ¹⁵T wa woho hab e juh k gam hu si i wuhshad ab amjed g uhdwis oidag k am i mua.”

K hab hahawa ep kajj g Jesus, ¹⁶“Neh, nat hig pi woho wo ha kokda g oidag enigakam k am ha'i ep wo ha hiwigi mat wo nuhkud.”

Tsh am i kah ihda g hemajkam k hab kajj, “Ih, pi at woho hab wo e juh hegai map am t-ahgid.”

¹⁷Kush ab si ha neid g Jesus ch hab kajj, “Woho at hab wo e juh. K g Jiosh o'ohana am tashogid mamt hab wa masma wo s-ni-ohhod. Id o hab ahgch hab chu'ig g wepogida ahga Jiosh o'ohana ed:

Kihtdam at wo chum hema s-ohhodam g hodai.

T wabshaba id d wo si s-has ha'ichu hodaik am ha-kihta wehhejed. *Psalm 118:22*

Neh, bo chu'ig g Jiosh o'ohana.

¹⁸Kut wo e sho'igch hegam mat pi wo ni-amich. Id at heg wo wa wepok mat ab wo e keiko hodai t ab. Kut wo bei g s-ko'ok e-namkidadag hegam mat wo s-ni-ohhod. Id at heg wo wa wepok mat g hodai ab ha ab wo gehsh k am wabsh wo s-ha wia.”

Ha'ichu kakkei ab amjed g kownal kowlanta.

An g neid g Matthew 22:15-22; Mark 12:13-17

¹⁹Neh, bash kajj g Jesus ch hegam hab ha ahg chehanig ha mashchamdham ch u'ugchu papal.

Kutsh hegam heg hekaj wabsh chum si s-behim. Sh wabshaba mu'ijj g hemajkam ab si has elid g Jesus. Sh idam ha mashchamdham ch papal s-ha ehbid ch pi am hu be ²⁰k wabsh am s-nen'oid mat am wo ha ap'et. Tp hems ha'ichu hab wo chei mat heg ab wo abchud k an wo be k am wo i dagito kownal wui. Tsh heg hekaj ha'i ha namkid mat am wui wo hihim k ab wo ha'ichu kakke k wo heki himch.

²¹Sh hab kajj idam ab wui, “Ha mashchamdham, s-mahch ach map wabsh chum hedai ha mashcham g wohokam ab amjed g Jiosh himdag, chum as has wo chei hedai i. ²²Pegih, k am wo t-ahgi maps has elid g ge'e kownal kowlanta. No hig t-hiwgid g t-chehanig ahchim Tutuligo matt wo ha namkid aha no pi t-hiwgid?”

²³Sh wabshaba g Jesus s-ha amichud mo g pi ap'ekam hab elid ch hab ha ahg, ²⁴“Ab g wo hema ni-chehgid hegai lial mam hekaj ha namkid.”

Kumtsh ab hema chehgi. Kush hab ha ahg, “Am g wo ni-ahgid mo hedai wuhiosha ch hedai chehgi ab o'ohadag id ab lial?”

Sh hab kajj idam, “Hegai mo d uhgchu t-kownalig.”

²⁵Sh hab hahawa ep kajj g Jesus, “Pegih, ab g wo i dagito kownal wui hegai matp d enigaj k am epai wo i dagito Jiosh wui mo haschu d epai enigaj.”

²⁶Kutsh pi e nako idam mas wo heki himch am ha tahgio g hemajkam k oi wa am wabsh i pi has kajj ch si has i el mat has masma ab i nodagi g ha-kakkei.

**Mash am ha'i ne'owin g Jesus ab
amjed g muhkig i wuhshanig.**

An g neid g Matthew 22:23-33; Mark 12:18-27

²⁷Tsh am ha'i dada Jesus wui hegam mash hab e a'aga Sajusi. Idam o d ha wohochudadag mat g Jiosh pi ep wo ha chegitoich g ko'i. Sh ab kakke idam ch hab kajj, ²⁸“Ha mashchamdandam, an o hab chu'ig ihda chehanigaj g Jiosh Mosesbad o'ohana ed ch hab chu'ig matsh g oidchkam wehngaj hegai mat wo muh pi ha a'aligak hemho wo wa bei g hohnigaj g e-wehnagbad. Tsh g a'aligaj hab masma wo e kuint mat d wo a'aligajk hegai mat muh. ²⁹Pegih, k am hu hebai wewa'ak d e-wepngam. Kut g si ge'echu ge hohnt k pi ha a'alidtok am i muh. ³⁰T g oidchkam an bei ihda uwi k hab wa'ap muh. ³¹T amjed g waikkokam an be k hab wa'ap muh. T wehsijj hab e juh idam wewa'ak mat pi ha a'alidtok ko'o k huhug. ³²T gam hu si ha oidk heg ep muh uwi. ³³Pegih, k idam wehsijj hohnigkahim. Kut hedai d wo hohnigk matp g ko'i ep wo i wuwaha?”

³⁴Sh g Jesus hab kajj ab ha wui, “Ia o wa'i e hohont g hemajkam jewed dahm. ³⁵⁻³⁶K wabshaba pi hab chu'ig an Jiosh kihdag ed. Jiosh at uhpam wo ha chegitoich g e-do'ibiakam k am wo i ha wahpki e-kihdag ed. T hahawa pi wo e hohontad ch pi wo ko'od hab masma mo g anghil hab chu'ig. ³⁷Mosesbad atki wa an o'oha mash wa g Jiosh am e chehgid wui heg hekaj sha'i mash meihid ch pi meitto. Sh hab kajj g Jiosh:

Ahni ani d ha-Jioshga hegam
Abraham ch Isaac ch Jacob.

Exodus 3:6

Neh, id o hab kajj g Jiosh, chum as heki hu koi, no pi am e wehm ha nuhkud ch ab uhpam wo i ha wuwahas muhkig amjed. ³⁸Pi amt wabsh woho wo i huhug am i ko'ok matp g Jiosh d em-Jioshga.” Neh, bash kajj g Jesus.

³⁹Kush ha'i hegam mo d chehanig ha mashchamdandam ab neneok ch hab kajj, “S-ap apt hab chei, ha mashchamdandam.” ⁴⁰Tsh amjed pi hedai e nako mas ab ha'ichu ep wo kakke.

**Ha'ichu kakkei ab amjed g Jiosh si
Kehsha.**

An g neid g Matthew 22:41-46; Mark 12:35-37

⁴¹Sh hab kajj g Jesus ab ha wui, “Am g wo oidahim mas hedai d wo Jiosh si Kehshak. Bo e a'aga matsh d wo amjedkamk hegai t-kownaligbad mash hab chehgid David. ⁴²Kush wa eda g Davidbad hab a'aga 'ni-kownalig' natsh o'oha ihda mo an hab chu'ig ne'i ed heg eda Jiosh heki hu o'ohana:

Bo kajj g Jiosh ab ni-kownalig wui:

In g dahiwua s-apkojed ni-hugid an.

⁴³Kunt wo ha gewito g m-obga mat ab wabsh s-ap wo m-wechok. *Psalms 110:1*

⁴⁴Neh, namt hig s-ap wo ah mat has masma d wo Davidbad amjedkamk ihda mash d kownaligaj?”

**Mamtsh pi hab wo masmak mo idam
chehanig ha mashchamdandam**

An g neid g Matthew 23:1-36; Mark 12:38-40

⁴⁵Kush wehsijj ab si kaiham g Jesus hegam mu'i hemajkam.

Kush ab ha ahgid g e-chuhchai ch hab kajj, ⁴⁶“Hegam mo d chum chehanig em-mashchamd am si s-apko dadhaiwup cheopi ch ed ch ge'e gegosig ch ed. Si o s-kehg e enigadad ch an oiopo no pi tatchua mamt ab wo si has ha elidad. Kumt wo s-e nen'oidad mamt pi hab wo masmak mo hegam. ⁴⁷Chum as si chew e ho'ige'idahun am em-tahgio ch eda ha'ichu s-a'agi ha wohppo'id hegam mo d hehe'ejel wi'ikam. T g Jiosh ba'ich i s-ko'okam wo ha namkid heg hekaj pi ap ha-chu'ijig no pi wabsh pehegia e ho'ige'idahun ch hab wua ihda pi ap'ekam.”

Hejel wi'ikam uwi mahkigdag

An g neid g Mark 12:41-44

21 Sh am hu hebai dadha idam Jesus mash am e shulig g ha-mahkigdag am wehhejed g ge'e cheopi. Kush g s-kakais mu'i am shulig g lial. ²Tsh am hema jiwia g al sho'igkam oks mash d hejel wi'ikam k atsh gohk s-o'amchu am shul. Kush am neid g Jesus ³ch hab ha ahg g e-chuhchai, “Neh, ihda al sho'igkam oks at ba'ich i ge'e mahkigdag hab juh mo hegam s-kakais. ⁴Hegam o ab wabsh mahk hegai mo haschu i pi tatchua no pi wabsh s-lialiga. T wabshaba ihda al oks wehs mah mo haschu al i edgid mat hekaj wo chum kihdagk.”

Matsh wo i e wua g Tutuligo ge'e ha-cheopi

An g neid g Matthew 24:1-2; Mark 13:1-2

⁵Kush am ha'i neneok ab amjed g ge'e cheopi ch am a'aga mo

si s-kehg hab mahs ch si s-kehg hohodaikaj hab junis ch si s-kehg mahkigdagkaj e heosid.

Sh hab kajj g Jesus, ⁶“Heu'u. Nt wabshaba wo si shel em-ahgi mo e aihim mat wehs wo i e shul ihda mam neid.”

Matsh g ge'e kudutalig wo i wuhsh

An g neid g Matthew 24:3-14; Mark 13:3-13

⁷Sh g chuhchaij ab kakke ch hab kajj, “Hekid at hab wo i e juh ihda? Kut haschu d wo chehgidak matt heg ab wo s-mahchk mo e aihim matki am hab wo e juh?”

⁸Sh hab kajj g Jesus, “Mt wo s-e nen'oidad ch pi am hu wo e iattogi. Mu'i at an wo i wuwha a'ahidag oidam k ni-wepo wo e chehcheg hab kajjch mo d Jiosh si Kehsha ch hab wo chei mat e ai g tash. Pi g am hu wo i ha oid idam. ⁹An at wo kaida mo am hahasko a'ai e cheggia g jejewed. Kumt wabshaba pi heg hekaj wo e kudutad, chum as hems wo wohok. Hemho wa at hab wo mahsk ha'ichu wehpeg. K wabshaba pi hab d ahga mat e ai mat wo huhug g jewed. ¹⁰Jejewed at ab a'ai wo i e cheggia. ¹¹T an a'ai hab wo e juh mat g jewed sha'i s-ta ehbidam wo u'ugij. T g bihugig wo gehsh k g s-cheawagig ab wo i hih. S-ta ehbidam ha'ichu at am wo i e chehgi ab dahm kahchim t amjed.

¹²“Mat koi hab wo e juh ihda, kumt an wo em-u'u k wo em-sho'igchud k am wo em-u'apa chechopi ha wui k wo em-kuh. Kumt wo e lodai am ha tahgio g kokownal nam pi ab s-ni-wohochud. ¹³Id at am wo em-ap'et mamt am wo ah g s-kehg ha'ichu ahgaj

g Jiosh. ¹⁴Pi g am heki hu wo e kudutad heg hekaj mamt has wo chei hejel e wehhejed. ¹⁵Ab ant wo em-mah g ne'oki ch amichudadag. Kut pi wo e nako g em-obga mas ab wo wui kekiwua mamt has wo chei. ¹⁶Em-jehj ch em-wepnag ch em-hajuni ch em-naipijju at am wo i em-dagito ha wui g haha'ichu. Kumt ha'ijj wo e ko'ij. ¹⁷Mu'ijj at wo s-em-keh'el nam pi ab ni-hiwig. ¹⁸Mt wabshaba s-ap am wo gahi wuwha mamtp has wo i em-juh ¹⁹k wabsh wo s-ha bahbgi. T g Jiosh wo em-do'ibia.

Mash g Jesus am ahg mat wo e padch g Jerusalem

An g neid g Matthew 24:15-21; Mark 13:14-19

²⁰“Shondal at an wo biha g Jerusalem. Kumt hab wo s-mahchk mo e aihim mat oi wo e padch g kihhim. ²¹Hemho wa at am wo ahhio dohda'ag wui hegama mat am wo ha'ichugk Judea chekshani ch ed. T hegama mo am ha'ichug Jerusalem kihhim t am hemho wa wo ahhio ab amjed. Kut hegama mo gam hu wabsh jegko kih pi am hu wo i wahp kihhim ch ed ²²nat pi wo e ai mat wo s-ko'okam ha namkid g Jiosh k am wo wohokamch wehs hegai mo an o'ohanas o'ohanaj ed. ²³Ih sho'ig! S-ta at ehbidam wo mahsk am ha wehhejed hegama mat wo chu'uchum mahmadk ch hegama mat wabsh wo kia wo'ok g ali. Ab at wo i hih g ge'e sho'igdag id dahm jewed. T g s-ko'ok ha-namkidadag ab wo gei ha ab idam hemajkam heg hekaj ha-chu'ijig. ²⁴Mt wo ha'i ha kokda k wo ha'i ha lilsochud

k gam hu wo i ha ui mehk jewed wui. Kut g gawul mahs hemajkam an wo bei ihda Jerusalem k ia wo i e chiwiadad am hugkam mat wo kuhgit g ha-ap'edag g gawul mahs hemajkam.

Matsh ep wo jiwia g Jiosh alidag

An g neid g Matthew 24:29-31; Mark 13:24-27

²⁵⁻²⁶“T wo e u'ugij mo haschu an hab chu'ig t-dahm. Kut s-ta ehbidam hab wo e juh g tash ch mashad ch huhu'u k wo dagito g e-wopogga. Kut g ge shuhdagi an wo wewgad ch an wo to'otonkad. T id wehs wo chehgi mat ge'e ha'ichu hab wo e juh wehsko jewed dahm. T g hemajkam wo si s-ehbidam wehs jejewed ch ed ch wo s-e chuhug nat ge wo mahchk mat haschu has wo e juh. ²⁷Kunt ab hahawa si s-masma wo i hud chewagi ch ed ab Jiosh kihdag amjed ahni Jiosh si Kehsha. Kut am wo e maskogi g ni-gewkdag. ²⁸Bat masma wo e chehgi mo ab e aihim g ha-do'ibiadag hegama mat ab wo ni-hiwgad. Kut heg hekaj wo chum si s-ap e taht mat hekid wo i shonwua ihda mani em-ahgid.”

Mamtsh has masma wo s-amich g jiwhiadaj

An g neid g Matthew 24:32-35; Mark 13:28-31

²⁹⁻³⁰Tsh amjed g Jesus am ha ahgi ihda ha'ichu wepogida ahga, “Neh, mt wo s-mahchk mo g toniabkam e aihim mamt wo nei mat g suhna je'e ch nahnko mahs u'us ab wo i i'iwgi. ³¹K hab wa masma hab mahs mamt wo nei mat hab wo e juh idam mani am heki hu em-ahgid k wo s-mahchk mo e aihim mant ep wo jiwia.

³²“Neh, hegam mat wo nei ihda mani em-ahgid at d wabsh wo kia dodakamk jewed dahm mat hekid wehs am hab wo e juh. ³³Wehs am gam hu hab wo i e juh ihda Jiosh nahtoi mam in neid. T wabshaba g ni-ne'oki pi hekid gam hu hab wo i e juh.

Mamt wo si s-e nen'oidad

³⁴“Si g wo s-e nen'oidad mat haha wabsh wo em-ai hegai tash. Mt am hu pi wo mahchk. Pi g am wo sha'i e hiwgid mamt wabsh si mu'i ha'ichu k ed wo e nakogad ch wo si e gegosidad ch wo nawkko'od ch g e-kihdagkaj wo e kudutad. ³⁵Hegai tash at am hab haha wabsh wo si e juh wehs hemajkam ha tahgio. ³⁶Mt wo si s-e nen'oidad ch wo e ho'ige'idahunad chum hekid mamt ab wo u'ukch g gewkdag ch s-ap am gahi wo wuhsh wehs ihda mat am hab wo e juh. Nt pi an hu ha'ichu wo em-abch ahni Jiosh si Kehsha mamt hekid wo ha lodai g hemajkam.”

³⁷⁻³⁸Sh g Jesus wehs tashkaj am ha mashcham ge'e cheopi ch ed. Kush mu'ijj am wui daiw wabsh i sisi'alimad mat ab wo kaiha. Sh am i huhuduk, sh gam hu hihhim idam Jesus Olive U'us Kawulk wui ch am koksho.

Mamtsh am i ap'ech mamtsh wo mua g Jesus

An g neid g Matthew 26:1-5;

Mark 14:1-2; John 11:45-53

22 Sh am i e aihim mash eda e wushshad matsh wa g Jiosh ha do'ibia g ha-shohshonbad. Sh heg eda pi e ko'a hegai pahn

mo jewajidas. ²Sh g u'ugchu papal ch chehanig ha mashchamdahm am wabsh s-a'agi e nakog matsh wo mua g Jesus ch wabshaba s-ha ehbid g hemajkam.

Matsh g Judas am ap'ech matsh wo gagda g Jesus

An g neid g Matthew 26:14-16; Mark 14:10-11

³Kutsh g ge Jiawul Satan an bei g Judas Iscariot. ⁴Tsh id am i ha dagito hegam Jesus k am him k am ha wehm a'aga g u'ugchu papal ch ge'e cheopi nuhkuddam ha-ge'ege'e'ejig mat has masma am wo i dagito g Jesus ha wui. ⁵Tsh si s-hohho'i idam k ab si ahgi mat wo namkid. ⁶Tsh amjed am i e nako g Judas mat am wo neidad mat s-a'agi wo gagda g Jesus ab ha wui. T pi wo mahchk g hemajkam ab amjed.

Matsh am i e ai g ha-shohshon ha-do'ibiadag gegosig.

An g neid g Matthew 26:17-25;

Mark 14:12-21; John 13:21-30

⁷Tsh am hahawa s-ap i e ai hegai ha-shohshonbad ha-do'ibiadag piast. Kush d wehpeg tash matsh eda wo e kokda g kahwal mahmad. ⁸Sh g Jesus hab ha ahg g Peter ch John, “Am g wo hihim k am wo i ap'ech g t-gegosig matt wo wuhshad g t-shohshon ha-do'ibiadag.”

⁹Kush hab kaij hegam, “Bahtt hab wo juh g t-gegosig?”

¹⁰Sh hab kaij, “Neh, am amt wo hihi Jerusalem wui. T ab hema wo himad g cheoj ch wo wa'igchugad ab ha'a t ab. Kumt am wo i oi. Kut am hu hebai wo him k am wo i wah hema kih ed. ¹¹Kumt hab wo chei ab wui g kihkam, ‘Neh,

s-mahchimk o g t-mashchamdam mas an hebai i ha wi'is matt wo wuhshad g t-shohshon ha-do'ibiadag.' ¹²Kut am wo hema em-chehgi g kih. T id gan hu ha-kih dahm hab wo chu'igk ch wo ge'ejk ch am wo apchudask. Kumt an ha'ab wo i ap'ech g t-gegosig”

¹³Kutsh wa woho am hihi idam kihhim wui. Tsh wa woho s-ap am hab e juh mash has i ha ahg. Kutsh am i ap'ech g gegosig.

Matsh g Jesus am i shonwuich g mihsmda chemait hugi.

An g neid g Matthew 26:26-30; Mark 14:22-26; 1 Corinthians 11:23-25

¹⁴Tsh am i hud. Kutsh am hahawa dada hegam ha'i. Tsh g Jesus am i dahiwua mihsa wui. Tsh g chuhchaj am ep dadhawiua.

¹⁵Kush hab kaj ab ha wui, “Si ani tatchua mant wo em-wehm huh ihda gegosig mant koi wo ni-muhkid ¹⁶nant pi pi hekid ia hu em-wehm ep wo huh ihda hab mahs gegosig. T wabshaba ab wo e ai mat wo s-ap e nahto g em-do'ibiadag. Kumt an wo ni-wehmajk dahm kahchim ch ed.”

¹⁷Mtsh ab hahawa mah g nawait am tahsa ch ed. Kutsh ab i ho'ige'el g Jiosh k hab kaj ab ha wui, “Ab g wo beh'i ihda k wehsij ab wo ha ih. ¹⁸Neh, ahni ant pi hekid ab hu ep wo ih ihda uhdwis wadag k ab wo ai mat wo e nahto g Jiosh kownaltalig.”

¹⁹Neh, bash kaj ch am hahawa bei g chemait k ab ho'ige'el g Jiosh k am i hahain k hab kaj, “Do ni-honshpadag ihda mant am i em-hahaini. Id ani hab ahgch

hab kaj mant wo ni-muhkid am em-wehhejed. Ab g wo huhgi ihda hahainig k id chum hekid am hab wo junihid mamt hekaj wo s-ni-chegitok.”

²⁰Tsh ab hahawa ep ha mah g wasib k hab kaj, “Do ni-eh'ed ihda nawait. Id ani hab ahgch hab kaj mat g ni-eh'ed wo e iawua mat hekaj am hab wo e juh hegai mo wa g Jiosh hab kaj matsh hab wo em-juni.

²¹“Neh, hegai mat wo ni-gagda o ia ni-wehm daha mihsa wui. ²²Bant wa masma wo ni-muhkid mat has masma g Jiosh am i ap'ech mat g si Kehshaj wo e muhkid. T wabshaba wo si s-ko'okam e namkid hegai mat wo ni-gagda.” ²³Tsh ab ha hekaj a'ai i e kakke mas hedai wud wok ch hab wo e juh.

Mas hedai d wo si ha'ichuk.

²⁴Kush am e ne'owin hegam Jesus chuhchai am a'agadch mas hedai d wo si ha'ichuk am ha shahgid. ²⁵⁻²⁶Sh hab kaj g Jesus ab ha wui, “Neh, ab am si e ha'ichuchud hab sha masma mo g kokownal. S-mahch am mo hegam si s-gewkam an ha u'ukch g e-hemajkamga. Kut hemho wa am hab wo junihid mo haschu ab ha chehani. Mt wabshaba ahpim pi hab masma am wo ha dahmkad g e-wehm wohochuddam. Si amt s-hemajim am wo i ha wehmtad. Hegam kokownal o tatchua mat g hemajkam hab wo ha elidad mo ge'e ha'ichu hab ha junid. Mt wabshaba ahpim pi hab masma hab wo e elidad mam ge'e ha'ichu hab ha junid g hemajkam. ²⁷Aha

nam hig hab chum e elid mam d ha-a'amo ch am wo dadhaiwua mat g em-pionag wo em-gegos? Ni eda ahni pi hab masma hab ni-wua, chum anis d em-kownalig ch wabshaba heg ni-wepogid mani d em-pionag.

²⁸“Ahpim amt pi hekid sha'i ni-dagito am oidam g ha'ichu ni-nakogig, ²⁹Kunt heg hekaj wo em-kokownalch hab masma mat g ni-ohg Jiosh ni-kownalch. ³⁰Mt am ni-wehm wo e gegosidad ni-kownaltalig ed. Kunt hab wo em-juh mamt d wo u'usagakamk am ha dahm hegama gamai gohk kawod dakam Tutuligo hemajkam.”

Matsh g Jesus am ah mat g Peter pi wo mahch k e ah

An g neid g Matthew 26:31-35;

Mark 14:27-31; John 13:36-38

³¹Kush hab kaj g Jesus ab Simon Peter wui, “Ih, Simon, Jiosh at wo hiwigi g ge Jiawul mat wehsijj wo em-a'appe hab sha masma mat g pilkani hihkdam wo nehnich g e-hihka k gam hu wo i gawulkai g mohgaj. Jiawul o hab chum e ahg mat gam hu hab wo i em-juh hab masma mo g mohg. ³²Nt wabshaba ab i tai g Jiosh mat wo i gewkaj g m-wohochudadag, Simon. Kupt am wo i ha gewkemhu g e-wehm wohochuddam mapt hekid ab uhpam wo i e nodagi ni-wui.”

³³Sh hab kaj g Peter, “Ni-kownalig, ni-nahtokch ani mant wo ni-kuhpachud k wo ni-muhkid m-wehm.”

³⁴Sh hab kaj g Jesus, “Neh, Peter, pi at koi am hu wo kuhu g keli chuchul id i chuhug ab, kupt

waikko hab wo chei map pi sha'i ni-mahch.”

Matsh am wo nam g a'appema

³⁵Sh hab ep kaj g Jesus ab ha wui, “Neh, namd ha'ichu i pi edagi mam wa ahgachug g ha'ichu ni-ahga pi u'uk g e-lial kokstal o g limoshana kokstal o g shuhshk?”

Sh hab kaj hegama, “Pi ha'ichu.”

³⁶Sh hab hahawa ha ahg, “Mt wabshaba hemu an wo u'ad g e-lial kih ch e-is-pahyo chum ams hems wo gagda g e-lihwa k hekaj wo hema ha nolawt g is-pahyo.

³⁷Hemho wa at am hab wo e juh ihda mo ab ni-amjed o'ohanas ch hab chu'ig:

Bamt masma ab wo mohto'i g chu'ijig g Jiosh si Kehsha mamt g pi ap hemajkam.”

Isaiah 53:12

³⁸Sh hab kaj hegama chuhchajj, “Pegih, t-kownalig, m ia gohk wehch g i'is-papayo.”

Sh hab kaj g Jesus, “Neh, e at ai matt wo hih.”

Matsh g Jesus pi ap e taht k am e ho'ige'idahu Gethsemane t am

An g neid g Matthew 26:36-46; Mark 14:32-42

³⁹Tsh amjed gam hu hih g Jesus Olive U'us Kawulk t ab mash hab wa e wua. Kutsh oi hegama chuhchajj. ⁴⁰Tsh am i dada amai. Sh hab kaj ab ha wui, “Am g wo e ho'ige'idahun mamt s-ap wo nako g e-a'appema.” ⁴¹Neh, tsh am hahawa ha dagito k am ba'ich sha'i him k am tonwua k e ho'ige'idahun ⁴²hab kajch, “Ni-ohg, matp am wo s-ap'ek, pt gam hu hab hig wo i juh hegama si s-ko'ok sho'igdag mo

ab ni-wui him. Kuni eda tatchua mat ahpi g m-tatchui hab wo e juh.” [43Tsh am haha wabsh hema jiwia g anghil ab wui k ab si i gewkaj. 44Kutsh si e kudut k am ba'ich haha wabsh si e ho'ige'idahu. Kush g wahuddaj am e iawua jewed dahm k d wabsh eh'ed.]

45Tsh am i ha'asa e ho'ige'idahun k am hih mash am dadha hegam chuhchajj. Kush am kokksh nash pi wabsh i ha ba'iwich g pi ap tahhadkam. 46Sh hab kajj ab ha wui, “Shahchu am ahgch kokksh? Ab g wo nehen k wo e ho'ige'idahu mamt s-ap wo nako g e-a'appema.”

Matsh e behij g Jesus

An g neid g Matthew 26:47-56;

Mark 14:43-50; John 18:3-11:

47Sh am wabsh kia neok. Sh ab ha'i ge hihim g hemajkam. Kush heg ha wanimed Judas mash d chum hema kehshaj g Jesus ch ab wui i hih matsh ab wo chintad.

48Sh hab kajj g Jesus, “Ih, Judas, pt wo ni-gagda ab ni-chintadk ahni Jiosh si Kehsha!”

49Tsh am i nei hegama ha'i Jesus chuhchai mo haschu has e wua k hab kajj, “T-kownalig, natt wo ha cheggia g i'is-papayokaj?” 50Kutsh hema ab si i widu g is-pahyo k g uhgchu pahl nehologa nahk an si hikuch.

51Sh hab kajj g Jesus, “Am g wo wa i ha'asa,” k an taht ihda cheoj nahk k doaj.

52Tsh am wui dada g u'ugchu papal ch cheopi nuhkuddam ha-ge'ege'ejig ch g ge'eged mat an wo bei. Sh hab kajj g Jesus ab ha wui, “Bamki ni-elid mani d s-chu

ehskam ch hab ia dada u'ukch g i'is-papayo ch u'us. 53Am ani em-wehm ha'ichug cheopi t am wehs tashkaj. Kumt pi an hu ni-bei. T wabshaba hemu am i em-ap'et. Pi ap'ekam at s-ap am hab wo e juh s-chuhugam k ed.”

Matsh g Peter pi mahch k e ah g Jesus

An g neid g Matthew 26:57-58, 69-75; Mark

14:53-54, 66-72; John 18:12-18, 25-27

54Tsh an bei g Jesus k gam hu i bei uhgchu pahl kih wui. Sh g Peter ga hu wabsh mehkJed ha oid. 55Kutsh eda am ge e nai kolhai ch ed. Kutsh am i jiwia g Peter k am ha wehm dahiwua hegama mo am dadha.

56Kutsh am hema jiwia g chehia pion k am nei g Peter k ab si i neid k hab kajj, “Ihda o'odham o wa an wehmaj hegai mamt an bei.”

57Tsh wabshaba pi mahch k e ah g Peter hab kajjch, “Pi ani sha'i mahch hegai.”

58Sh am sha'i ha'as. Kutsh am hema ep cheh g Peter k hab kajj, “Ahpi ap d hema hegama Jesus.”

Sh wabshaba hab kajj g Peter, “Ih, pi o woho.”

59Sh am hu d i hemako ohla amjed. Kush hema o'odham am si e gewkaj ch hab kajj, “Woho o wa mo ihda o'odham hab d wa'ap ha wehm o'odham noki pi ab d kihkam Galilee chekshani ch ed.”

60Sh hab kajj, “Pi ani sha'i mahch maps haschu hab ahg.” Neh, sh am wabsh kia neok. Tsh g keli chuchul am si ku. 61Kutsh ab si e sikolkai g Jesus k ab si i nei g Peter. Tsh am wabsh si chegito g Peter g jesus

ne'oki mo wa hab kaij, “Koi at wo kuhu g keli chuchul, kupt waikko hab wo wa'i chei map pi ni-mahch.”
⁶²Tsh gam hu hahawa i wuhsh g Peter k si pi ap e tahtk ch shoak.

Mamsh nahnko ahg ch gewittan g Jesus

An g neid g Matthew 26:67-68; Mark 14:65

⁶³Sh hegama mash am nuhkud g jesus nahnko ahg ch an si ma'ish k wuh g wuhpuij ⁶⁴k ab si shonikkash ch hab ahg, “Am g hig t-ahgid mas hedai ab m-shonikka.” ⁶⁵Kush mu'i nahnko ep s-ko'okam ahg.

Mamtsh am u'apa g Jesus ha wui g e jehnigiddam

*An g neid g Matthew 26:59-66;
 Mark 14:55-64; John 18:19-24*

⁶⁶Tsh am i mahsi. Kutsh am e nam hegama ge'leged ch u'ugchu papal ch chehanig ha mashchamdama mash d e jehnigiddama. Kumtsh am ha wui u'apa g Jesus.

⁶⁷Sh idama hab kaij, “Am g t-ahgid maps d Jiosh si Kehsha.”

Sh hab kaij g Jesus, “Pi amt woho ab hu wo ni-wohoch mantp am wo em-ahgi mani hedai wud. ⁶⁸Kumt pi woho ab hu wo i nodagi hegai mantp haschu wo em-kakke. ⁶⁹Nt wabshaba wo em-ahgi mant i'ajed an s-apkojed hugidaj an wo dak g Jiosh ahni si Kehshaj.”

⁷⁰Kush wehsijj hab kaij, “A kupt d Jiosh alidag?”

Sh hab kaij ab ha wui, “Dani ahni.”

⁷¹Sh hab kaij hegama, “Neh, pi ach sha'i hema tatchua mat wo si s-mahch k ah. Achim ach

hejel kah mo si pi ap neok ab Jiosh t amjed ch hekaj wo chum e muhkid.”

Mamtsh g Jesus am i dagito Pilate wui

*An g neid g Matthew 27:1-2, 11-14;
 Mark 15:1-5; John 18:28-38*

23 Kutsh wehsijj hegama haha'ichu ab si e wehmt k am i bei g Jesus hegama mash d kownal am Judea chekshani ch ed ch hab chehgig Pilate. ²Sh ab ha kaiham. Kush ab wui ab ha'ichu abchudahim g Jesus hab kaijch, “Neh, ihda o'odham o im hu hab wabsh i ha wawan g t-hemajkamga hab ha ahgch mat pi wo namkid g ge'le kownal. Kuch kah mo hab hejel e ahg mo d jiosh si Kehsha ch d uhg kownal. Kupt hemho wa wo mua.”

³Kush ab kakke g Pilate g Jesus ch hab kaij, “Nap d ha-kownalig g Tutuligo hemajkam?”

Sh hab kaij g Jesus, “Dani ahni.”

⁴Tsh g Pilate am i mamche hegai mam ab abchud. Sh eda mu'i an oiopo g hemajkam s-neidamk mo has e wua. Tsh g Pilate am ha kaichudk hab ha ah g u'ugchu papal, “Pi ant ha'ichu sha'i cheh mas pi ap hab juh ihda o'odham mat heg hekaj wo e muhkid.”

⁵Kush wabshaba ba'ich i e gewpkad ch hab kaij, “Am o ha chu'amun g t-wehm o'odham ha'ichu ha mashchamch wehsko ga hu Galilee t amjed ch ia Judea ch ed ch chum hems iia Jerusalem ch ed.”

Mamtsh am u'apa g jesus Herod wui

⁶Tsh am i kah g Pilate ihda k hab kaij ab ha wui, “Kutp ab Galilee

chekshani ch ed d kihkam ihda o'odham?" ⁷Kumsh am ahgid mash am ha'ab d kihkam. Sh g Herod am d ha-kownalig Galilee chekshani ch ed ch ia'i idani am hab wa'ap ha'ichug Jerusalem t am. Kumtsh heg hekaj am wui u'apa g Jesus.

⁸Kush si s-hehgid g Herod nash pi tash wa'i chum s-neidamk hab chum e ahgch matp hems am tahgio hab wo juh g s-hasig ha'ichu.

⁹Kumtsh am kei tahgio. Kush mu'i ha'ichu kakke. Sh wabshaba pi has sha'i kaij g Jesus. ¹⁰Kush g u'ugchu papal ch chehanig ha mashchamdham am gegok ch si s-gewkam ab ha'ichu abchud g Jesus. ¹¹Sh g Herod g e-shondalig ha wehm haha wabsh nahnko ahg g Jesus ch si ash k ash g si s-kehg kahba ab wahki. Tsh ab hahawa ha cheha g Herod mat wo uhpam bei am Pilate wui. ¹²Kutsh heg i tash ab g Pilate ch Herod ab hahawa e nawojt k ash eda chum s-e keh'id.

Mamtsh am i ap'ech matsh wo e muhkid g Jesus

An g neid g Matthew 27:15-26;

Mark 15:6-15; John 18:39-19:16

¹³Tsh g Pilate am i ha hemapai g u'ugchu papal ch ha wanimeddam g hemajkam ¹⁴k ash hab kaij ab ha wui, "Ia amt u'apa ihda o'odham ni-wui hab kaijch mo go'olko ha wanimed g hemajkam. Kunt hemuch ia em-kaichudk am i mamche hegai mam ab abchud k pi ha'ichu sha'i cheh mas pi ap hab junihim. ¹⁵Kutsh Herod hab wa'ap pi ha'ichu sha'i cheh. T g shondaligaj ab uhpam i u'apa t-wui. Pi atki ha'ichu hab juh

ihda mas heg hekaj wo e muhkid.

¹⁶Kunt wabsh wo ha cheha mat wo gewittan k wo dagito." [¹⁷Neh, bash kaij nash pi am hema i dadagitosh g lihso ha wehhejed wehs ahid ab mo eda hab e wua hegai ge'e gegosig.]

¹⁸Kush wehsijj hegam mu'i hemajkam mo am ha'ichug si s-kaidam hab kaij, "Pi ach tatchua ihda. Barabbas apt wo i dagito t-wehhejed." ¹⁹Sh eda ihda Barabbas am e kuhpch nash pi chum ha'i ha wehm cheggia g kownal ch ha'i ha kokda.

²⁰Sh am ep chum ha wehm neok g Pilate nash pi chum s-dagitoimk g Jesus. ²¹Sh wabshaba am ep si s-kaidam hab ge kaij mu'ikko, "Mu'ani! Mu'ani ab kots t ab!"

²²Sh hab ep chum kaij g Pilate, "A t haschu pi ap hab juh. Pi ant ha'ichu sha'i cheh mas heg hekaj wo e muhkid. Ab ant wo ha cheha mat wo gewittan k wo dagito."

²³Sh wabshaba am wabsh si s-kaidam hab kaij matsh ab wo naggia kots t ab. Neh, tsh g ha-hihinki gewito g Pilate. ²⁴Tsh am i ap'ech mat am hab wo e juh g ha-tatchui. ²⁵Kumtsh gam hu i wuhshad hegai mash d ha cheggiadkam ch d ha mu'akam k amtsh g Jesus am i dagito ha wui mat am hab wo juh mo has i elid.

Mamtsh ab naggia g Jesus kots t ab

An g neid g Matthew 27:32-44;

Mark 15:21-32; John 19:17-27

²⁶Kumtsh gam hu i bei g Jesus ab kushwiotachudk g kots. Kush am hu hebai hihim. Tsh ab hema i ha nam g o'odham mash ab him Jerusalem wui. Id ash hab chehgig

Simon ch ab d kihkam mash am d Cyrene ch ash ab him ga hu o'oidag amjed. Kumtsh am wabsh si be k ab kushwiotach g kots k atsh hab juh mat ab oidk wo himad g Jesus.

²⁷Kush mu'i hemajkam ab oidch hihim. Sh g u'uwi si shoanihim wehhejed. ²⁸Tsh ab i ha nei g Jesus k hab kajj ab ha wui, "Pi g am ni-wehhejed wo shoanid, ahpim Jerusalem t am kihkam, ch wabshaba hejel e wehhejed ch e-a'aliga ha wehhejed. ²⁹Ab o him g tash mat hab wo chei g hemajkam mo si ha'ichu s-ha abamk hegam u'uwi mat pi hekid sha'i mahmadt. ³⁰⁻³¹Woho o wa mat s-ta ehbidam ha'ichu hab wo e juh am ni-tahgio. T wabshaba ba'ich i s-ta ehbidam ha'ichu hab haha wo juh am ha tahgio hegam mo d pi ap chu'ijkam ch pi ab hu ni-wui e nohnogimk. (30) Hegam at pi wo e nako mas heg wo nako k heg hekaj wo chum tatchua mat g dohda'ag am ha dahm wo i shulig k wo ha ehsto."

³²Kumsh gohk ep ha u'a mamtsh am wehmaj wo ha kokda. Sh idam d pi ap hehemajkam. ³³Kumtsh an dada anai mash am hab e a'aga Koshwak. Tsh g shondal ab hahawa sisish g Jesus kots t ab k am i kei g kots wag ch ed k gan hu a'ai hab wa'ap ha nahngia hegam pi ap hehemajkam kokots t ab.

³⁴Tsh ab hahawa e ho'ige'idahu g Jesus k hab kajj, "Ni-ohg Jiosh, ab g wabsh si i s-ha ho'ige'id hegam mat ab ni-naggia. Pi o sha'i mahch mani d si m-Kehsha ch d s-ap'ekam."

Kutsh g shondal am e chichwi k g wehshugaj e to'i.

³⁵Sh g hemajkam am gegok ch neid wehs ihda. Sh g ha

wanimeddam nahnko ahg g Jesus ch hab kajj, "Ha at do'ibia ha'i, pegih, k hejel wo e do'ibia matp d Jiosh si Kehsha."

³⁶Kush g shondal hab wa'ap nahnko wua ch hab wabsh s-junim k ab chum mah g nawait ³⁷ch wabsh nahnko ahg hab kajjch, "Oi g hejel e do'ibiad napsh pi d ge kownal."

³⁸Sh am dahm o'ohadag ihda, "Id o d Tutuligo hemajkam ha-kownalig."

³⁹Kush hema hegam pi ap hehemajkam mash ab hab wa'ap naggia kots t ab ab si s-ko'okam has ahg g Jesus ch hab kajj, "Neh, kuptp d ge Jiosh si Kehsha, pegih, k wo hejel e do'ibia k ahchim ep wo t-do'ibia."

⁴⁰Kush g hema ab si s-keh'id ihda ch hab kajj, "Aha nap pi ehbid g Jiosh. Ia ach t-wehm nahngia ch ab t-wepo mohto'id as g chu'ijig.

⁴¹Kuch ahchim s-ap ab mohto'id as nach pi wa woho d pi ap chu'ijkam. Kutsh eda ihda pi hab sha'i juh g pi ap'ekam."

⁴²Neh, bash kajj ihda hema ch ab Jesus wui hab hahawa ep kajj, "Jesus, ab apt wo wa al s-ni-chegitok hekid ab bek g e-kownaltalig."

⁴³Sh hab kajj g Jesus ab wui, "Neh, ni ab si m-ahgid mapt id i tashkaj wo ni-wehmajk an Jiosh kihdag ed."

Matsh muh g Jesus

An g neid g Matthew 27:45-56;

Mark 15:33-41; John 19:28-30

⁴⁴Kutsh am i dahm juh. Tsh muh g tash k wehsko s-chuhugam ch ab ai g waik ohla. ⁴⁵Kutsh am ge'e cheopi ch ed g s-kowk

ikus kuhpadag ab si shel e wantsh. ⁴⁶Kush am si s-kaidam e ho'ige'idahun g Jesus Jiosh wui ch hab kajj, "Ni-ohg, ab ant i m-mah g ni-doakag." Neh, bash che'ioik am i muh.

⁴⁷Kutsh am i nei g shondal ha-ge'ejig matsh haschu has e juh k ab si ihm g Jiosh ch hab kajj, "Woho oki d s-ap'ekam o'odham ihda."

⁴⁸Tsh amjed mu'ijj gam hu uhpam hihi hegam mash ab neid ab wabsh e wecho wahpkch nash pi oi wa si ap e tatat. ⁴⁹Kush wehsijj hegam mo si s-mahch g Jesus ga hu wabsh mehk gegok ch ab neid wehs ihda. Ha'i idam ash d hegam u'uwi mash ga hu Galilee t amjed an wehmajkahim g Jesus.

Mamtsh ged hu cheh g Jesus

An g neid g Matthew 27:57-61;

Mark 15:42-47; John 19:38-42

⁵⁰⁻⁵¹Sh eda wa hema hegam e jehnigiddam chum pi hohho'id matsh g wehmaj e jehnigiddam s-mu'am k ah g Jesus. Id ash hab chehgi g Joseph ch ab d kihkam mash am d Arimathea ch s-ap d o'odham ch ab nenida g Jiosh kownaltalig. ⁵²Tsh hekid am i muh g Jesus, tsh ha hekaj am wui hih g Pilate k ab si e sho'igchud k tahni g honshpadaj. Tsh am wa ap'ech matsh wo bei. ⁵³Tsh gam hu ep him k ab i huduni. Sh am mia hab chu'ig g hiha'ini ch ab heki hu cheotas hodai ch ed ch pi koi e hekaj. Tsh g Joseph am i bei g honshpadag k ged hu heg eda cheh am i hobinodk g s-kehg ikuskaj.

⁵⁴⁻⁵⁵Tsh hegam u'uwi mo wehmajkahim g Jesus ab Galilee

t amjed gam hu oi g Joseph k ash neid mat hebai e cheh g Jesus k has masma ab e woi. (54) Kush d wialos. Sh g hemajkam chum e nakog no pi g shahwai d ha-mihshmda tash. ⁵⁶Kutsh gam hu uhpam hihi idam u'uwi mash hebai dadha k am i ap'ech ha'ichu mat hekaj wo s-ap hab juh mo hab masma hab ha wua g e-ko'idag k ash am hahawa e ulinihogi mihshmda tash ch ed mo hab masma d ha-chehanig.

Matsh ab uhpam wuhsh g Jesus muhkig t amjed

An g neid g Matthew 28:1-10;

Mark 16:1-8; John 20:1-10

24 Sh am e aihim g domig tash. Tsh am hihi idam u'uwi hiha'ini wui k ash u'a hegai matsh am nahto matsh hekaj wo i ap'ech g muhki. ²Kush gam hu e melchudas hegai ge'e hodai mash ab hekaj e kuhpch g hiha'ini. ³Tsh am i wahp k pi sha'i edagi g muhki ⁴k am wabsh i gegok pi amichudch ihda. Tsh am haha wabsh gohk i e chehgi ha wui mo hab sha mahs mo g o'odham. Kush wabsh si tonod g ha'ichu ha-eniga. ⁵Kutsh si e totods idam u'uwi k ab si i shul jewedo.

Sh hab kajj idam gohk ab ha wui, "Shahchu am ahgch ia gahg hiha'ini t am hegai mo d doakam?" ⁶Pi o ia hu ha'ichug g Jesus nat pi i wuhsh ab muhkig amjed. Am g wo i chegito mo wa has kajj ab em-wui. Am am wa wabsh kia ha'ichug Galilee t am. ⁷K wa hab kajj, 'Hemho ant am wo wa i ni-dagito pi ap'ekam hemajkam ha wui ahni Jiosh si Kehsha. T hegam ab wo ni-naggia kots t ab mat wo ni-mua.

Nt wabshaba wo i wuhsh muhkig amjed am heg eda waik tash amjed.⁷ Neh, bo kajj g Jesus ab em-wui.”

⁸Kutsh idam u'uwi am i chegito mash wa hab kajj g Jesus ⁹k ga hu uhpam hihim k ash am ha ahgid hegam gamai hemako Jesus chuhchai ch wehs g ha'i mat has e juh. ¹⁰Ha'i idam u'uwi mash am ha ahgid ash d Mary Magdalene ch Joanna ch hegai Mary mash g madaj hab chehgig James.

¹¹Kush hegam Jesus chuhchai pi ab hu ha wohochud nash pi hab ha elid mo wabsh pi e mahch ch hab kajj. ¹²Tsh wabshaba g Peter am i e nakog k am meh hiha'ini wui k ged hu meliw k am i koachsh. Kush heg am wa'i kahch s-kehg ikus mash heg hekaj chum e hobinodch. Tsh amjed gm hu uhpam hih am wabsh i pi amichudch matsh haschu has e juh.

Matsh ha'i nei g Jesus am hebai hihimadch

An g neid g Mark 16:12-13

¹³Kush heg wa'i tash gohkajj am hihim Emmaus kihhim wui. Id amt ab wo ai kihhim am hu i gohk ohla ab am hihimadch Jerusalem t amjed. ¹⁴Sh idam am hihimadch neneok ab amjed hegai matsh haschu has e juh am tahgio g Jesus. ¹⁵Tsh g Jesus am ha a'a k am ha wehm hih. ¹⁶Kush hi wa chum neid ch wabsh pi amichud.

¹⁷Sh hab kajj g Jesus ab ha wui, “Shahchu am am si a'agad ch ia hihim?”

Tsh am wabsh i gegokiwua k si pi ap e tahtkam mahs. ¹⁸Sh hema idam hab chehgig Cleopas ch id

hab kajj ab wui, “Aha nap ahpi wa'i hejel pi mahch mat haschu has e juh hemuch hu'i ch eda am daha Jerusalem t am?”

¹⁹Sh hab kajj g Jesus, “Shahchu ap hab ahg?”

Kush hab kajj ihda, “Hegai mat hab e juh am tahgio hegai mo hab chehgig Jesus ch ab d kihkam Nazareth t ab. Heg oki d Jiosh ha'ichu i tashogiddam. K wehsijj ab si has elid mo haschu hab junihim ch has i kajj. ²⁰Kut g u'ugchu papal ch t-wanimeddam am i dagito kownal wui mat wo mua. Kumt ab sisish kots t ab k mua. ²¹Kuch eda id hab chum si elid mo d hegai matsh wa wo t-do'ibia ahchim Tutuligo hemajkam. K hemuch d i waik tash amjed mat hab e juh.

²²Kut am ha'i hihi g u'uwi t-wehm wohochuddam wabsh i si'alim ²³k atsh pi cheh g muhki k uhpam dada k t-tods am t-ahgidch matsh am ha'i i e chehgi g anghil ha wui. Sh idam hab ha ahgid mo d doakam g Jesus. ²⁴T am ha'i hihi g chechoj hiha'ini wui k am s-mai mash wa woho pi am hu ha'ichug g muhki mo hab chum kajj hegam u'uwi.”

²⁵Sh hab hahawa kajj g Jesus ab ha wui, “S-wohom am hig pi ha'ichu a'amichud ch pi wohochud hegai mo wa g kekelibad Jiosh ha'ichu i tashogiddam am ahg. ²⁶No hig pi hab wa mahs mat hab masma wo e sho'igch g Jiosh si Kehsha k am wo i wah si s-kehg e-ap'edag ed.”

²⁷Neh, bash kajj g Jesus ch amjed am i wuhshad k am tashogi wehs hegai matki g Mosesbad ch wehs hegam kekelibad Jiosh ha'ichu i tashogiddam an o'oha ab amjed.

²⁸Kutsh am hihim k am i aihim hegai al kihhim mo am wui d hihimdam. Sh gam hu wabsh i si him g Jesus. ²⁹Kush wabshaba an shoshobid ch hab kajj, “Ia apt wo wa’i jiwia t-wehm. Hudunihim o k ch ab i s-chuhugamhi.”

Kutsh wa woho am ha wehm i jiwia. ³⁰Tsh am wo i gegos. Tsh am bei g chemait k am e ho’ige’idahun k am hahawa hahain k ab ha mah. ³¹Kutsh am hahawa i amich. Tsh wabshaba am wabsh i pi’ata.

³²Sh hab hahawa kajj ab a’ai e wui, “Neh, ab at wa si i t-shuhdad g s-ap tahhadkam mo wa ab t-wehm neokhim ch am tashogid g Jiosh o’ohana mach ab hihim wohg oidch.”

³³Tsh am ha hekaj i e nakog k gam hu uhpam hihi Jerusalem wui. Kush am e hemapadch hegam gamai hemako Jesus chuhchai ha’i ha wehm g e-wehm wohochuddam. Tsh am dada idam gohk. ³⁴Kush hegam am ha ahgid ch hab kajj, “Neh, woho atki i wuhsh g t-kownalig Jesus ab muhkig amjed. Kutsh g Simon nei.” ³⁵Kush idam gohk am hahawa epai ha ahgid matsh haschu has e juh am wohg ch ed ch heg ehp matsh amich g Jesus matsh am hahai g chemait.

Matsh g Jesus am i e chehgi hegam ha wui gamai hemako

An g neid g Matthew 28:16-20; Mark 16:14-18; John 20:19-23; Acts 1:6-8

³⁶Sh am wabsh kia a’aga ihda. Sh am haha wabsh kehk ha shahgid g Jesus ch ash hab kajj ab ha wui, “Am g wo s-ap e tahtkkad.” ³⁷Kutsh sha’i si e totods hab em-ahgch mo d wabsh kok’oi.

³⁸Sh hab kajj ab ha wui, “Pi g wo sha’i e kudut k ab wabsh wo s-ni-wohochudad. ³⁹Ab g wo i neid g ni-nohnoi ch ni-tahtad k wo s-mai mani d ahni. Ab g wo ni-tahtam k wo nei mani pi d kok’oi. Kok’oi o pi ha chuhkug ch pi ha oh’o mani ahni hemuch imhab chu’ig.”

⁴⁰Kush hab che’iok ab ha chehgi g e-nohnoi ch e-tahtad. ⁴¹Kush chum si s-ap e tahtk ch wabshaba wabsh i haha’adka natsh pi wabsh i pi mai mat has wo el. Kush heg hekaj ab ha kakke mas am ha’ichu chekch mat wo hu. ⁴²Kutsh ab ge mah g watopi ga’i. ⁴³Kutsh ab be k huh. Sh id wehsijj neid.

⁴⁴Kush hab hahawa kajj ab ha wui, “Wehs ani am em-ahgid ihda heki hu. Wehs ha’ichu at hemho wa am hab wo e juh mo an o’ohanas ab ni-amjed ha-o’ohana ed g Mosesbad ch hegam ha’i kekelibad Jiosh ha’ichu i tashogiddam ch heg eda nen’ei o’ohana mo an hab chu’ig Jiosh heki hu o’ohana ed.”

⁴⁵Neh, bash kajj ch ab hahawa i ha mah g amichudadag mat wo s-amich g Jiosh o’ohana ⁴⁶k ash hab kajj ab ha wui, “Bant masma hab ni-juh mo wa hab chu’ig an Jiosh o’ohana ed mant hab wo wa ni-juh. An o o’ohanas mantsh wo ni-sho’igchud k wo ni-muhkid. Kutsh d wo i waik tashk amjed. Ntsh ep wo ni-chegito. Neh, heg ant hab juh. ⁴⁷Kut ia Jerusalem t amjed am a’ai wo i e ahgahi gam hu wehsko jejewed ha dahm mat g hemajkam ab wo i ni-hiwig

k gm hu wo s-ohhod g pi ap e-chegitoy. T g Jiosh im hu hab wo i juh g pi ap ha-chu'ijig. ⁴⁸Ahpim amt am wo ahgahid ihda si s-has ha'ichu mam neid ch kah. ⁴⁹T g Hekia S-ap'ekam Gewkdog ab wo em-mah g gewkdog mamt hab wo junihid. Heg ant am wo cheha mat wo em-wehmajkad hab masma mo g ni-ohg Jiosh hab kaj mat hab wo e juh. Mt heg hekaj ia wo dadkad Jerusalem t ab ch ab wo ai mamt ab wo bei hegai gewkdog.”

Matsh g Jesus gam hu i e bei dahm kahchim wui

An g neid g Mark 16:19-20; Acts 1:9-11

⁵⁰Tsh am hahawa i ha wanim amai mash am miabidch g Bethany. Tsh am hu hebai i dada. Kutsh am uhgk ul g e-nohnoi ha dahm k ab ha ho'ige'elid, ⁵¹Tsh g Jiosh gam hu i bei dahm kahchim wui.

⁵²Sh idam ab si has elid ch gam hu hahawa hihi Jerusalem wui s-hehgigch ⁵³k amjed chum hekid am hihhim ge'e cheopi wui ch ab ho'ige'elid g Jiosh.